

DISUMINYINA



Twasakidila, Mwaneetu Neville. Mukalenge akubeneshe.
Twasakidila.

Beetwabu mu dinda emu, balunda baanyi. Ndyèsè bwa kwikala mwaba ewu mu dinda emu mu Bwikadi bwa Mukalenge, mu tabernacle emu pamwe ne cisamba. Kabidi ndituku dya mvula uloka pambelu apa, kadi ndi mfuma ku difika apa mu kashinyi anu mpindyewu, ne mushindu mwine unuvwa nwimba misambu ne nutuuta bikashi, kudi ne cya kwikala mvula ya mabenesha munda. Pa nanku aci ncimpè be. Pa nanku tudi ne kusakidila kwàbûngì bwa dituku edi. Didi. . . Bikengela twikale ne mvula. Twètù katuyi ne mvula to, dibà adi Mfumu kèna mwa kusangisha mamuma Ende to. Pa nanku tudi ne mvu—mvula ya munda, ya nyuma, bwa cyanaana kakwakwikalaku mamuma a dinowa to. Bidi bikengela twikale ne mvula ya pambelu bwa cyanaana katwakupeta dinowa dya bya mubidi to. Neya bushuwa.

² Nanku, nudi bamanye ne, byònsò bibidi abi, bikengela cintu kampanda cidì cifwe bwa twètù kwikala ne mwoyi. Dinowa didi ditwala mwoyi, ne bidi bikengela bwa mwoyi kutwalawu lufu. Ku lufu nkutudi tupetela mwoyi. Nudi bamanye ne, ku dituku ne ku dituku, ku mwoyi webe wa mubidi ewu, bidi bikengela bwa cintu kampanda cifwe bwa wamòna mwa kwikala ne mwoyi. Bidi bikengela bwa wèwè. . . bwa cintu kampanda cifwe. Pa nanku udi—udi udyà ne ushaala ne mwoyi nku bintu bifwe. Pawikala udyà mapùndà a munyiinyi wa ngulube, ngulube mmufwe. Pawikala udyà bifweteke, ngombe mmufwe. Pawikala udyà ditala, ndifwe. Pawikala udyà dyàmpà dya blé, ee, blé s'mmufwe. Pawikala udyà shù, s'mmufwe. Udi ne mwoyi nku bintu bifwe, mu mubidi ewu. Nanku, aci kî ncijaadiki cya ne bivwa bikengela bwa Cintu kampanda cifwe bwa twamona mwa kwikala ne mwoyi Cyendelelele anyi? Kilisto wakafwa, Mwànà wa Nzambi, bwa twamona mwa kwikala ne mwoyi Cyendelelele. Pa nanku mèmè ndi ne disanka dyàbûngì be bwa biine byònsò abi mu dinda emu, dya kumanya ne bikondo binene bya makenga bitudi ne mwoyi mpindyewu ebi, ne dya kumanya ne Kilisto wakafwila bangènzàmpèkààtù, ne mwine awu ùvwa mmèmè ewu, bwa ne Yèyè wakamfwila mèmè.

³ Mpindyewu, ndi ngeela meeji ne mu dyalumingu dishaale edi nudi bavuluke ne kukaadi ndambu wa matuku uvwa Mukalenge mwakule naanyi ne mwambe ne netwikale mwa. . . Nudi numona mu mukaba wa mèyi wa mu dyalumingu dishaale ne kuvwa kulwa makenga a cimpicimpi. Anu pâmvwà ngenda mpweka apa mvwa nteeleja cisanji, ne Allemagne mmupete dipaasalala dya

mâyì dya kacypa baapeta mu ditunga adi. Mmashipe bantu nkama, ne bantu bakaadi mene anu badyowa. Ndi mufunde byôbì ebi, pâmvwà ngenda mpweka apa. Ne nkila yitù yikànda mâyì a mbû mmituuke, ne bikwabo byônsò, mu Allemagne. Ne Angleterre mmupete mvula ya bipupu miikàle ne bipeepele bikole ya yitamba kukwacisha bwôwà, mituutemu, ngeela meeji, miye ne nzubu binunu makumi mwandamutekete, yikaadi miye. Nwamonu anyi? Ee, tukàadi ku cikondo cya nshiikidilu. Yesu neamweneke dimwe dya ku abidi adi panshi aa, nenku tukàadi ku cikondo cya nshiikidilu. Vulukaayi anu ne, ebi bidi anu mbangilu cyanaana, byôbì's nebitungunuke biikàle bilwa anu kulwa. Nwamonu anyi? Tukàadi ku nshiikidilu.

⁴ Mpindyewu, maalaba, padi anu diyishi dijika leelu ewu, tudi tudilongolola bwa kuya cyakabidi ku Arizona, pa nanku tudi tulomba ekeleeziya bwa watusambidilaku, patuyaaya apa. Ne pashiishe ndi ne mapangadika manene adi akengela mêmè kwangata, balunda baanyi, kadi ncyèna mwa kuàngata nkaayaanyi to, bwalu ncyèna mumanye cya dyenza to. Nenku nêndombè ekeleeziya ewu, bu cisumbu cya beena kwitabuuya badi basòmbèle pamwe naanyi muneemu emu, bwa nwênù kunsambidilaayiku, bwa mapangadika aanyi ikale bwa mwaba mujaalame wa kuya. Bimenga biipacila ku nkama yisatu bya dyamwamwa dya mbû, ngeela meeji, bidi munkaci mwa kubiičila, ne—ne—ne Suisse, Allemagne, ne—ne Afrike, ne mu myaba yônsò. Pa nanku tudi tulomba bwa Nzambi wamonaku anu mwa kutukwacisha bwa twètù kwenza cintu cijaalame mu mwaba wikalaYe mwa kukwata neetu mudimu awu. Nenku nwânsambidilaayikù. Nêngùikalè nnusambidila misangu yônsò, nudi bamanye aci. Pa nanku nwânsambidilaayikù bwa Mukalenge Nzambi wamonaku mwa kundombola.

⁵ Mpindyewu, mu dyalukila dya ku Arizona, bu Mukalenge mwa kwanyisha, ndi—ndi muswe kukoka ntema ne netwikale mwa kucimanyisha mu ekeleeziya, nebacimanyishe mwaba ewu, nenku ndi muswe kwangata cikondo cileepa ndambu bwa kwakula ne disangisha mwaba ewu. Ndi ne Diyishi, ne ndi muswe kuyiisha munda mwa mêmè matwe ku mwandamukulu anyi cintu kampanda, nwamonu's, cya mushindu awu. Patwikala. . .

⁶ Inăbànzà kampanda uvwa wakula naanyi, Mandamu Wood wa mu ekeleeziya emu, mêmè nguvwa wakula nende, ne mvwa nsanganyibwa mu Milltown ku ekeleeziya wa ba-Baptistes kwaka kutuvwa twenza disangisha, ne ndi ngeela meeji ne dimwe dya ku masangisha abo a ntwadijilu, kwambaye ne: "Mvwa mubwele pa dîbà dikumi, Mwaneetu Branham, wêwè nguvwa uyiisha." Ki yêyè ne: "Wêwè kuyiisha too ne mu nkankala, pashiishe mapingaja majima, pashiishe kwangatabo ndambu wa dîbà wa tusunsa dikumi ne tutaanu, anyi makumi abidi bwa kudyabo cyakudya cya mundaamuunya." Ki yêyè ne:

“Twêtù kuumuka diloolo adi pa dîbà dikumi, wêwè ucivwa anu uyiisha.”

Mêmè—mêmè kwamba—kwamba ne: “Ee, nudi bamanye ne mêmè ewu ncitu mumanye byàbûngi menemene to, kadi, nudi bamanye’s, pândi anu ngumusha tukese twine tûndi mumanye atu mu njila, nenku mMulekela Yêyè utungunuka ne dyakula, mêmè. . . Yêyè ngudi mumanye byàbûngi.” Pa nanku, ntu mêmè muswe anu kubiteeleja, mêmè paanyi, pa nanku ndi. . . Kadi mvwa ngamba cyôci aci anu mu mushindu wa munyunguluke’s.

7 Kadi, mu dyalukila, bu Mukalenge mwa kwanyisha, ndi njinga bwa kubangaku kumpala kwa dîbà, kadi kunyeemena ku Mukenji udi Mukalenge unteeka pa mwoyi ewu. Nenku ndi ndomba bwa Yêyè wampeeshaku kaabujima kaawu mu cipeela mwamwa, bwa ekeleeziya mu dituku dya ndekeelu mpindyewu. Nwamonu’s, anu umwe wa ku nkwaka ya Nyuma, ngeela meeji, ki ukàadi pabwîpî. Nenku tudi twitabuuja ne Mukalenge Yesu ukaadi pabwîpî ne kukangula maułu ku makole a Nzambi, bwa kupandaci maułu, mutudi twitabuuja ne Yêyè neàcyenzè. Ne pa nanku tudi batwishiiibwe ne Yêyè neafile mukenji mutambe kwikala mujima pa bwalu abu patwikala mwa kwalukila. Nenku ikalaayi ne. . . tutwàdija bu pa dîbà citeema wa dinda, ne, anyi pa dîbà citeema ne tusunsa makumi asatu, ne kuya naabi too ne pa dîbà ibidi anyi isatu jaajaaja, anyi dîbà dyônsò dîngiikalà mwa kucijikija adi, nudi numona’s. Patwikala. . .

8 Pashiishe ndi ngeela meeji pa dîbà adi ne pàmwâpa nênye ku Afrike pângùmukà kwine aku, pa nanku, bu Mukalenge mwa kutungunuka ne kulombola mu mushindu awu, anyi, mu Suisse dyambedi, pashiishe mu Palestine ne mu Afrike, dîbà dya bibilu adi. Pa nanku, ikalaayi mu disambila. Cyônsò cinudi nwenza aci, nwambulule anu mêsù leelu ewu ne nusambile, nusambile. Kwajiki, ki ditekemena dimwepele ditudi twêtù naadi, ndisambila.

9 Tukàadi bapicishe. . . Ndi ntekemena ne kabyena bimweka bu ne ndi nshipa cijila to, anyi mudi muntu—muntu kampanda udi kayi mumanye cidiye wamba, kadi ndi ngeela meeji ne ditunga dyetu, bu ditunga, dikaadi dimane kupicila cikondo cya dipikudiibwa. Kukaadi. . . Bu ne kuvwaku beena Kilisto bûngi bukumbane anyi bûngi bukumbane bwa badi mwa kudisanga pamwe ne kudikokaku ne kudibungakaja, kadi nansha mudibi ne dikokiibwa dyàbûngi dikaadi dyenzekenzeke, batangadiki banene ne masangisha manene myaba yônsò, kadi dicidi anu ditungunuke ne kudyela mu cimvundu cinene. Pa nanku mêmè—mêmè ndi ngiitabuuja ne anu bu mudi matunga ônsò a manene aa, nwamonu’s, ônsò awu adi ne cya kudishinda. Ôwò awu, ndongolwelu yônsò ne bikwabo bidi ne cya kudishinda.

10 Pândi ngeela meeji bwa bantu bătù bâfila myoyi yabo bwa mungalaata’s. Aci’s—aci’s ncintu cya lulamatu bwa ditunga.

Acì's ncìmpè. Katwena naaci cilumbu to. Kadi bishi bwa myoyi yetu bwa Kilisto? Nwamonu anyi? Muntu mwikale cilobo; ujuuke kuulu, nsongaalume wa citende mucikàle ne mabeele pa ludimi, ukadyashisha pende anu nanku bamutuula mutu ku nshingu, ciine aci ne mbwa kwikalaye cilobo, ne pàmwàpa bwalu bwende kabuyi nansha bùmanyiika to amba anu kùdi famiye wende sungasunga kumbelu, anyi muntu kampanda wa beena mutumba utu mumumanye. Kadi peetu biikàle tuciina bwa kupatuka kwangata nkwaka udi mukumbane mu byònsò awu bwa Kilisto, nudi numona's, mùdì ne: "Ewu udi upeta mwoyi wende neawujimije; ewu udi ujimija mwoyi wende bwa bwalu Bwanyi neawupete, nealame mwoyi wende." Pa nanku twikalaayi—twikalaayi tuteeka byònsò bitudi naabi anu mu Mukalenge Yesu ne kutapuluka twètù biine ne bintu bya pa buloba, ne kuMweyemena Yèyè ne kwitabuuja Dìyì Dyende ne kwikala anu kutungunuka Nende Yèyè.

¹¹ Mpindyewu, kumpala mene kwa . . . Mpindyewu, leelu ewu, numfwilaayiku luse, ndi . . . Dyalumingu dishaale edi mvwa munulame mukungilù mule be pa cyena-bwalu aci cya bwobulume pankaci paa Nzambi ne bantu Bende. Kadi mpindyewu leelu mvwa mwele meeji ne nènùnùpàtùlè kumpala kwa dîbà leelu ewu, bwalu dyalumingu dishaale kuvwa bantu bààbùngì baa disambidila kadi nciyi mupete dîbà dya kwenzeja mulongo wa babeedi paanyima—paanyima paa bamane kujikija diyiisha to. Kadi—kadi ndi ngeela meeji ne bavwa baabanye twarta twa disambila mu dyalumingu dishaale anyi cintu kampanda bwa bantu, anyi nî ncinyi cyònsò, netubabiikile piikalabo mu citanda emu, ne, piikalabo kabayimu to, nansha bishi netusambile anu kusambila.

¹² Mpindyewu, leelu ewu ndi njinga kwakula anu pa cyena bwalu cya kukoleshaku naaci diitabuuja mu mushindu kampanda. Bikengela wènzè nanku. Pawikala wibaka . . . Piikalaku bambi mwaba ewu bu mudibi ne kakwena mpatà ne badipu to, mbamanye ne paudi wakula ne bantu udi ne cyuyùya kampanda cya diyiisha bwa lupandu, dîbà adi udi muswe kwenza dibiikila adi bwa cyòci aci. Ne pashiishe paudi muswe cyuyùya bwa dyondopa, udi—udi wanji kupeta dilaabiibwa wèwè mwine, ku Dìyì dya Nzambi, ne udifikisha kudi bantu, ne aci cidì citeeka cisumbu cyònsò mu kaabujima mu dilaabiibwa bwa cintu kampanda. Mbwena kwamba ne, mu dindila dya bintu kampanda ne myoyi yizuka. Nwamonu's, tudi mu dindila dya cintu kampanda.

¹³ Nenku nudi bamanye's, ndi ngiitabuuja dîbà adi ne, bwa kubàndishaku cyòci aci ndambu, cidì Nzambi mufikishe bònsò baa mu Ekeleeziya Wende mpindyewu, bàdì bashaale baa ku babiikidiibwe, baa Ekeleeziya Wende, mu dindila dya Dilwa Dyende ne myoyi yizuka, nwamonu's. Ndi mvuluka ku ciibi dîbà dya dilwa Dyende adi, kùvwa ne cya kwikala Diitànù

Dinsantu dya mikùùkùku paakamanyabo ne Yèyè uvwa ulwa ku difesto adi, mu dindila ne myoyi yizuka. Bààbùngì baa kudibo bavwa batekemene ne Yèyè neikaleku, bwa kumona cishima cya mushindu kampanda civwaYe mwa kwenza. Anyi, ne bamwe bavwa ne dijinga dya kuMumona. Bakwabo bavwa ne dijinga dya kuMwelulwila. Nenku civwa mmpaasaka wa mu—mushiilangane ne uvwaku kukaavwa ntanta mule awu, paakabwelaYe mu cimenga mubànde pa mpunda. Twikalaayi anu baMwindile bwa alwe katufila Kwetu, ne dîbà adi netuye. . . paalwaYe ewu musangu.

¹⁴ Mpindyewu twinyikaayi mitu yetu patudi twakula Nende apa. Mpindyewu mu bantu badi bateleja aba, piikalaku dilomba kana dyônsò dîdî muntu muswe bwa dimanyishiibwe kudi Nzambi, swaku wèlè anu cyanza cyebe muulu kudiYe, nenku, bu ne: “Nzambi, ikalaku naanyi luse. Ndi—ndi dijinga ne lupandu, ndi dijinga ne dyondopiibwa, ndi muswe nsòmbelu wa mutambe kuseemena pamwe Neebe.” Nzambi anubeneshe. Mmu citanda cijima.

¹⁵ Taatù wetu wa mu Dyulu, patudi tuseemena ku nkwaswa Webe wa butumbi wa ngàsà apa, mu Dînà dya Mukalenge Yesu, Yèyè Wàkatùtwàdila mwine ngàsà udi ukemsha ewu, mushindu mwine utudi tuKwela twasakidila ne myoyi yetu yônsò bwa Yèyè Uvwa kayi mpekaatu ne wàkapweka panu ne kutupetela lupandu awu, twètù bavwa katuyi bakumbanyine, bwa twètù biine bavwa katuyi bakumbanyine abu kadi bwa twamona mwa kuseemejiibwa pabwîpi Nende ku dyela dya Mashî Ende panshi, bwa Yèyè kutusukula ku mâyi a Dîyi ne kutuleeja kudi Tatw’Èndè bu mushikankunde virgo, mukezula, mujidila ku Mashî Ende, ne muvwijiibwe mwanyishiibwe ku mèsù kwa Nzambi, musukula ne mumana kulongolola. Patudi twela meeji ku disukula dya Mulambu awu, twela meeji ne paakaMumona Yone ubwela mu mâyi, wakaakula e kwamba ne: “Mêmè ngudi ukengela bwa kubatiijibwa kùdî Wèwè, kadi Wèwè udi ulwa kùndî mêmè bwa cinyi?”

¹⁶ Yèyè kwamba ne: “Twala bwalu abu, Yone, bwa bìikalè nanku.” Kaa, ndi munange aci. Mu ngaakwilu mukwabo ne: “Yone, wèwè’s udi muprofeta, Mêmè ndi Nzambi webe. Twètù ki bantu balombodi baa dituku edi. Ndi mumanye ne udi muumvwe, ne Mêmè ndi paanyi muumvwe. Kadi, vuluka, Yone, mbujitu butwimikila, mbikumbane bwa twètù kukumbaja bwakane bwònsò.” Yone, bu muvwaye mumanye ne Mulambu uvwa ne cya kusukudiibwa kumpala kwa kulambudiibwaWu, ne Yèyè awu ki uvwa Mulambu awu, ki yèyè kuMubatiiza, Yèyè uvwa kayi ne mpekaatu awu, mwikàle usukula Mulambu kumpala kwa kufidiibwaWu.

¹⁷ Nzambi, sukùlàku myoyi yetu mu dinda emu. Utusukuleku ne mâyi a Dîyi, bwa twamona mwa kudifila twètù biine kùdî Wèwè. Utusukuleku, Mukalenge, ku kupidya bwònsò, bwa

twamona mwa kuseemejiibwa pabwîpi Neebe bu mulambu udi ne mwoyi, wa cijila ne mwanyishiibwe kudi Nzambi, bwalu eci ki wetu mudimu udi ne meeji. Tudi tuKwela twasakidila bwa maalu aa. Twasakidila bwa muntu yônsò udi mwaba ewu. Ndi ndomba bwa Wêwè kubenesha Ekeleeziya munene wa buloba bujima wa Nzambi udi ne mwoyi, mu matunga ônsò ne mu nyungulukilu wa buloba bujima. Dinda edi didi bambi biimane mu cyambilu, ndi ndomba bwa Wêwè kupongolola Nyuma Webe, Mukalenge, mu mushindu wa cishima pambidi paa mpaasata yônsò wa lulamatu pa kaaba kende kaa mudimu, pambidi paa batangadiki, paa ba-missionnaires. Éyì Nzambi wa yaaya, pândi ngeela meeji kudibo pambelu pààpa, bamwe baa kudibo kabayiku nansha ne bisabaata ku makàsà to, bavwale mipanu mikulakaji mishaale anu biteetela pambidi, benda bàpaata mu meetu ne mu bisuku, bwa kutwadila aba badi kule ne Kilisto ditalala ne disungidiibwa.

18 Nzambi, tudi twamba ne: “Tùmakù Yesu lukasa. Lwâku, Mukalenge Yesu.” Nenku mpindyewu nyewu tumona bufuki, cimanyinu ciine cifwanangane ne mutooto wàkalombolà beena meeji ku Beetelema awu, mwikàle wenda wenda cyakabidi. Yesu wakamba ne nekwikale dipampakana dya bikondo, dikenga munkaci mwa matunga, bimanyinu mu maulu ne pa buloba, mbû ukungula, mvula minene ya bipupu ne mavwala a mbû ne dizakala dya buloba mu myaba mishiileshiilangane. Bintu ebi bidi anu. . .bidi ntushiba tudi tuteeka myoyi yetu yilubakana, Mukalenge, bwa twètù kumanya mwa kwikala badilongolole. Katwena bamanye ne mpa kasunsa kaayi anyi mpa dîbà kaayi padiYe mufwanyine kumweneka to.

19 Nenku bu mutudi tulwa leelu ewu, tudi tulomba bwa Wêwè kubenesha munsokontu udi paanyima paa cyanza cyônsò cidi cyela muulu. Nzambi, Wêwè ngudi mumanye byônsò pa bidi bicitangila. Ndi ndomba bwa Wêwè kubàsukula, Mukalenge, ne mulambu wabo ne dijinga dyabo, ne bwa kubapa bidibo naabi dijinga. Nenku patudi tulwa leelu ewu apa, Mukalenge, ndi ndomba ne piikalaku mwaba ewu aba badi kabayi baKumanye bu Musungidi, bwa edi diikalè dituku adi mene, dituku ditambe bunene adi dya mwoyi wabo, dyambilabo Mukalenge Yesu ne “eyo.” Enzaku nanku, Mukalenge.

20 Bàbènèshàku mpindyewu, Taatù, patudi tuteeta bwa kudilongolola bwa kufikisha bantu ku dipeta diitabuujja apa, mu kubala kwa Dìyì Dyebe. Nzambi, tumaaku Dìyì Dyebe ne bukole, mu citanda cijima emu, ne mu bitupa bya malaba mwaya mikaba ya mèyì, ne mu matunga meenyi, nî mpenyi pònsò padibi mwa kwikala, ne swaku bwa bààbúngì basungidiibwe ne bondopiibwe leelu ewu bwa butumbi bwa Nzambi. Tudi tulomba nunku mu Dîná dya Mwan’Ende munanga wa Cijila, Mukalenge Yesu Kilisto. Amen.

²¹ Tudi tulomba ne Nzambi asakidileku mabenesha Ende manenaanaale awu mpindyewu patudi tubala Dîyi Dyende apa. Nwavulukaayi ne, mêyi aanyi mêmè neapangile, ndîyi dya muntu, kadi Dîyi Dyende Yèyè kadyenaku mwa kupangila to. “Maulu ne buloba nebijimine kadi Dîyi Dyanyi kadyakujimina to.” Nдитекемена кааыпу дидику леелу еву’s we! Ndi ndyumvwa mwa kwimba pamwe ne Eddie Perronet ne: “Bônso sekelelaayi bukole bwa Dînà dya Yesu, banjelo bapone mikookwela; lwâyi ne cifulu cya bumfumu, nuMwase cifulu cya butumbi bu Mukalenge wa bônso. Pa Kilisto, Lubwebwe lushindame, mpândi mwimane; myaba mikwabo yônso ndunteka, mwaba mukwabo wônso.”

²² Mpindyewu, bwa bààbûngi baa kunudi bàdi bàbalà pamwe neetu ne bàdi bàjingà kufunda mifundu ayi, ne misangu mikwabo biikàle baleedila ku Mifundu yîndi mufunde mwaba ewu pa tubeji eyi, netubangile, netubale mu dinda emu mu Maataayi Munsantu 15.21.

Pashiishe Yesu wakuumuka mwaba awu, ne wakabwela mu mibangubangu ya Tiilà ne Sidônà.

Nenku, monaayi, mukaji kampanda wa beena Kaanàànà wakapatukila mu mibangubangu yimweyimwe ayi, ne wakambwela lubila, wamba ne: Ikalaku naanyi luse, Èyi Mukalenge, wèwè mwànà wa Davidi; mwanaanyi wa bakaji mmutacishûbwe bikole be kudi démon.

Kadi yèyè kaakamwandamunaku dîyi to. Ki bayîidi bende kulwa kumusengeleelabo, bamba ne: Mwiripate aye; bwalu nyawu wenda utulonda ne mbila.

Kadi yèyè wakandamuna e kwamba ne: Ndi mutumiibwe anu kudi mikooko mijimine ya nzubu wa Izaleela.

Pashiishe yèyè kulwa e kumukuukwilaye, wamba ne: Mukalenge, nkwaçishèku.

Ki yèyè kwandamuna e kwamba ne: Kî mbikumbane bwa kwangata dyâmpà dya bânà, bwa kudyelela tubwà to.

Kadi yèyè kwamba ne: Bulelela, Mukalenge, kadi’s tubwà tûtu tûdya . . . tusunsukila tudi tumate ku meesa a bamfûmwatû.

Dîbà adi Yesu wakandamuna e kumwambila ne: Wèwè mukaji, diitabuuja dyebe ndinene: bikwenzekele bu mùdi muswe amu. Ki mwanende wa bakaji awu kwondopiibwaye kubangila anu pa diine dîbà adi.

²³ Mpindyewu, mu dinda emu tudi baswe kwakula pa diitabuuja. Mpindyewu, cyena-bwalu cyanyi mu dinda emu cidi ne: *Disûminyina. Disûminyina* mbwena kwamba ne “kwikala—kwikala munanukile, kufika ku kiipacila.” Mpindyewu:

“Diitabuuja ndilenga dya bintu bitekemena, cileeji cya bintu bidi kabiyi bimweneka.”

²⁴ Tudi ne mubidi wetu, ne buumuntu bwetu panwapa budi bu mudi diminu. Ne diminu pambelu pààdi apu didi ne cizubu; munda mwa cizubu amu didi ne cizubuzubu, anyi musunya, numfwileku luse; ne munda mwa musunya awu mudi mutoloku. Mushindu awu ki utudi twètù: mubidi, musuuka, nyuma. Mpindyewu, ku mubidi kudi byumvwilu bitaanu: lumòndò, lulabulu, lulengu, lununku, ne luumvu. Ku musuuka kudi kondo kaa mwoyi, ne bikwabo, mìsèèsù yitaanu yìdì mwòmò amu ayi.

²⁵ Munda mudi cimwepele, mùsèèsù umwepele. Ne mùsèèsù awu ki mwaba umweumwe udi Nzambi muteekele muntu yònsò kubangila anu ku Adama ne Eva, budìswilè. Udi muswe kwikala ne mwoyi anyi udi muswe kufwa, eci anyi eci cyùdì muswe aci. Cidi ne, udi muteekiibwe pa bishimikidi bya budishikaminyi bwa disungula, ne nyuma yònsò ùdì ulekela ukukookesha awu ki wakwama mamuma awu, nsòmbelu webe neikale mukookeshiibwe kudi cidi munda aci. Ne diitabuuja . . . Pa nanku bantu bààbùngì batu beeyemene pa byumvwilu bitaanu bya pambelu ebi. Bidi anu bìmpè, katwena naabi cilumbu to, piikalabi bipetangana ne cyumvwilu ciisambombo eci. Musuuka ewu . . . nyuma ewu udi mwa kwikala anu wa mishindu yibidi, umwe wayì n’Nyuma wa Nzambi, mukwabo nnyuma wa dyabulu. Kwèna mwa kukwacila bamfumu babidi mudimu musangu umwe to. Anyi udi mudifile wèwè yònsò kudi umwe anyi udi mudifile wèwè yònsò kudi mukwabo. Kadi wèwè mwikàle ne Nyuma wa Nzambi munda mwebe, udi ne diitabuuja, ne newitabuuje Dìyì dyònsò didi Nzambi mufunde. Kadi wèwè kuyi naadi to, udi mufwanyine kwikala . . .

²⁶ Mpindyewu, dyabulu katu bu mudi bamwe bantu badyelela meeji ne, “ùtu mwena lwonji ne bikwabo byònsò” abi to, kadi yèyè utu mwena dishima. Dyabulu udi ukwelesha meeji ne udi mu bulelela. Kadi paudi kuyi witabangana ne Dìyì to, aci cidi cileeja ne kì n’Nyuma wa Nzambi to, bwalu Nyuma Mwîmpè ngudi mufunde Bible. Nenku dîbà adi bidi bikengela cìikalè ciitabangana ne Dìyì. Nenku vulukaayi ne dyalumingu dishaale edi, anu kaabupidya kakese kamwepele cyanaana ku Dìyì dya Nzambi. Eva, Sataana uvwa mumwambibile bulelela, ne yèyè kavwaku muvile ne Dìyì divwa dilelela to, kadi katupa anu kakese kamwepele cyanaana kaa Dìyì aku ki kadi katwale lutatu lwònsò elu. Mukaji wakabenga kuDiitabuuja bwalu ùvwa wenda ukebangana ne lungenyi pamutu paa kushaala ne Dìyì. Padi Nzambi wamba cintu kampanda, maulu ne buloba nebijimine kadi Dìyì Dyende kadyakujiminaku to. Dìyì dya Nzambi didi ne cya kuula ku katoba ne ku katoba. Anu too ne ku kafulu kiine kaa i ne katoba, Didi ne cya kuula.

²⁷ Mpindyewu, disuminyina, kwikala munanukile, kuteeta kufika ku kiipacila, kuteeta kucyenza, udi ne meeji ebe

mateeka pa cintu kampanda, ne udi—udi munanukilemu bwalu udi witabuuja ne ki cintu cyûdi muswe, ne mwitabuuje ne udi mwa kucipeta. Mpindyewu, [Mwaneetu Branham udi ùkèkema—Muf.] (Mfwilaayiku luse.) bwa kwikala munanukile, udi mwangate dipangadika mpindyewu bwa ciwikala mwa kwenza. Mpindyewu, kwêna mwa kwikala ne diitabuuja mu Nzambi kuyi mumanye Dîyi dya Nzambi anyi kuyi mumanye cintu kampanda pa bidi bitangila Nzambi to.

²⁸ Mpindyewu, muntu kampanda yêyè mukwambile ne: “Wêwè muye kalenga dikunji dyadya, newûmvwè bîmpè. Wêwè nyawu udi usaama.” Mêmè ncyêna mufwanyineku kwitabuuja aci to. Udi wêwè mufwanyine kucyenza. Kadi aci cidiku anu citambe kukola bwa dyanyi diitabuuja. Ncyêna—ncyêna ngiitabuuja ne mudi bukole kampanda nansha bukese mu dikunji dyadya to, anu mûndi nciyi ngiitabuuja ne mudi bukole kampanda mu lupingu anyi mu cilupingu anyi mu kankuruse, anyi mu cintu kampanda cya mushindu awu.

²⁹ Ndi mêmè ngiitabuuja ne bukole budi mu Kilisto, ne Kilisto n’Dîyi. “Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi. Ne Dîyi dyakawijiibwa mubidi ne dyâkasômbela munkaci mwetu.” Mpindyewu, Dîyi Dyôdi diine didi dyalukila mu mmwenekelu wa Nyuma Mwîmpè, dibwela munda mwetu, ne Cidi n’Dîyi munda mwebe. Nzambi munda mwebe. Bààbûngî batu baswe kufunkuna Nzambi bu cintu kampanda cya cisokome ciikàle kule menemene, anyi kule kwa menemene mu mushindu wa bôbò biine bapita baya ne kwa naka bwa kucipeta. Nzambi udi munda mwebe. Ditekemena dya Butumbi, Kilisto, meeji avwa munda mwa Kilisto awu, munda mwebe wêwè. Wêwè udi wolola cyanza ukacipita uya kule menemene, uteeta bwa kupeta cikaadibo bamane kukupa. Nzambi, mu muntu! Cyônsò. . .

³⁰ Kilisto, pavwaYe pa buloba, ùvwa mubidi wa Nzambi. Nzambi nguvwa mufuke mubidi ewu. Ùvwa mmubidi mushiilangane, kadi nansha nanku ùvwa mmubidi wa buntu. Nudi bamanye ne, Solomo wakaMwibakila nzubu kampanda. Kadi Stefano wakamba ne: “Kadi paabi Mutambe bunene wa mu Dyulu katu ùsômbela mu nzubu myenza ku byanza to, kadi Wêwè wâkandongolwela Mêmè mubidi.” Mpindyewu, Nzambi wakaDilongolwela mubidi mu mmwenekelu wa Mukalenge Yesu, ùvwa mwikàle Kilisto, mwikàle umvwija ne Mulaaba maanyi awu. Nenku, mpindyewu, cyônsò civwa Nzambi aci, civwa munda mwa Kilisto, Yêyè uvwa kaabujima kaa Bunzambi mu ciikadilu cya mubidi. Ki cidi Mufundu wamba. Mpindyewu, ne cyônsò civwa Nzambi aci, Wakacipongolola munda mwa Kilisto. Yêyè uvwa Emanuwele, Nzambi neetu!

³¹ Ne cyônsò civwa Kilisto aci, Wakacipongolola munda mwa Ekeleeziya. Nciniyi aci? Mulaaba maanyi, bwa kutungunuka ne mudimu Wende bwa Dîyi Dyende kwikaladi ne mwoyi ku

musangu ne ku musangu. Yèyè uvwa ne mwoyi ku Dìyì dya Taatù. “Muntu kaakwikala ne mwoyi anu ku dyàmpà nkaayaadi to, kadi ku Dìyì dyònsò didi dipatuka mukana mwa Nzambi.” Nenku Ekeleeziya kèna ne mwoyi ku dyàmpà nkaayaadi to, kadi ku Dìyì dya Kilisto. Ne Nyuma Mwimpè udi ubwela ne wangata Dìyì dya Kilisto ne uDivwija cyenzedi cidi ne mwoyi leelu ewu. “Bimanyinu ebi nebifile badi biitabuuja.”

³² Nwamonu’s, Nzambi kèna mwa kushintulukaku to. Bu Nzambi mwa kwangataku dipangadika, bidi bikengela dishaale anu mushindu awu. Yèyè mushintuluke, apu kaayi’s Ùkaadi muntu anu bu mèmè kunu, Yèyè—Yèyè’s ùkaadi anu muntu wetu ewu udi mwa kutupakana awu. Kadi Yèyè utu kayi mikalu! Pa nanku, ne Yèyè udi kayi mikalu ne Yèyè—Yèyè ngwa bukole bwònsò, ne Yèyè kèna mwa kutupakana kadi kwikala Nzambi nansha. Pa nanku Dyende dipangadika dya kumpala. . . Pààkenzà muntu mpekaatu Yèyè—Yèyè wakamufwila luse mwimanyine pa kwitabuuja kwa Dìyì Dyende. Muntu mwibìdì udi ulwa, bikengela Yèyè ènzè mu mushindu umweumwe awu bwa cyanaana Wakenza bibi paakenzaYe musangu wa kumpala apu. Piikalabi ne muntu kampanda wakondopiibwa ku dyondopa dya kudi Nzambi, ku diitabuuja Nzambi, piikalabi ne Wakenzela muntu wa kumpala aci, muntu mwibìdì yèyè mulwe, bidi bikengela bwa Nzambi ènzè mu mushindu umweumwe awu piikalabi ne bidi pa cishimikidi cimwebimwe aci. Yèyè kayi mwenze nanku to, Ùdi usunguluja bantu ne mmuleeje kansungansunga, cìdì bulelela kaciya cifwanyine kwenza ne Yèyè ikale Nzambi nansha. Nwamonu anyi?

³³ Bikengela wikale ne diitabuuja mu cyùdì wenza. “Ne piikalà mwoyi webe kawuyi utupiisha to.” Patwikala bamanye ne Bible udi utulongesha cintu kampanda kadi twètù tupangila kwenza cyòcì aci, dìbà adi kudi cintu kampanda mutudì katuyi mwa kuteekela diitabuuja. Nwamonu’s, kwèna—kwèna mwa kubumbakaja lungenyi, bwalu udi mumanye ne kudi bintu kampanda muntwamu bidi Nzambi ulongesha, byùdì kuyi muswè kukumbanangana naabi to. Ne paudi wenza aci, dìbà adi udi penyi? Udi umona’s, kwèna—kwèna mwa kwikala ne diitabuuja pa cyùdì ulumbila aci to. Kwèna mwa kulwa apa kwamba ne: “Mèmè—mèmè—mèmè, makeelela diloolo mvwa mupatuke mukwacike maala, nenku, Mukalenge, ndi muswe bwa Wèwè kungondopa mu dinda emu. Mèmè—mèmè, ncyà—ncyakunwaku kabidi maala mapitepite bùngì to.” Bikengela udilambule wèwè mwine, bikengela udifile wèwè yònsò nkòong kudi Nzambi. Bikengela wèwè kutumikila kantu ne kantu kaa Dìyì. Udifile wèwè yònsò nkòong ne pashiishe wangate Dìyì. Dìyì adi didi mu ekeleeziya. N’Dìyì didi ne mwoyi.

³⁴ Bible mmwambe ne: “Dìyì ndimiinu dyàkayà mummyaminyi bwa kumyamina.” Mpindyewu, kwèna mwa kumyamina mpoopu kadi kutekemena bwa kupeta blé to. Wèwè mummyamine blé, udi

unowa blé. Wêwè mummyamine mpoopu udi unowa mpoopu. Pa nanku, bikengela wikale ne Dîyi dya Nzambi.

³⁵ Nénku mwena kwitabuuja nansha umwe kaadyakuteekaku Dîyi dya Nzambi mu mwaba kampanda mu matuku mamane kupita, kaadyakuMuvwijaku Nzambi wa kalendalenda anyi wa maalu malonda—wa maalu malonda nansha. Yêyè n’Nzambi wa maalu malonda, mu bushuwa bwa bwalu, kadi “Yêyè udi umwèumwè awu,” mudi Bible mwambe, Ebelu 13.8 ne, “umwèumwè awu makeelela, leelu, too ne kashidi.” Ki bwa cinyi, anu muvwaYe mu maalu malonda amu, ki mudiYe leelu ewu. Yêyè kèna mwa kujimijaku bukole Bwende to. Nénku mwaba udi butekete busanganyibwa ngwa ne bwòbò bwakamata mu ekeleeziya yetu, ku cibangidilu, mu ekeleeziya wa ku cibangidilu wa bapostolo. Kadi citudi benze ncinyi? Tudi babange kwangata ekeleeziya awu kukosolola bwobumwe ne kuvwiya bantu tusumbu tusumbu ne malongolodi mashiilangane a dikosololangana, too ne mutwalu kucifikisha ku cimvundu cinene cya cintu cyanaana. Twalukilaayi ku Dîyi! Twalukilaayi kudi Nzambi! Twalukilaayi ku Dîyi didi ne mwoyi!

³⁶ Piikalà Bible awu kayi upatula cyònsò cidiYe wamba ne ki cidiYe to, pa mulayi ne mulayi wònsò, ncyèna mpeti diitabuuja mu Yêyè to. Kadi Dîyi mene dya nzanzanza didi dyambe ne, “Lwâyi kûndi Mémè nwênù bònsò badi ne mudimu mukole ne badi ne majitu makole” adi, pântù mémè muDiteete, divwa bulelela. Dîbà adi Edi nunku n’Dîyi anyi Kî n’Dîyi? Piikalabi ne Dyòdi edi n’Dîyi, s’bidi bikengela Dipatule cyònsò cyakalayaDi aci. Kabiya nanku to, nanku didi. . . Cidi cya bushuwa ne cidi cya mashimi ki cyèpi? Anyi Cyònsò n’Dîyi dya Nzambi, anyi nansha cimwe cya ku byòbì abi kaciyena Dîyi to, bwanyi mémè. Anyi kî nansha cimwe to anyi cyònsò, eci anyi eci. Pa nanku mémè ndi nDiitabuuja, kanungu ne kanungu kònsò, mulongo ne mulongo wònsò, cimanyinu ne cimanyinu cyònsò cya mu difunda, kakoselu ne kakoselu kònsò, katwangaji ne katwangaji kònsò, ndi mémè ngiitabuuja ne cintu cyònsò mu kaabujima n’Dîyi dya Nzambi. Ndi nkudikaKu musuuka wanyi!

³⁷ Kî nkulenga kwa dikunji, kulenga kwa cintu kampanda cikwabo, anyi kwa dibaya kampanda dya bimfwanyi, anyi kwa muntu mulume anyi muntu mukaji kampanda to; mémè ndi ngitabuuja kulenga kwa Nzambi mu kwitabuuja kwa Dîyi Dyende, ku diitabuuja. Dîbà adi paudi wenza aci, Dîyi adi didi dishaala mwoyi munda mwebe, Dîyi ditòlwesha. Nénku kantu ne kantu kaa Dîyi dya Nzambi nkatòlwesha. Cintu cimwepele ncyà ne, udi wangata dyanza dya blé ne ushaala mudikwate mwaba ewu pa cibumba cya ku cyambilu apa, kaakwenzaku cintu nansha cimwe pa kushaalye mwaba ewu to. Bidi bikengela abwele mu buloba. Kabiya anu mu buloba cyanaana to, kadi mu buloba bwa mushindu mujaalame bwa kumukwacisha. Dîyi dimpè dyòdi dimate mu buloba bwatuke, neditwale bya pa

madimi byatuke. Wèwè mwangate ntete mîmpè muyélè mu buloba bwîmpè, mu mushindu mwîmpè neyikwame lukama pa lukama. Ki mudi kabidi Dìyì dya Nzambi padiDi dibwejiibwa mu mwoyi wa muntu, mwikàle ne diitabuuja, diitabuuja didi kadiyi difwa to mu Mukalenge Yesu Kilisto, ne Nyuma Mwîmpè ne bukole bwa Nzambi mwòmò amu bwa kuDimyamina màyi, Dyôdi neditoloshiibwe ne nedikwame byônsò bitùDi dyambe ne neDikwame abi. N'Dìyì. N—N'Dìyì dya Nzambi.

³⁸ Yesu wakamba, mu Yone 14.12 ne: “Ewu udi ungiitabuuja Mêmè, byenzedi bìndi Mêmè ngenza yêyè neàbyènzè pende.” Mona’s, s’ncya bushuwa! Mêmè ndi ngiitabuuja aci. “Byenzedi bìndi Mêmè ngenza ebi,” nkudimwinu mujaalame wa cyôci aci, “nenwènzè byàbûngì bipite ebi.” Mwòmò amu badi bamba ne: “Nenwènzè binene bipite ebi.” Kwèna mufwanyine kwenza binene bipite to; Yêyè wakiimanyika bufuki, Wàkabiîsha bafwe, Wàkenza bintu byônsò. Kadi, mu ngaakwilu mukwabo, Nzambi uvwa mumweneshiibwe mu Muntu umwepele, Kilisto, mpindyewu Yêyè mmumweneshiibwe buloba bujima mu Ekeleeziya Wende. “Byàbûngì bipite ebi,” byenzedi anu bimwebimwe abi.

³⁹ Muntu kampanda uvwa ungambila matuku abidi adi panshi aa, bwa kudyulaku ndambu, wamba ne: “Byenzedi bitambe bunene,’ mmwakambaYe, ‘nenwènzè.’ Twètù’s tudi twenza byenzedi bitambe bunene abi.”

⁴⁰ Mêmè kwamba ne: “Anji enzaayi bidi bitambe bukesa kumpala kwa nwênù kwenza bidi bitambe bunene. Ndeejaayi anu byenzedi bidi bitambe bukesa biine abi.” Udi mwa kuDivwija, kuDikonyangaja ne kuteeta kuDyambishisha cintu kampanda, kadi nansha nanku Didi dishaala anu dimwedimwe adi. Kadi udi utangila muntu kana yônsò udi ne diitabuuja dikumbane bwa kwitabuuja cyôci aci, Dyôdi nediDimweneshe anu mushindu umweumwe wàkacyènzà Nzambi awu. Mpindyewu tudi ne bintu bipite bûngì leelu ewu mu masaluka ne bikwabo, aci ne bintu kampanda. Mêmè ncyèna ne cintu nansha cimwe cya kwamba bwa kubilwisha to, aci cidid anu pankaci paa muntu yêyè nkaayende ne Nzambi.

⁴¹ Kadi bwanyi mêmè, dîyì dyônsò, cyenzedi cyônsò, bidi bikengela bwa cifumine mu Bible ewu. Bidi bikengela ciikale Dìyì dya Nzambi, dîbà adi ndi mmanya ne Cyôci aci ncilelela. Piikalà Nzambi, Bible, ucitwa nyama ku mikolo wamba ne ncilelela, ne mulayi, dîbà adi m’Bulelela. Mmuntu kampanda udi mupete diitabuuja, udi mwimanyine mwaba awu pa Dìyì adi ne mwikale uDivwija cyakabidi ne mwoyi. “Yesu Kilisto umwèumwè awu makelela, leelu, too ne kashidi.” Patudi tumona aci mu mulayi wa Nzambi, dîbà adi tudi mwa kwikala basuminyine. Tudi cya bushuwa mwa kwitabuuja, kushaalapu bwalu mmulayi wa Nzambi. Shaalaayi anu naawu nansha

wôwò mwa kunenga mukùngùlù bule kaayi, newucimweneshe patooke.

⁴² Nudi bamanye's, Yêyè wakaakula musangu kampanda bwa lutete lwa mùtâdâ, anyi diitabuuja difwanangane ne lutete lwa mùtâdâ, ludi lutambe bukese alu. Dimiinu dya mùtâdâ didi dibadiibwa mu mamiinu adi matambe bukese àtùku pa buloba leelu ewu. Kadi ditu bishi? Kadyakusambakanaku ne cintu nansha cimwe to. Dimiinu dya mùtâdâ kadyakusambakanaku ne dikwabo nansha dimwe to. Udi mwa kwangata shù ne mbokâ, ne kwenza bilàngâ ne bikwabo, ne udi mwa kupatula bintu bishiileshiilangane bintu kusambakaja kwa mamiinu. Kadi mùtâdâ wôwò kawutu usambakanaku to, batu bangambila ne kwêna mwa kuwusambakaja ne cintu nansha cimwe to. Wôwò mmùtâdâ, ne udi ushaala anu mùtâdâ.

⁴³ Nenuk padu muntu wangata Dîyî dya Nzambi, nansha diitabuuja adi diikâle dikese dya bishi, kadi piikaladi kadiyi disambakana ne bupidya nansha bukese to, nedimupatule dimufikishe ku Bukênkè. Bamwe baa kutudi batu ne diitabuuja dinene diikalâ anu mwa kwenza bishima. Bakwabo badi ne diitabuuja didi anu bwa kushaala kacya baakwata too ne padi bwalu bwenzeka. Kadi dyôdi diikâle diitabuuja dishuwashuwale, paudi anu ukwataku, kakwena cidî mwa kukunyungisha ne kukutuulaku to. Kadyakusambakanaku to. Dîbâ adi muntu awu mmunanukile. Udi ne disuminyina. Nansha bantu bûngî kaayi bambe ne: “Matuku a bishima akaadi mamane kupita,” yêyè kêna uciitabuuja to. Ûdi ùshaala anu kacya wakwata bwalu mmuukumbaje mishingâ ne mupwekeshe Dîyî adi munda mwa mwoyi wende wa diitabuuja ùdi ùdiitabuuja awu. Ûdi ushaala anu mwaba awu.

⁴⁴ Ntu mucimanye. Nkaadiku mumone kansere kenguludi kaa tubulu twa mashi kuumuka pambidi paa bantu, ne bampudimaci, tumama, ne bampofo, buloba bujima, mu nyungulukilu wa buloba bujima, bafwe babiishiibwa, ne ndi mumanye ne ncilelela. Cya bushuwa's! Byênzela mudimu pa cikeena-kumona, mu bushuwa bwa bwalu, dîbâ adi's wêwè udi umanya. Dîbâ adi udi umanya cidî diswa dya Nzambi. Kwêna mwa kukwata mudimu paudi kuyi mumanye diswa dya Nzambi to. Mulayi mu Bible mwikâle ukwambila cintu kampanda, aci's n'Dîyî dya Nzambi. Pashiishe Yêyè udi waluja Nyuma Wende mu ekeleeziya mu mapâ, bwa kuDimwenesha anu bwa kukebulula ne kuumusha tuumaalu tukese tudi tutapululangana atu ne bikwabo, bwa kuDivwija Yêyè mwine mulelela munkaci mwetu. Kaa, citudi, mmunyi mutudi bafwanyine kulomba cintu kampanda cishiilangane, nwamonu anyi? padiYe ulwa kutudi ne uDimanyisha, mwikâle muDisunguluje anu menemene, Nzambi munkaci mwa bantu Bende.

⁴⁵ “Katanci kakese aka baa pa buloba,” buloba, kudi mwaku wa cyena Ngelika, *kosmos*, ùdi ùmvwijâ “ndongolwelu wa

buloba.” Neapweke ne mâyi. Ndongolwelu ne ndongolwelu yônsò wa buloba udi ne cya kupweka ne mâyi, ditunga dyônsò dîdî dikòòkesha kudi Sataana. Ki citùku misangu yônsò ne ki ciikalaku misangu yônsò, pa kuumusha Izaleela, paakashaalabo ditunga apu. Sataana wàkabàndisha Yesu ku lusongo lwa mukuna, kwambaye, kuMuleejaye makalenge a pa buloba, ônsò àvwàku ne àvwà mwa kulwa awu, kwambaye ne: “Nên—nênKupèèshèwu bu Wèwè mwa kupona panshi ne kunkuukwila.”

⁴⁶ Yèyè kwamba ne: “Katuka apa, Sataana.” Ûvwa mumanye ne Yèyè nguvwa ulwa mupyanyi wawo mu Bukalenge bwa bidimu cinunu. Kadi ônsò...Ngâkiimanakù mwaba uvwa ba-Pâlò musangu kampana bakookeshile buloba, buloba bumanya, kadi bivwa bikengela wèwè kuumbula too ne mu mètres dikumi mwinshi mwa buloba bwa kupeta makalenge abo miine awu, nkwaso yabo ya bumfumu miine yivwaboku bàsòmbe ayi, ba-Césars baa Loomo ne—ne ba-Pâlò baa Ejipitu, bintu biine byônsò ebi. Kadi bu buloba ne cya kutungunuka, mushindu awu ki wikala kabidi miine mingalaata eyi. Kadi kudi...cidibo bônsò bàleeja ki cinyi? Cintu kampana mu mwoyi wa muntu citeeta bwa kupeta bwobumwe abu.

⁴⁷ Kadi bu nwènù anu mwa kubandulukaku, bwobumwe budi bufumina kudi Nzambi, bukole bwa Nzambi. Pàdî mwena kwitabuuja, bufuki bùdî pa buloba apa bwakafuka Nzambi ebu, mu bwobumwe ne Nzambi, dîbà adi kudi kulwa bwobumwe kampana bwikàle bufila diitabuuja. Nenku padi muntu umona aci, udi ushaala munanukile, muntu nansha umwe kaakumunyungisha to.

⁴⁸ Yesu wakamba mwine mwaba awu ne: “Byenzedi bìndî Mêmè ngenza nenùbyènzè peenu. Katanci kakese aka baa pa buloba, *kosmos*, kabaakuMmona kabidi to.” Aci nndongolwelu wa buloba: “KabaakuMmona kabidi to.”

⁴⁹ Bidimba byàbûngî bya ekeleeziya, bantu balenga biikàle baya mu ekeleeziya, biikàle ne nsòmbelu mwimanyine pa meeji awu a ne badi anu bìmpè. Mona’s, kwèna bìmpè ne bwalu nyawu udi cidimba cya ekeleeziya to. Wèwè udi mwena mwabo. Udi mufwanyine kuteeta kwenza cidi cîmpè, kadi, mulunda wanyi, lekela nkwambile ne, udi ne cya kulediibwa cyakabidi. Kwèna ubwela mu Ekeleeziya, kwèna ubwela mu Ekeleeziya ku dilabulangana dya ku cyanza to, kwèna ubwela mu Ekeleeziya ku buumambala bwa ekeleeziya to. Udi ubwela mu Ekeleeziya ku dilediibwa.

⁵⁰ Mêmè ndi mu famiye wa ba-Branhams kukaadi bidimu makumi ataanu ne bibidi, kabavwaku bandombe bwa mêmè kudivwija mwena famiye awu bwa dînà dyanyi kuvwijiibwadi Branham to. Ntu mulediibwe mu famiye wa ba-Branhams. Mêmè ndi Branham nku dilediibwa.

51 Nenku mushindu awu ki wûdi mwena Kilisto, ku dilediibwa, paudi ulediibwa ku Nyuma wa Nzambi. Munanukile! Eyowa's, ki paudiku mwa kukumbaja cintu kampanda mpôpô apu. Bantu bônso munda mwa bikondo bâkaadikù anu bakumbâne bwa kukumbaja cidi. . . Mbananukile piikalabo—piikalabo ne diitabuuja mu cidibo baswe kukumbaja aci. Mbilondeshile cidi cyenzi cyebe cya bulobo. Mbilondeshile cyûdi uteeta kwenza, mwikàle munanukile anyi kuyi munanukile, mbûngi bwa diitabuuja dyûdi naadi mu cyûdi wenza. Tudi ne cya kwikala ne diitabuuja mu Nzambi. Tudi ne cya kwitabuuja Nzambi.

52 Ndi ne Mifundu bûngi cyanaana mifunda mwaba ewu yîndi muswe kuleedila. Mpindyewu, piikalà muntu muswe kwikala munanukile, nanku yêyè—yêyè bidi bimukengela kwikalaye dyambedi ne cintu kampanda ciikalà mwa kumupa diitabuuja mu cidiye wenza aci. Mpindyewu tudi tuvuluka, dyambedi, Bible udi utwambila ne Yesu Kilisto udi umwèumwè awu makeelela, leelu, too ne kashidi. Mpindyewu, vulukaayi aci. Nzambi, pavwa Kilisto pa buloba, Wakamba ne: “Byenzedi bîndi Mêmè ngenza nenûbyênzè peenu.” Maako 16, mmwambe ne: “Ndaayi pa buloba bujima.” Mêyi a ndekeelu àkapà Yesu ekeleeziya. Teelejaayi.

53 Mudimu wa nzànzànzà wakatumaYe naawu Ekeleeziya Wende, ùvwa ne, baye mu bimenga byônso kumpala kwa kulwaYe, Maataayi 10, ne bwa “kwondopa babeedi, kukezula beena nsudi, kubiisha bafwe, kwipata badémons, ne bu munudi bapete cyanaana, nwapeeshanganaayi cyanaana.” Mudimu Wende wa nzànzànzà mutuma naawu Ekeleeziya uvwa ngwôwô awu.

54 Mudimu wa ndekeelu, anyi mêyi a ndekeelu apatukile ku mishiku Yende pàakabàndàYe, too ne paalwaYe cyakabidi ne lubila, ne Dîyi dya Mwarkanjelo, Yêyè wakamba ne: “Ndaayi pa buloba bujima, nuyiishe Evanjeeliyo kudi cifukiibwa cyônso. Ewu udi witabuuja ne ubatiijiibwa neasungidiibwe. Ewu udi ubenga kwitabuuja neapiishiibwe, ne. . .” Ne mmutwangaji, utwangaja cyambilu cyenu aci cidi eku ne cidi eku. “Ne bimanyinu ebi nebifile badi biitabuuja. Mu Dîna Dyanyi bôbô nebiiipate badémons, nebaakule mu myakulu mipyamipya. Bôbô bakwate nyoka ne byanza anyi banwe bintu bidi bishipanganà, kabyakubenzela bwalu to. Bôbô batentekele babeedi byanza, babeedi nebasangale.” Bible mmwambe ne: “Baakapingana benda basanka, Mukalenge mwikàle ukwata naabo mudimu, ushindika Dîyi ku bimanyinu bivwa byenda bilonda.” Nwamonu anyi? Bavwa ne. . . Bavwa bananukile mu cyôci aci bwalu bavwa ne cintu kampanda cya dikumbaja. Bavwa ne mudimu wa buludi mubatuma naawu. Mudimu mubatuma naawu awu uvwa ne cya kuya too ne penyi? Too ne pa buloba bujima, kudi

cifukiibwa cyônsò. Nkongo bûngì kaayi? Lukongo ne luongo lwônsò, cifukiibwa cyônsò.

⁵⁵ Peetelo wakamba, Dituku dya Mpenta ne: “Nyingalalaayi, muntu ne muntu wa kunudi. Nubatiijiibwe mu Dinà dya Yesu Kilisto bwa dilekelediibwa dya mpekaatu nenku nenupete kupa kwa Nyuma Mwîmpè, bwalu mulayi udi kunudi ne kudi bâna beenu balela ne kudi aba badi kule, mu bûngì bwônsò bwabiikila Mukalenge Nzambi wetu abu.” Mmunyi mùdi mwa kwangata Nyuma Mwîmpè ne bukole bwa Kilisto kubiteeka paanyima pale mu lukongo kampanda (luswe kwikala lwa kalekale ne kaleela) lwa paanyima pale pàapa mu lukongo kampanda lwa kale? Nzambi’s uvwa mumanye ne nebâmbè cyôci aci. Ki bwa cinyi Yèyè wakamba ne: “Ncyakunushiya kanuyi busambi nansha. Nêndombè Taatù bwa anutumine Musambi mukwabo, Nyuma Mwîmpè. Katanci kakese aka baa pa buloba kabaakuMmona kabidi to, kadi nwênù nenuMmone bwalu Mêmè. . .” Ne *Mêmè* mmupinganyi muleeji muntu. “Mêmè nêngiikalè neenu, ne munda mwenu mene, too ne kundekeelu kwa dikumbana dya maalu ônsò.” Amen. Yesu Kilisto umwèmwè awu makeelela, leelu, too ne kashidi. Nzambi musòmbèle mu Ekeleeziya Wende, mu bantu Bende.

⁵⁶ “Ndingumba kaayi adi, Mwaneetu Branham?” Yèyè kêna udyangana mukana pa bidi bitangila dingumba to. Nzambi udi ukwata mudimu ne bantu nkaaya. Mulume yônsò, mukaji yônsò, mwâna wa balume anyi wa bakaji wâMwitabuuja awu. Nansha mwikàle wa dingumba kaayi, Yèyè cidiye wenda ukebangana naaci mmyoyi yìdi ne nzala.

⁵⁷ Mpindyewu, munanukile, ùteeta bwa kukumbaja cintu kampanda. Bantu bônsò munda mwa bikondo byônsò bavwa anu mushindu awu. Mpindyewu tudi twangata, cileejilu, Noa. Noa uvwa munanukile bikole paanyima paa yèyè mumane kupeta diswa dya Nzambi.

⁵⁸ Bidi bikengela bwa wèwè kwanji kupeta dyambedi diswa dya Nzambi. Mpindyewu, bidi bikengela bwa wèwè kupeta diswa dya Nzambi mu dinda emu, bu mudibi ne udi ulwa bwa bakusambidile, bidi bikengela bwa wèwè kupeta diswa dya Nzambi, bwa ne ndiswa dya Nzambi bwa kukwondopa anyi kî ndyôdi. Ne cintu cidi cìlondà cidi cìkèngelà wèwè kwenza, pawikala ulwa bwa kupeta lupandu, bidi bikengela bwa wèwè kujandula ne ndiswa dya Nzambi bwa kukusungila anyi kî ndyôdi. Cintu cya kumpala cidi cìkèngelà wèwè kujandula, ncidi diswa dya Nzambi. Ne pashiishe, pawikala bulelela mupete dimiinu munda mwa mwoyi webe, dîbà adi udi mwa kwikala munanukile. Kakwena cyàkunyungishà to. Nansha muntu mwena lungenyi muteete kwamba ne: “Kabyena nanku to, ne kî n’*cikampanda* ne *cikansanga* ne *cikankenga* to,” kacyena cikunyungishaku to nansha kakese, bwalu wèwè udi mumanye cidi diswa dya Nzambi. Yèyè mmwakule mucyâmbè mu mwoyi

webe, diitabuujja dyebe ndisòmbe mwaba awu ne nedishaale anu kacya dyakwata nansha kakuyi dya dipite pa dimiinu dya mùtâdà ku bunene to. Nedikupatule ne nedikufikishe pa—pa kaaba mene. Diswa dya Nzambi. Eyowa's.

⁵⁹ Noa, paanyima paa yêyè mumane kuumvwa Dîyì dya Nzambi dimwambila ne nekwikale mvula mulwe, wâlwa's we, numfwileku luse, uvwa ne cya kubutula buloba, bufuki buvwa mwa kwenza bikàsà. Yesu kaakambaku ne: "Anu bu mwakadibi mu matuku a Noa, ki mwikalabi kabidi ku dilwa dya Mwânà wa muntu" anyi? Bufuki buvwa mwa kutomboka, ne nyewu tucimona leelu ewu.

⁶⁰ Ndi muswe kwimana kaaba aka bwa katanci kakese. Pâmvwà mbwela mu Bombay, mutuvwa . . . Mukalenge mutupe musùmbà wa bantu wa mutambe bunene wa kacya twâpeta, bantu binunu nkama yitaanu musangu umwe, baa diyîisha. Kuvwa katupa kaa cibejibeji kâmvwà mbala, kamba ne: "Kùdì, ee, dizakala dya buloba didi ne cya kwikala dijike." Bamba ne: "Ndambu wa matuku kumpala kwa dizakala dya buloba kwenzekadi, byònsò . . ." Mu Inde bantu mbapele, bapele baa menemene. Batu biibaka mpangu yabo ne mabwe, ne bikwabo. Ki tunyuunyi tukese atu kubuukatu e kupatuka mu maswa àtù kuya mu madimi ne kwikila mu mici. Ngombe yìvwà miimanyine pabwîpì ne bimanu ne tuleyi ayi, kupatuka e kuyayi mu budimi mu muunya mukole awu, kayiciyi miswe kusòmbela mu ditalaja to. Yikaavwa anu miimanyine mu muunya amu. Kabavwa bamanye ne cintu cya pabwaci eci civwa ncinyi to. Pashiishe, dyakamwe, dizakala dya buloba adi kunyukushadi bimanu abi e kubyupula, kuupula tuleyi. Bu ne tunyuunyi tukese atu tuvwamu, nunku's ntufwe. Bu ne ngombe ayi yivwa miimanyine mwinshi mwa byòbì abi amu, nunku's mmifwe.

⁶¹ Kanwenaayiku numona Nzambi umwèumwè wâkadimwija nyuunyi ne nyama mu matuku a Noa awu anyi? Kadi mbwa cinyi bunudi nwênù baswe kuciinyika dînà ne ndidyanjila kuumvwa, anyi cyònsò cinudi baswe kwamba aci, mushindu wakakwata Nzambi mudimu ne nyuunyi eyi awu? Yêyè nguvwa muyipe disakiibwa bwa kubuuka kupatukayi mu cimanu aci ne kupanduka ku cintu aci kumpala kwa kudikumaci. Nudi nwela meeji ne Nzambi utu wela meeji makumbane bwa mushààmushà bwa kuwupatula mu cimanu aci, mmushinga kaayi unudi nwênù naawu kupita mushààmushà awu? Yêyè's mmumanye mwa kukuba badi Bende Yêyè.

⁶² Mwaneetu wa bakaji udi mulaadika pa kalaalu kadi apa aka ewu, kalaalu kaa dyambwila babeedi aka, piikalabi ne Yêyè utu udiisha mushààmushà ne uvwadika budimi ne bisoosa, kadi netwâmbè bishi mudiYe wela meeji bwebe wêwè! Mmushindu kaayi wûdì wêwè ewu mwa kwikala mupite mushààmushà? Ikala ne diitabuujja kudi Nzambi kuyi utangila njiyà anyi nî mbinganyi byònsò to. N'Diyi dya Nzambi. Wêwè udi uDikwata

ne ushaala kacya wâlamata ku Dyôdi. Cya bushuwa's! Nenku wikale munanukile, uDiitabuuja, ushâala anu kacya wâlamata ku Dîyî Dyende.

⁶³ Nenku paanyima paa dizakala dya buloba adi dimane kwimana, tunyuunyi tukese atu twakabuuka e kwalukilatu, tubuuka tukabwela mu myaba yatu ayi ne kwenzatu bwa mabwe àtù awu ikale makwate, anyi myaba yatu mu mabwe amu cyakabidi, ne twakiibakulula diswa dyatu; ngombe.

⁶⁴ Nzambi umwèumwè uvwa mu matuku a Noa awu. Noa! Ee, wêwè udi wela meeji ne maalu a mamanya ngavwa mafwanyine kwikala mamwambile... Bôbò abu's bavwa ne maalu a mamanya manene mapite adibo naawu mpindyewu aa. Bavwa mwa kwenza bintu binene bipite bidibo mwa kwenza mpindyewu ebi. Bavwa—bavwa ne mpenci uvwa uvwija bintu ne mmwènekeli mupwàngâne too ne leelu ewu. Bavwa ne manga a kwela citalu kaciya cibola to mu mushindu wa ne bavwa mwa kwenza bitalu bilama ne manga. Twétu katwenaku mwa kwenza ciine aci leelu ewu to, ki mudibo bangambile. Pashiishe ne cikwabo cintu, bavwa biibaka cipaapu cya musaka. Udiku mufwanyine kwibaka cipaapu cya musaka leelu ewu ke nganyi? Mabwe manenaanaale awu kuntu kwaka àvwà miimane kwaka àa ne mêmè kutangila kuulu kwaka e kumona lupingu lwa ntambwe wa mutu wa muntu alu, ne, mona's, s'бивwa bifwanyine kwangata makaadika àbúngi bwa kuteekamu dikama dyende dimwepele adi. Mmunyi mene mwakabandishabo miine mabwe manenaanaale awu kuulu kwaka? Baakacyenzela mene penyi? Bukole bwa kasoloonyi kabwakwenzaku aci to. Kakwena cintu nansha cimwe citudi naaci to, amba anu ciikàle bukole bwa bombe bwa mushinda's, ne aci's ncivwa cifwanyine kwikala cintu cimwecimwe aci cyakakeba kabutu kaa ku mvula ya Noa ayi yidi mitume buloba mu cincyòmpanyòmpa ne mibukupe kule ne díbà, kubusaka paanyima ne kukeba mvula.

⁶⁵ Piikalabi ne Nzambi wakamba ne mvula neyiloke, kuvwa mwa kuloka mvula nansha byôbì ne yikaavwaku mene anyi kayivwaku to. Bwa Noa nansha muvwaku bijaadiki byàbúngi bya ku maalu a mamanya amu, Noa yêye wakumvwa Dîyî dya Nzambi, dyamba ne: "Mvula neyiloke." Pààkù kakuvwaku kwanji kuloka mvula pa buloba kacya to. Nudi numona anyi?

⁶⁶ Anu mwàkabàndàYe ne Abraham ku lusongo lwa mukuna, kadi kumwambila kwôkò aku bwa kufilaye mwanende umwepele wa balume bu mulambu. Nenku pakaavwa Abraham mumane kulongolola Izaka, ki Izaka mwànà kubanga dyela nkonko. Cimfwanyi cilenga cya Nzambi ne Mwan'Ende. Kumuswikilaye maboko ende awu paanyima. Ki awu ne: "S'mmudilu ewu, s'nkunyi eyi, ne bikwabo, mabwe's ngôwò aa, cyoshelu's ncyôci eci, kadi mulambu wèpi?"

⁶⁷ Nenku taatù mukulakaji awu, mwikàle mpindyewu ne bidimu bitwe ku lukama ne dikumi ne binaayi, ne mwânà wa balume uvwaye mwindilendile munda mwa bidimu makumi abidi ne bitaanu awu, mu ntatu ne bikwabo, ne mushindu mwine uvwaye mushaale kacya wakwata ku Dîyi dya Nzambi dikeenà difwa adi awu, dikaavwà dikunyiibwe munda mwa mwoyi wende adi, ùvwa ne cya kupeta mwânà awu nansha bishi. Ûvwa bishi? Munanukile. Kwambaye ne: “Ndi mumulame too ne mpindyewu. Ndi mumanye ne piikalabi ne Nzambi mmumumpe ku diMwitabuujja, Yèyè neamujuule ku bafwe.” Ki bwalu mbwòbù abu’s. Munanukile, kacya wakwata Dîyi dya Nzambi adi dyambedi.

⁶⁸ Nenku, aci, paakamananaye kudilongolola bwa kumushipa, kulwaku Mwanjelo wâkamukwàta ku cyanza ne kwimanyikaye keele. Ne ki cimpanga cya mukooko ncyòci aci cikalamine ku nsengu, mu cipeela amu paanyima pende. Cimpanga cya mukooko aci cyakafumina penyi? Yèyè nyawu uvwa usanganyiibwa mu ntanta wa lwendu lwa matuku asatu, pààbi muntu kana yònsò ewu mu dituku adi uvwa mufwanyine kwenda anu bipeepele ebi lwa makàsà kilomeeta makumi anaayi. Mémè ntu ngenda lwa makàsà kilomeeta makumi anaayi ne makumi anaayi ne mwandamukulu misangu yònsò yîntù nya katwa buluwà anyi mu bukontononyi, anyi nî ncinyi cyònsò, ntu ngenza ntanta awu lwa makàsà anu bipeepele ebi. Kadi tudi ne cidibo babiikila ne mmakàsà meela kasoloonyi. Muntu awu wakenza lwendu lwa matuku asatu, ne pashiishe utangila kule menemene e kumonaye mukuna awu. Mona’s, nyama ya cisuku’s yivwa mifwanyine kwikala mishipe cimpanga cya mukooko aci. Ne cikwabo cintu, yèyè uvwa usanganyiibwa ku lusongo lwa mukuna kuvwa kakuyiku nî mmâyì nî ncintu nansha cimwe to. Kabyena bikemesha to paakiinyikaye mwaba awu ne *Yehowah-yile*, “Mukalenge neadipetele Yèyè mwine mulambu.”

⁶⁹ “Mmunyi mudiYe mwa kwenza bintu ebi, Mwaneetu Branham, mu matuku a maalu a mamanya, mu matuku a bantu banene baa maalu a mamanya? Mmunyi mudiYe mwa kwenza ciine eci? Mmunyi mùdì wèwè wela meeji ne Yèyè neamanye mwa kupita ne bwalu ebu?” Yèyè’s uci di anu Yehowah-yile, Mukalenge awu. Twètù tudi tulama Dîyi Dyende ne Yèyè udi ne bukole bwa kwenza cyakambaYe aci. Amen. Yèyè udi mwa kwangata ekeleeziya mufwe, mukwate mashika wa mmwenekelu wa kwîsùkwîsù, Ûdi mwa kupatula cidimba kampanda mu ekeleeziya awu ne kwela Mwoyi wa Nzambi munda mwa muntu awu, kadi kumulakusha ne kapyia kaa Evanjeeliyo. Yèyè udi mwa kuumusha ndumba mu mùsèèsù, Yèyè udi mwa kuumusha mukwaciki wa maala mu kajila kampanda kuntu kwaka, kubavwija mulume ne inàbànà, bwalu Ûdi Yehowah-yile, “Mukalenge neadipetele Yèyè mwine mulambu.” Amen.

⁷⁰ Mushindu mwine utudi twètù tupwekesha Nzambi too ne pa byetu bishimikidi's! Tutu twelela meeji pa bishimikidi byetu twètù. Tutu twitabuuji pa bishimikidi byetu twètù. Lekelela cintu aci. Ki cyakabweja Eva mu lutatu ncyòci aci, ùwva yèyè welela meeji pa bishimikidi byende yèyè mwine. Ikala welela meeji pa bishimikidi bya Nzambi, cidi Dìyì Dyende dyamba. Ùdìbàndishè kumutu kwa cyòci aci, ku diitabuuja, mwikàle witabuuja Dìyì Dyende.

⁷¹ Noa wakamba ne: “Mémè ncyèna ncyuka mudi maalu a mamanya mwa kujaadika ne kakwena màyi muulu mwamwa nansha, Nzambi udi ne bukole bwa kuteeka màyi muulu mwamwa. Yèyè neàcyènzè bwalu Yèyè mmucilaye. Piikalabi ne Yèyè ngudi mucilaye, Yèyè neàcyènzè.”

⁷² Nunku yèyè—yèyè, cyakenzaye ncinyi? Kaakashaala anu wenda unyunguluka wamba ne: “Ee, Yèyè ngudi mungambile aci. Eyowa's, mémè—mémè ndi ngiitabuuja ne neyiloke” to. Wàkenza cintu kampanda pa bwalu abu. Kaa, mwaneetu wa balume, mwaneetu wa bakaji, udiku umona cìndi njinga kwamba aci anyi? Yèyè kaakashaala musòmbè anu mwaba awu wamba ne: “Nzambi ngudi mwambe nanku” to, wàkenza cintu kampanda pa bwalu abu. Pawikala muswe kusungidiibwa mu dinda emu, Nzambi mmulaye lupandu. Nanku enzaku cintu kampanda pa bwalu abu, kwikadi mushaale anu kacya wasòmba mwaba awu to. Kùkadyènji mwena ekeleeziya kampanda kadi kwangata mukanda webe ukàadi wàya naawu ku ekeleeziya wàya naawu ku ekeleeziya to. Yèyè utu mulaye lupandu, disungidiibwa.

⁷³ Piikalabi ne udi usaama: “Bwa cinyi kushaala musòmbè apa?” Bu mwakamba mwena nsudi dituku divwa cimenga cicincimikiibwe adi ne: “Bwa cinyi kushaala kacya twasòmba apa too ne mutwafwa?” Pavwa Samaaleya mucincimikiibwe kudi beena Suuliya, bôbô kwamba ne: “Tushaala anu kacya twasòmba apa too ne mutwafwa, s'netwikale—s'netwikale anu mwaba ewu. S'netufwile anu mwaba ewu mene. Twètù baye mu cimenga, mwômò mwine amu's nyawu bàfwamù ne nzala. Tupweke tuye mu cituudilu cya mwena lukuna.” Kaa, ekeleleke, bukese bwine. . . Bukese bwine bwa diitabuuja divwabo bafwanyine kwikala naadi's we. Nkaacintu kakese kaayi. . . Baakaya ku cituudilu cya mwena lukuna mwine uvwa ukeba kubashipa awu. Kadi baakamba ne: “Twètù bafwe, s'netufwe anu kufwa mwine. Pa nanku twètù bashaale ne mwoyi. . . s'netusungile myoyi yetu, mona's, s'netwikale benze bîmpè.” Ki kupwekabo e kuya kuntu aku, ki Nzambi kutwa katoba kakese kabwicedile kaa diitabuuja aku musinga. Ne kaakabasungila anu bôbô to, kadi wàkasungila ne Izaleela.

⁷⁴ Cidi citukengela twètù leelu ewu mbalume ne bakaji biikalà mwa kukwacila Nzambi pa Dìyì Dyende ne kwikala bananukile naaDi. Nzambi neènzèjè ne dizakala dya buloba

ne bikumina biye dyambedi ku cituudilu aci. Nzambi ki watangila bwa kumona ne nekwikale mvula muulu mwamwa anyi kayaakwikalamu.

⁷⁵ Wêwè udi wamba ne: “Ee, Mwaneetu Branham, mêmè’s ngangabuka mmungambile ne nêmfwe. Ndi ne kansere.” Bidi mwa kwikala nanku. Muntu awu udi yêyè ukwambila byônsò bidiye pende mumanye. Kadi, cintu cimwepele cidiye mwa kwenza, yêyè udi ne byumvwilu bitaanu bwa kukwata naabi mudimu, bibidi bya ku byôbi abi mbidiye mwa kukwata naabi mudimu. Mbyèpì biine abi? Cyumvwilu cimwe ndulengu, cibîdi cidi—cidi ndumòndò. Lumòndò ne lulengu, yêyè udi mwa kuumvwa cintu kampanda padiye ucilenga, anyi kumona cintu kampanda ku cyamu cya mîdimà. Abi ki byônsò bidi muntu awu mwa kukwata naabi mudimu. Ki byônsò bidiye mumanye, kadi yêyè udi wenza mwende mwônsò mudiye pende mumanye mwa kwenza. Kadi wêwè kutangidi abi to, yêyè mmufike ku ndekeelu wende. Banduluka utangile kuneeku cidi Eci cilaye! Wêwè nyawu udi wamba ne: “Bidi mwa kwenzeka munyi?” Nzambi’s ngudi mwambe nanku. Aci ncikose bwalu padibi ne Nzambi ngudi mucyâmbè. Aci ncikose bwalu, bwalu mbumana kukosa Cyendelele mu Dyulu kashidi, Dîyî Dyende mbwalu bukosa. Ne Mèyî Ende akavwijibwa mubidi, ne àdi mubidi Wèndè leelu ewu mu wêwè, pawikala muswe bwa kuÀlekela àvwijibwa mubidi. “Nwênù basòmbèle munda Mwanyi ne Mèyî Aanyi munda mwenu, dîbà adi nulombe cinudi baswe ne cyôci necyenjiibwe,” Yone Munsantu 15. Nwamonu’s, tudi baswe anu bwa Mèyî awu ashaale munda emu. Itabuujja aci, mbulelela. Ndimiinu, nenku dyôdi nedi—dyôdi nedifikishe byônsò bidiYe mulaye bwa kwenzekabi.

⁷⁶ Mpindyewu, monaayi, bya maalu a mamanya mbivwa bifwanyine kwikala bipatuke mwaba awu, musumbà wa beena maalu a mamanya’s, kwambabo ne: “Mukalenge Noa, wêwè udi mwambi mulenga be. Tudi—tudi tukwanyisha. Udi ne disangisha dilenga be mwaba ewu, famiye webe, kadi, kadi nansha nanku, bu wêwè. . .katwena twitabangana neebe ku mêyî to, ne tudi bamanye ne wêwè udi—udi upanganangana neetu. Udi—udi wêwè anu wenza bwa dikolesha dya maalu ditangalakangane munkaci mwa bantu, ne wêwè mwine udi ukwacisha bamwe baa ku bantu bwôwà, ubâmbila ne buloba mbutangile ku ndekeelu wabu. Tudi baswe kukuleeja ne kukujaadikila ku maalu a mamanya.”

⁷⁷ Kaa, dyabulu awu katu mufweku to. Yêyè—yêyè’s ucidi anu uteeta kwenza cyôci aci. Yêyè umwèumwè wâkamba ne: “Wêwè ne udi Mwânà wa Nzambi, mmonebi cishima tûng. Enzabi cishima wandamune eci cilwe dyâmpà, eci. S’nyawu udi ne nzala, anji andamunabi mabwe aa alwe mâmpà tûng, mêmè nènKwitàbùùjè.” Yêyè dyabulu umwèumwè awu munda mwa baakwidi balonge tulaasa abu, wâkamba ne: “Wêwè ne

udi Mwânà wa Nzambi, tuulukabi ku nkuruse aku tũng bwa utujaadikileci.” Nwamonu anyi? Dyabulu awu yêyè, katu yêyè anu ufwa to. Nwamonu’s, dyabulu utu yêyè wangata anu muntu wende awu kadi nyuma wende udi ushaala panwapa bwa mukwabo. Kadi lekelaayi nzwâmbilèku kaadiyi kaa dinukolesha naaku ku mwoyi: Nzambi utu pende wangata muntu Wende kadi Nyuma Wende udi ushaala panwapa, bwa mukwabo. Eyowa. Muntu kampanda neakidile Diyì adi. Muntu kampanda nealaabiibwe mu mushindu kampanda anyi mu mushindu kansanga. Mbilondeshile cyûdi wêwè, nyuma kaayi udi munda mwa lutete elu. Ki yêyè awu, wêwè neuDîtâbùjè anyi kwakuDiitabuuja to. Aci ki, ee, kwèna . . .

⁷⁸ Muntu kampanda mmungambile anu abidi adi panshi aa, mwine awu mwambi. S’ncifwanyine kunupapula. Kadi mvwa nsanganyibwa mu nzubu wa mudimu wa ngangabuka kampanda piine pâakacyâmbâye apu. Kadi ndi nzwambila bulelela’s, ntu mupete ne bangangabuka bââbûngì mbeena kwitabuuja mu dyondopa dya kudi Nzambi kupita bambi bânkaadi mupetepete. Ncya bushuwa. Eyowa’s, mukalenge. Nkaadiku mu. . . Bavwa bangeela nkonko, nudi bamanye’s, mwaba awu, kudi beena cikandakanda cya *Look*, anyi kî n’*Look* to, kadi. . . Civwa ncikandakanda kaayi civwâ cifunde bwa “Cishima cya Donny” aci? *Reader’s Digest*. Eyo. Nenku pavwabo bangeele nkonko kuntwaku ku ba-Mayo Brothers, nudi bamanye cyakambabo anyi? “Twêtù katwena twamba mutudi bondopi to, tudi twamba anu ne tudi tukwacishangana ne bufuki. Kudi Mwondopi anu unwepele, n’Nzambi.” Kaa, ekelekele! Ke bwalu mbwôbù abu’s. Mmuntu udi mwa kwela meji. Muntu kampanda udi mwa kutangila dyamwamwa ne kukenketa cintu cyônsò mu kaabujima. Twêtù’s tudi bantu. Tudi bantu badi ku bukookeshi bwa lufu, dyenza dya bilema ne bikwabo byônsò. Yêyè ngudi Nzambi, kayi mikalu.

⁷⁹ Tudi ne cya kuciitabuuja. Bu mêmè mwa kucyumvwija, dîbà adi kî ndiitabuuja kabidi to. Ncyèna mwa kuumvwija bwa cinyi ngombe mufiike udi mwa kudya bisoosa bya mâyi a matamba kadi kupatula mabeele matooke to, kadi yêyè’s udi ûâpâtula. S’ncya bushuwa. Nansha wêwè kwèna mwa kucyumvwija to. To, mukalenge. Ncyèna mwa kuumvwija mushindu udi Nzambi wenza bintu ebi to, kadi Yêyè mmwambe anu ne Yêyè neâbyènzè. Ncyadyakucimanyaku to, wêwè kwadyakucimanyaku to, kadi tudi tuciitabuuja. Ku diitabuuja nkûdi musungidiibwe. Ku diitabuuja nkûdi wondopiibwa. Cintu cyônsò cidi cilwa, kabidi, cîfûmina kudi Nzambi, bikengela cilwe ku diitabuuja.

⁸⁰ Kukaadi cikondo, pâmvwâ ngaakwila ku tudyomba kampanda, muntu mukwabo uvwa welulwila disangisha, kayi mumanye ne mêmè mvwa nganyi to. Kwambaye ne: “Mêmè ncyèna ngiitabuuja Aci to.” Yêyè ne: “Kî ncifwanyineku kwenzeka to. Ncyèna mwa kuCiitabuuja paanyi anu nanku

awu to.” Kwambaye ne: “Bikengela mêmè. . . Bidi bikengela bwa baCinjaadikile ku maalu a mamanya.”

⁸¹ Mêmè kwamba ne: “Nanku wêwè kwênàku mufwanyine kwikala mwena Kilisto to. Kwênàku wêwè ne mushindu to.”

Yèyè ne: “Kaa, kadi mêmè’s ndi mwena Kilisto.”

⁸² Mêmè ne: “To. Kwênàku mwa kuciikala to.” Mêmè ne: “Anji njaadikilebi tũng ku maalu a mamanya mwaba udi Kilisto.” Mêmè ne: “Wêwè ewu ukaadiku muselangane anyi?”

Yèyè ne: “Eyowa.”

Mêmè ne: “Utu munange mukajeebe anyi?”

Yèyè ne: “Eyowa.”

Mêmè ne: “Anjibi kunjaadikila ku maalu a mamanya cidi dinanga.” Yèyè, mêmè ne. . .

“Ee,” yèyè ne, “ncyèna mwa kwenza aci to.”

⁸³ Mêmè ne: “Nanku kwèna ne cintu nansha cimwe cîndi mêmè mbiikila ne ndinanga aci to. Wamonu anyi? Mpindyewu, wêwè udi anu. . . wêwè, aci ndiitabuuja dya buidingibudingi mu meeji ebe. Wamonu anyi? Pawikala kuyi mwa kucijaadika ku maalu a mamanya. Anji ngambilabi tũng cidi. . . Anji pwekabi kwînshi eku tũng unsumbileku ndambu wa dinanga dya cicyelè cya meeyà makumi abidi ne ataanu. Unsumbileku ndambu wa diitabuuja wa cicyele cya meeyà dikumi. Kwèna mwa kucyenza to.”

⁸⁴ Nanku bya mvita byònsò bya Nzambi bidi ndiitabuuja, dinanga, disanka, ditalala, mwoyi mule, bwimpè, bupole, kalolo, lutuulu. Bya mvita byònsò bya mwena kwitabuuja ndiitabuuja. Tudi twitabuuja Nzambi ku diitabuuja, bwalu, ke mudî Nzambi mwambe. Pa dîbà adi ncinyi aci? Abraham wakabingishiibwa, bwa Pòlò, nku diitabuuja; kadi, bwa Yakobo, nku byenzedi. Abraham uvwa wakula bwa civwa Nzambi umona, ne Yakobo yèyè uvwa wakula bwa civwa muntu umona. “Undeeje diitabuuja dyebe ku byenzedi byebe,” “kakuyi byenzedi byebe,” ne bikwabo. Nwamonu anyi? Pashiishe pawikala kuyi ne byenzedi pamwe ne diitabuuja dyebe to, bidi bileeja ne kwèna ne diitabuuja to, udi wêwè ubyamba anu mukana cyanaana. Kadi pawikala cya bushuwa ne diitabuuja, udi uciitabuuja ne wenza maalu bilondeshile dyôdi adi. Ncya bushuwa, uditeeke mu cyenzedi!

⁸⁵ Noa yèyè wakenza nanku, wakaditeeka mu cyenzedi. Wakatungunuka anu ne kwibaka kwa bwâtù. Nansha muvwa maalu a mamanya nansha a bishi amba ne: “Mpindyewu, tangila kuneeku, twètù netukujaadikile ku maalu a mamanya ne kakwenaku mvula muulu mwamwa to.”

⁸⁶ “Mêmè ncyèna ncyuka munudi mwa kunjaadikila amu, munudi mwa kubyamba ku dikebulula dya mu maalu a

mamanya, anyi mwônso munudi baswe kucibiikila amu to, Nzambi ngudi mungambile mêmè ne ‘Kulwalwa mvula,’ ne mêmè ndi ngiitabuuja Nzambi.” Ki cyôci aci. “Mvula nealoke.”

⁸⁷ “Neafumine mene penyi’s? Mukalenge Noa, ndi njinga nkukonke, mukalenge, wa kuneemekibwa, mwine mvula awu neafumine penyi? Ûdi yêyè mwine penyi?”

⁸⁸ “Ee, Nzambi’s udi ne bukole bwa kumuteeka muulu mwamwa piikalabi ne Yêyè ngudi mungambile ne neikalemu.” Cya bushuwa’s!

⁸⁹ Kadi leelu ewu badi bamba ne eci kaciyena mwa kwenzeka. Badi bamona dijingulula mu disangisha. Badi bôbò bamba ne: “Cidi ne cya kwikala lubuku.” Lubuku, lubuku? Dijingulula dya nyuma, dya ku bikeena-kumona bya Mukalenge! Ndubuku lwa mushindu kaayi luvwa naalu baprofeta? Civwa naaci Yesu ncinyi pavwa Ye mwimane mwine mwaba awu dituku adi apu?

⁹⁰ Nenku ki Filipino udi useemena ewu, ne yêyè mumane kusungidiibwa ne muye kangata Natanaela, mulwe nende kumpala kwa Yesu, pavwa Natanaela wamba ne: “Kya, mpindyewu kî nkufwanyineku kupatuka cintu cimpè nansha cimwe mu—mu Nazaleeta to.”

⁹¹ Pa nanku mmwenze anu useemena mwaba uvwa Yesu, Yesu kumutangila e kwamba ne: “Wêwè ewu udi—wêwè ewu udi mwena Izaleela. Kwêna ne lubombo to.”

⁹² Ki kwambaye ne: “Laabi, Wêwè ukaadi mummanye kubangila dîbà kaayi? Udi mufike mene ku dimmanya munyi?”

⁹³ Yêyè ne: “Kumpala kwa Filipino kukubiikilaye, pauvwa mwinshi mwa mucu apu mpâmvwà mukumone.”

⁹⁴ Mpindyewu, mu mubidi ewu, aci civwa... Bu ne nukaavwaku kwine kuntwaku, kudi ntanta wa kilomeeta makumi abidi ne yinaayi ya wenda unyunguluka mukuna. Myaba yibidi ayi, lwendu lwa dituku dijima lwa unyunguluka mukuna. Yêyè uvwa mwa kumumona munyi? Ncinyi dîbà adi? Mwikàle muntu wa diitabuuja, mwikàle muntu wa ukeba kumona Dìyì dya Nzambi dimweneshiibwe, ùvwa ukeba kumanya ne Nzambi wakamba ne: “Mukalenge Nzambi webe neajuule, paalwa Maasiya Yêyè neikale Muprofeta,” anu muvwaye amu. Ki kumonaye ciine aci, e kumanyaye. Kwambaye ne: “Laabi, Wêwè udi Mwânà wa Nzambi.” Ncya bushuwa. Dînà dyende ndya kadiyi mwa kufwaku to.

⁹⁵ Kadi kuvwa kwimane mwaba awu baakwidi banene buumakane bàvwà ne mapolome a DD., Ph.D., LL.D. paanyima paabo abu, pàmwâpa, biikàle mu ndelànganyi ya bambi kadi kwimana mwaba awu, badyambidila muvwabo bamanye Dìyì. Bavwa bamanye, dîyì’s, kadi kudi bààbûngi badi kabayi... Kî nkumanya kwa Dìyì Dyende to, kadi kuMumanya Yêyè, kumanya Ewu udi mu Dìyì awu. Ncya bushuwa. KuMumanya Yêyè, Mwoyi

ùdi munda mwa Dìyì awu. Mpindyewu, bavwa biimane mwaba awu bamba ne: “Muntu ewu m’Beelezebula. Mmwena lubuku. Ùdi ùmòna bintu abi. Yèyè ewu—Yèyè ewu mmwena lubuku. Cyacya’s. . .”

⁹⁶ Yesu kukudimuka e kwamba, mumanye. Mpindyewu anji indilaayi, bôbò abu kabaakajikula aci ne dîyì dikole to, baakadyelelaci meeji munda mwa myoyi yabo. Kadi Yèyè wakamanya meeji abo. Ki cidi Bible wamba anyi? Luuka Munsantu’s, eyo. Eyowa’s, Yèyè wakamanya meeji abo. Nudi numona’s, bavwa badyambidila ne Yèyè uvwa ubala mu meeji abo. Yèyè wakajingulula meeji abo. Wàkamba ne: “Panudi nwamba dîyì dibi bwanyi Mémè, Nènnùfwilèdi luse. Kadi,” mu ngaakwilu mukwabo, “dîngà dituku Nyuma Mwîmpè nealwe bwa kwenza cintu cimwecimwe eci, kadi nwênù bambe dîyì dibi dimwe bwa cyôci aci, nwamba dîyì dibi bwa cyôci aci, kabaadyakunufwidilaci luse to nansha mu eci cikondo, anyi mu cikondo cilwalwà.” Nwamonu anyi?

⁹⁷ Nwamonu’s, Nyuma Mwîmpè, bôbò kabavwa mwa kuMuumvwaku to. Bivwa bikengela bakandamune disangisha dyabo, bwalu’s disangisha dyabo divwa diimane mwaba awu. Ki kwambabo ne: “Ee, Yèyè ewu—Yèyè ewu udi ne cya kwikala ubala mu meeji abo. Ùdi ne lubuku. M’Beelezebula, mwena lubuku.” Ne muntu kana yònsò ewu’s utu mumanye ne mwena lubuku ngwa kwa dyabulu. Nenku baakabiikila mudimu wa Nzambi ne “démon,” babiikila nanku midimu ya Nzambi’s.

⁹⁸ Kanutuku bamanye ne cyònsò cidi naaci dyabulu ncintu kampanda cinyangakajila pa cidi cilelela anyi? Mashimi ncinyi? S’mbulelela bunyangakaja. Masandi ncinyi? Ncyenzeni cyakane kadi cinyangakaja. Mpekaatu yònsò ewu utu—utu mbulelela ne bwakane bunyangakaja. Lufu ncinyi? Mwoyi munyangakaja. Cya bushuwa’s, s’ki mushindu udibi mu Dîyì Dyende. Ki mushindu udibi, kadi bantu mbadi bateeta anu bwa kucibwikila ne mundidimbi, kucibwikila ne ditalàjà, benza bwa cyàmbè bintu kampanda bwalu bôbò kî mbamanye to, kî mbamanye to. Kabeenaku bôbò ne diitabuuja dya kwangata Dîyì to. Kadi Natanaela yèyè uvwa naadi.

⁹⁹ Kadi bishi bwa Simona paakaseemenaye mwaba awu apu? Ùkaavwa muumvwe tatwèndè Mufaalesa mukulakaji awu, wamba ne: “Simona, mwanaanyi, kumpala kwa cikondo cya nshiikidilu kulwaci, pàmwàpa nekwikale. . . Mémè nyewu ngaaMwindidi ne nealwe mu matuku âncidì mémepù aa, kadi Yèyè nyawu kèna anu mulwe to. Ùdi mwa kulwa mu cikondo cyenu nwênù. Nenku Yèyè mulwe, Simona, cyènzekà ncyôci eci: Nekwikale bintu byònsò munkaci mwa kwenzeka, mwanaanyi, ne nekujuuke bintu bya mafi bya mishindu yònsò myaba yònsò. Kadi wèwè uvuluke eci: ushaale ne Dîyì. Nwamonu anyi? Mpindyewu, Maasiya wàjuuka ewu, Yèyè neikale Muprofeta. Ne Maasiya mwine ewu neikale Muprofeta menemene anu

mwakadi Mòsà amu, bwalu Dìyì dyetu dya Nzambi didi dyamba ne Yèyè neikale Muprofeta mufwanangane nende. Mpindyewu, neumanye ne Yèyè neikale mutambe Muprofeta, Yèyè neikale Muprofeta-Nzambi awu. Kadi byenzedi ne mèyì Ende nebiikale bya Muprofeta, bwalu kwèna mufwanyine kubànda kupita aci to anu too ne pawàfikà pàdì Nzambi. Wamonu anyi?" Pa nanku yèyè kwamba ne: "Yèyè neikale, Yèyè neikale Muprofeta-Nzambi. Byenzedi Byende pa buloba ebu nebileeje Muprofeta, pa nanku tudi bamanye ne cidi, neciikale Nzambi. Wavuluka aci."

¹⁰⁰ Nenku ndi ngeela meeji ne pààkalwà Andele kumwambila diloolo adi ne: "Kaa, s'tudi bamone Maasiya," ndi ndifwanyikijila ne Simona wakamba ne: "Umuka, umuka. Umuka ndaaku. Kya, nda kùyaayà's, kuntacishiku to."

¹⁰¹ Kadi dituku dyàkalondà paakabwelaye mu disangisha, kuseemenaye mu Bwikadi bwa Mukalenge Yesu, ki Yèyè kwamba ne: "Wèwè ewu dìnà dyebe n'Simona, ne udi mwànà wa Yona." Aci kadi ki kumupatulaci ngiikadilu wa dyumakana uvwa mu yèyè awu. CyakenzaYe ncinyi? Yèyè, Yesu. . . Mulobi mupangi uvwa kayi mumanye nansha mwa kufunda dìnà dyende awu, Bible mmwambe ne yèyè uvwa eku mupangi eku kayi mulonge kalaasa to. Kadi byakasankisha Nzambi, ne diitabuujia adi, bwa kumuvwija Peetelo, kaadibwe kakese, bwa kumupa nsapi ya Bukalenge ne: "Pa lubwebwe elu Nèngiibakilèpu Ekeleeziya Wanyi." Mpa cinyi, mpa dibwe kampanda mudi Katolike wamba amu anyi? To. Mpa cinyi, ncinyi ciine aci? Mpa dibuulula dya nyuma. Nwamonu's: "Kî mmusunya ne mashi bidi bikubuulwile eci to, kadi Taatù Wanyi udi mu Dyulu ngudi mukubuulwileci. Pa lubwebwe elu, pa Dìyì difunda dya Nzambi diikàle dibuuludiibwe mu nyuma, Nèngiibakilèpu Ekeleeziya Wanyi, ne biibi bya iferno kabyenaku mwa kuMutamba bukole nansha." Bwa cinyi? Ncipite ne dimiinu dya mùtâdà. Mbukole bwa Nzambi bwikàle bûtwa eku bûtwa eku munkaci mwa baa cifwaka pa Dìyì, Dìyì divwijiibwe ne mwoyi.

¹⁰² Ki civwa munda mwa Noa ncyôci aci. Wakamba ne. . . Dìyì didi Mwoyi munda mwende. "Nenku nèndilongòlòlè bwa mvula."

¹⁰³ "Ee, mvula nyawu kî mmuloke makeelela to. Wèwè's uvwa mwambe ne nealoke. Nealoke díbà kaayi?"

"Ncyèna mumanye to, kadi nealoke."

"Wàmanyi munyi ne nealoke?"

"Nzambi ngudi mwambe nanku."

¹⁰⁴ Anu mwakambabo Abraham, mona's, mwikàle ne bidimu makumi mwandamukulu, yèyè; ne mukajende, bidimu makumi citeema. Kakaji kakulakaji kakwate ne bya luse aku kenda kanyeema lubilu mwaba awu, kambule ndambu wa mpengele

ne bikwabo bwa tunshesheete tukese twa mwânà, munda mwa bidimu makumi abidi ne bitaanu; ki yèyè ukaadi ne bidimu makumi citeema ewu, wendela ku kaadikompo kakese, mushindu *ewu*, wenda unyunguluka. Abraham, ne mwongo mwenze dikoko, ne mwedi cipamba kacya walembelela. “Kadi bishi bwa bwalu bwetu abu, Abraham? Hehee, kwine kwônso kuũmùkìlè—kuũmùkìlè mu cimenga cya Ula aku. Wèwè kwamba ne uvwa mwa kupeta mwânà. Kadi bishi bwa bwine bwalu abu mpindyewu?”

“Butumbi kudi Nzambi, netumupete nansha bishi!”

“Bwa cinyi?”

“Nzambi ngudi mwambe nanku!”

“Mona’s, aci’s kukaadi bidimu makumi abidi ne bitaanu.”

¹⁰⁵ “Nzambi’s ngudi mwambe nanku! Kabyena ne cidìbi bishintulula to nansha biikàle bidimu lukama ne makumi abidi ne bitaanu, Yèyè neàcyènzè nansha bishi!” Nwamonu anyi? Munanukile, disuminyina, dilumbata, dilumbatangana ne cintu. Wèwè ukaadi mumane kucikwata!

Byenze bu muvwa mwânà wa balume mutekete uvwa ubuusha kandeke awu. Awu ne: “Kadi penyì kòkò kiine?”

¹⁰⁶ Yèyè ne: “Ncyèna mumanye to, kadi kadi muntu mwamwa mu mwaba kampanda, ndi mwa kukumvwa kundekeelu kwa kanshinga aka.”

¹⁰⁷ Ki cyôci aci. Mulume anyi mukaji udi wangata Dîyi dya Nzambi, wèwè’s udi mukwate cintu kampanda. Lwongo lwebe ndukwate munda mwa cilàmbà cikudika. Mvula ya bipupu ne bipeepele bikole bidi mwa kucincimika ne kunyukusha mu mushindu wônso, kadi wèwè udi mwele lwongo. Bwâtù budi bulwa buludi too ne pa kaaba. Udi musuminyine. NeùCitàbùùjè.

¹⁰⁸ Noa wakaCiitabuuja, cya bushuwa, ne wakakumbaja kiipacila kaa Nzambi bwa mwoyi wende. Udi muswe kukumbaja kiipacila kaa Nzambi mu nsòmbelu webe anyi? Nanku ikala ne disuminyina paudi. . . musuminyine paudi upeta Dîyi. Shaala kacya wakwataKu, mulayi, ngwebe wèwè.

¹⁰⁹ Mòsà. Bantu biine bûngibù bândi mufwanyine kuteela mpindyewu’s we! Ndi ngamba apa bwa Mòsà, mu Ekesoode, Mòsà, uvwa mumanyi wa dibàla, cyenda ne mikanda wa mfumu, disalaayi. Kavwa anu disalaayi cyanaana to, ùvwa kalàlà kaa masalaayi. Kayi anu kalàlà kaa masalaayi cyanaana to, kadi ùvwa Pâlò uvwa ne cya kulonda. Amen. Ngũmvù butendeleedi bwambwedi mpindyewu mene, pa nanku mfwilaayiku luse. Eyowa’s, Pâlò uvwa ne cya kulonda. Piikalabi ne yèyè uvwa ujinga kusungila cisamba cyende, ee, s’ùvwa ne Ejipitu mu cyanza cyende. Yèyè’s ki uvwa Pâlò uvwa ne cya kulonda, s’uvwa anu mufwanyine kwenza ciwaye muswe aci dîbà divwaye mwa kushaala Pâlò adi. Kadi Nzambi wakaakula

nende, uh-huh, dituku kampana mwamwa mu kaacipuka kavwa kalakuka kapyà.

¹¹⁰ Kaa, kunyeemakananganaye bu muntu mutulumuke, ne tulaasa twende twònsò tulonga atu. Ne teoloji wende yònsò awu, kupangilaye bwalu. Ne bintu byende byònsò bya binene abi, kupangilaye bwalu. Kadi dituku dikwabo, mu kaacipuka kavwa kalakuka kapyà, Nzambi kutwilanganaYe nende. Paakalwa Nzambi kudiye mu kaacipuka kavwa kalakuka kapyà aka, mutangilaayaaku numone, ne dikombo mu cyanza, mukajende musòmbè pa kampundu, ne ka-Guershona kasòmbè ku lubese lwende, mu njila mutangile ku Ejipitu. Yèyè uvwa nganyi? Upweka wenda uya bwa kakwatangana ku bukookeshi bwende. Yèyè uvwa, uvwa ne disuminyina, uvwa munanukile bikole.

¹¹¹ “Mòsà, ki mùdiwèwè peebe wela meeji’s, ne bidimu makumi mwandamukulu abi, ne dikombo dikonyangale mu cyanza, dyùme ncyoncyoncyo nanku?” Hum! Dikombo dikonyangale, dibucikilangana dyenza kudi muntu umwepele, wenda uya mutangile ku Ejipitu byenze bu muntu umwepele wenda uya mutangile ku Russie bwa kamukwataye ku bukookeshi bwende. Bidi bitukengela anu... Nzambi udi dijinga ne muntu anu umwepele. Anu awu, Yèyè udi dijinga ne muntu anu umwepele mwikàle yèyè yònsò mu cyanza Cyende. Muntu umwepele, ki cyònsò cidi ciMukèngelà. Yèyè udi mwa kunyungisha Russie kumushiya anu tusunsukila ne muntu umwepele awu.

¹¹² Yèyè wakangata Noa, anyi Mòsà, numfwileku luse. Yèyè wakangata Mòsà pacivwaye unyeemakana mushindu *ewu* apu, musòmbesha mu nsòmbelu mulenga, kudi nsongaakaji mulenga kwìsù, kumuselaye, kupetaye mwànà, mushaale mupyanyi wa mikooko ya tatwèndè mwenu, Yetelo, mwakwidi wa mu Miidyana. Ùkaavwa ne byònsò bimana kumwenzela. Mupete nzubu mulenga, mwaba mulenga, nsòmbelu mucyankame kuntwaku, wenza kuya katwa buluwà ku musangu ne ku musangu ne buta bwende bwa mikete, pàmwàpa, wasa kashà, ne mbeèlèbeele bùngì cyanaana ne mikooko bùngì cyanaana, ne myòsà ya mikooko ne bungendaamushinga, bisumbusumbu bya bantu babànde pa mpunda byenza kupicilamu. Mona’s, yèyè uvwa mwikishe, kayi ne civwa mwa kutacishilaye meeji to. Kadi dīngà dituku, dīngà dituku bujitu bwa cisamba, cisamba cyende civwa cimwenze bujitu aci cikaavwa cimane kumuumuka mu meeji. Bavwa mu Ejipitu mwamwa. Yèyè ukaavwa mupangile bwalu, pa nanku Nzambi udi mwa kwenzaku cintu kampana cikwabo pa bwalu abu. Kadi dituku dikwabo dyàkalwà Nzambi kutwilangana nende mu kaacipuka kavwa kalakuka kapyà, nwènù badi baakula bwa disuminyina, s’ki yèyè uyààya ewu!

“Cilwilu cyebe cidi penyi?”

¹¹³ “Ncyèna dijinga ne cilwilu to. Cyanyi cilwilu ncilwilu cidi kaciyi cimweneka to.” Anu mwakadibi mu Dotana dinda

kampanda, pavwa muprofeta. . . “Cyanyi cilwilu ncilwilu cidi kaciyi cimweneka to.” Ki yêyè uyaaya ewu, cintu cimwepele cyûdîku mwa kumona cîdi anu dikombo dikonyangale adi, wenda ulombwela kampundu aka paanyima, ne mwedi wenda upeepa. “Nzambi atumbe!” Mêsù ende matangija mu Dyulu, wenda upweka bwa kuya kakwatanganaye ku bukookeshi bwende.

¹¹⁴ Misangu mikwabo diitabuujja didi dikufikisha ku dyenza dya maalu a bucimbe, bwa meeji a musunya. Kadi cyôci ciikàle Dîyi dya Nzambi, cidi ne cya kwenzeka. Ikala musuminyine, umone mudi Nzambi ucifikisha ku dyenzeka.

¹¹⁵ Kupwekaye, uvwa munanukile be. Kuyaye tamakatamaka too ne kumpala kwa Pâlò, kumwekabi anu bu ne neapangile bwalu’s. Kwambaye ne: “Nênkuleejè ne ndi mutumiibwe kudi Nzambi anyi to.” Kwelaye dikombo adi panshi mushindu *ewu*, bu udi muswe kwamba nanku. . .ki kwandamukadi nyoka; yêyè ne Aalona. Ki awu kumba kubiikidishaye balongi baa mabulunga a muulu babidi, anyi bantu babidi bakwata kudi badémons baa bwena batudi naabu mu matuku a ndekeelu aa aba, batentula too ne Basungula biine, bu byôbî mwa kwenzeka. Ncya bushuwa. Kupwekabo mwaba awu, kwelabo abo makombo panshi, kwandamukawu cintu cimwecimwe aci. Mpindyewu, Môsà uvwa mumanye cintu cimwepele eci ne, Nzambi uvwa mumutume awu uvwa ne bukole bwa kumukuba. Mpindyewu, kavwa mumanye ne cya kwenza civwà cilondà civwa ncinganyi to.

¹¹⁶ Udi ukafika too ne mu mushindu wa kuciyi umanya ne cya dyenza ncinganyi to, ne bantu bamba ne: “Yêyè kavwaku mwondopiibwe to. Mona’s, cintu aci’s nyawu cîcidi anupu.” Piikalabi ne Nzambi ngudi muteeke aci munda mwa mwoyi webe, wêwè shaala mwimane anu tëndê. Tungunuka wêwè anu ne kufila bujaadiki bwa butumbi bwa Nzambi. Nda wêwè anu kumpala!

¹¹⁷ Môsà kwambaye ne: “Ndi mêmè mumanye ne Nzambi ngudi muntume.” Cyàkenzekà ncinyi? Nyoka awu e kupwidijaye misangu yisatu anyi yinaayi, mona bunene, pàmwâpa mmoma wa diitu anyi cintu kampanda, kujuukaye kuulu kadi kusukuminaye mikwabo ayi. Nukaavwaku beele meeji bwa cyàkenzekelà makombo makwabo awu anyi? Baakambula anu dimwepele adi. Yêyè wakadya makwabo awu. Kaàcivwakù kabidi to. Nenku mushindu awu ki wenzà Nzambi dimwe dya ku matuku adi panshi aa ku bukole Bwende. Eyowa.

¹¹⁸ Môsà uvwa musuminyine. Pashiishe, katanci aka, Yêyè kumutuma, ne yêyè kwamba ne: “Enza cikampanda, Pâlò.” Ki kwambaye ne: “Kuyi mwenze to, netwenzè *cikampanda-cikansanga*.” Ki kusokaye Nzambi, ne Yêyè kutuma njijji, nkùpà, ne bikwabo byònsò pa buloba. Yêyè ukaavwa bishi? Ukaavwa

mukange mwoyi. Nzambi uvwa mumwambile ne: “Walukile ne bânà abu ku mukuna ewu, walukile apa.” Yêyè uvwa mumanye ne ùvwa ne diswa dya Nzambi, ùvwa mumanye ne ùvwa ne cikeena-kumona aci kumpala kwende. Ùvwa mumanye ne maulu ne buloba bivwa mwa kujimina, kadi cikeena-kumona aci kacivwaku mwa kupangila nansha. Ki yêyè kupwekaye kuntwaku, munanukile.

¹¹⁹ Teeleja, mwaneetu, bu wêwèku mwa kulwa mu dinda emu mwikàle ne cikeena-kumona cya diswa dya Nzambi, bu wêwèku mwa kulwa mwikàle ne Dîyì dya Nzambi, nansha cinganyi cyenzeke ne: “Nêngiikalè munanukile. Ndi ne... munda mwa mwoyi wanyi, kacya nsomba mwaba ewu, ndi mupete cikeena-kumona cya Nzambi. Ndi munanukile. Mémè nêngiikalè—mémè nêngiikalè musuminyine. Mémè nêmpwekè, nênkakwâtàngànè ku bukookeshi bwanyi. Bidi bikengela anu bwa cintu eci cinguumuke.” Necikumuke, mwaneetu. Kuditacishi to, necikumuke.

¹²⁰ Davidi, mwimane mwaba awu kumpala kwa Goliyata, mona's, ùvwa munanukile. Kwambaye ne: “Nudi baswe kungambila ne nenushaale biimane nulekela maalu a mamanya a cyena leelu àa, beena maalu a mamanya baba anyi?” Mpindyewu bidi bimweka anu bu kunyangakaja kwa cijila's, kadi ndi ntekemena ne nudi bamanye cîndi muswe kwamba aci. Nudi baswe kungambila ne beena maalu a mamanya baa cyena leelu baba badi mwa kwimana mwaba wawa ne kwamba ne matuku a bishima akaadi mamane kupita, pàdì Dîyì dya Nzambi udi ne mwoyi diikàle dyelangana naaci mpatà mikole anyi? Nudi baswe kungambila ne nenushaale balekele maalu a mamanya a cyena leelu amba ne cintu paaci ne ndyondopa dya kudi Nzambi kacituku to, padibi ne Bible, bya pa lukama makumi asambombo ne bya mu njila bya mudimu wa bwambi wa Yesu bivwa ndyondopa dya kudi Nzambi. . . eyowa's, bya pa lukama makumi mwandamukulu ne bisambombo, ngeela meeji, bivwa ndyondopa dya kudi Nzambi? Ne mulayi, ne milayi ya ndekeelu ayi!

¹²¹ Nudi baswe kungambila, nwênù bambi naanyi, ne nenushaale biimane balekele tudibo bakiikila ne ntusumbu twa cyena mangumba twa cyena leelu tûdì twenda tubwela mu Cisumbu cya Maakeleziya eci, anyi Nsangilu wa Maakeleziya, nenku baswe kungambila ne nenwikale biimane mu bulongolodi abu ne nubalekela babwikidija Dîyì dya Nzambi mukana munda mwenu, ne banwambila ne matuku a bishima akaadi mamane kupita anyi? Wêwè mwine udi nganyi's twamb'eku twamb'eku? Kacya ukaadi mwenzeku dilabula kampanda anyi? Ukaadiku kacya mulediibwe cyakabidi ku Nyuma wa Nzambi anyi? Wêwè, pawikala ukaadi mulediibwe cyakabidi, mwaneetu, s'ncya bushuwa ne newangate Dîyì dya Nzambi bwa bwalu abu. Cikwabo cintu cyónsò ciikalè mashimi. Cya bushuwa's!

122 Monaayi, Davidi uvwa mwenze dilabula. Wakangata ndundu mukese wa nyuunyi. Kavwa ne byàbùngì bya menemene to. Cìvwa anu ndundu wa nyuunyi, kadi ùvwa mumanye ne Nzambi wa mu Dyulu uvwa nende. Nenu wakapatuka kwaka e kushipa ours ne ntambwe, ne ùvwa mumanye cìvwa ndundu wa nyuunyi awu mwa kwenza. Ki kwambaye ne: “Nudi baswe kungambila ne, pìikalà Nzambi mwa kufila ours ne ntambwe awu mu byanza byanyi, mmunyi mudiYe mwa kupanga kufila mwena Peleshete wa maditambishi, ne udi kayi mutengula wawa?”

123 Baa pa buloba beena maditambishi baa leelu ewu aba, bàdì bàmba ne matuku a bishima akaadi mamane kupita, ne Russie ujuuka apa, ubundulangana ne maekeleeziya ne uàshìya ku bundu. Kakwena cintu nansha cimwe munda mwabo cya kukwacila mudimu to. Bwa cinyi ka-Castro kaa kale kaka, kalumyana kadi kakwata kudi badémons kaka. . . Mpindyewu, mèmè ndi—ndi mumumanye, s’nkadiku mulabulangane nende ku cyanza ne mutwilangane nende, ne bikwabo, pàmvwà kwine kuntu kwaka. Wa bwalu wakaakula naanyi bilenga bya dikema, ne bikwabo byònsò mushindu awu; wàmba muvwaye witabuuja ne nekulwe Bukalenge kampana bwa bidimu cinunu ne Kilisto kampana, ne bikwabo, kadi mudisumbishe kudi dyabulu. Kadi cidiye mwenze ncinyi? Mmutwe bukulu e kupakula bukulu. Ùtu mwenze cintu cimwepele, mmuvwije mfranga yònsò ayi milwe bibemba kadi kubangulula lupetu lupyalupya. Ki cyòcì aci cyakengela bwa kwenzekaci muneemu emu dimwe dya ku matuku adi panshi aa, mùdì byapu binene bya dyengela maala a whisky ebi, ne byapu bya mfwanka bìdì mwa kwangata bitadi byabi e kubyela ku télévision muneemu ebi. Ndi mumanye ne ndi ngaakwila pa mikaba ya mēyi. Kadi lekelaayi nwàmbilè, aci mbulelela, nansha nanku. Ayi’s mfranga yivwa yikengela kuyayi kudi mbulamatadi. Kadi badi mwa kucicinguluka’s. Kadi anji bangaayi, nupange anu kufuta byenu nwénù musangu umwe kadi numone cìdì cyènzekà. S’nebanunyenge byònsò binudi naabi bwa cyòcì aci.

124 Nudi baswe kungambila ne musùmbà wa beena Peleshete badi kabayi batengula baba badi mwa kwimana apa kadi kwela bilwilu bya Nzambi udi ne mwoyi kadyombo anyi? Peetu tutwà cintu bu cyòcì aci nyama ku mikolo’s. Cìdì cikèngelà ekeleeziya leelu ewu ndyalukila kudi Nzambi, dyalukila ku Diyì Dyende, dyalukila ku Bukole, dyalukila ku mpenta; kì nku bulongolodi bwa cyena Mpenta to, dyalukila ku dilabula dya mpenta. Balumyana abu mbalekele kashiba beele cyâla padibo baakula bamba bwa bulongolodi bwa cyena Mpenta apu. Mpenta ndilabula, didi dilwa kudi ba-Méthodistes, kudi ba-Baptistes, kudi ba-Presbytériens, anyi kudi ewu yònsò udi uMukeba. Ncya bushuwa. Nzambi katu ukwata mudimu ne ditunga, ne cisamba, ne dingumba nansha, Yèyè utu ukwata mudimu ne muntu nkaaya. Misangu yònsò, ne baa Bisamba bya

bende, upatula cisamba mu baa Bisamba bya bende bwa Dîna Dyende. Nwamonu anyi? Mushindu awu ki udi Ye ukwata naabo mudimu. Mpindyewu, lukasalukasa, ndi ne cya kulwijakaja.

¹²⁵ Davidi kwambaye ne: “Nudi baswe kungambila ne nenushaale balekele aci cyenzeka anyi?” Yèyè ne: “Ndundu mukese wa nyuunyi ewu!” Wàkalonda nyama wa ntambwe awu. Cinyi? Ne wàkamushipa. Ne wakalonda ours ne wakamushipa. Yèyè ne: “Mmunyi mwabenga Nzambi kumpa mwena Peleshete wa maditambishi udi wamba ne matuku a bishima akaadi mamane kupita wawa?”

¹²⁶ Ewu kadi kumusekaye wamba ne: “Nênkusomèkè ku lusongo lwa lushingi lwa muluki wa bilàmbà elu, difuma edi, nkukùdikè kuulu, bwa nyuunyi yidyè munyiinyi webe.” Yèyè's uvwa mwa kucyenza.

¹²⁷ Shawula kumwambilaye, wamba ne: “Muntu wawa udi. . . mona's, minu yende yidi bule bwa centimètres makumi asatu ne yitaanu.” Yèyè ne: “Mona's, muntu awu mmulwanganyi wa mvita kacya ku bwàna bwende, kadi wèwè nyawu udi anu kànà kakese kakunzubile.”

¹²⁸ “Kaa, kadi,” mwakambaye, “ndi ne cintu kampanda cya kukwambila. Mémè ndi ne cintu cyùdì kuyi mumanye to.”

¹²⁹ “Mona's, kaawèwè aka's udi kantu cyanaana,” mwakamba tùtùwèndè, “alukila pambelu wè. S'udi kutupu paudi apu. Nèngàm bilè papa akwele mfimbu pawalukila.”

¹³⁰ Yèyè wakamba cinyi? Wakamba ne: “Mvwa ndiisha mikooko. Musadidi webe, tààtù wanyi mémè, mvwa ndiisha mikooko yende dituku dikwabo kuntu kwaka. Ntu mémè ne dyeyemena kudi Mukalenge Nzambi. Nyama wa ntambwe wakalwa ne wakangata umwe wa ku bânà baa mikooko, kadi mémè kulumbatangana nende.” Bwa cinyi? Ûvwa mupeeshiibwe bujitu, mulombola kudi tatwèndè. “Ki mémè kumubyankula panshi. Kadi pakaajuukaye, mémè kumushipa, bwalu bavwa panshiile bujitu bwa dyambula.”

¹³¹ Kaa, wèwè mwambi naanyi, s'mbatushiile bujitu. Nyama wa ntambwe ubwela ne wangata umwe wa ku basadidi Bende ne upatuka uya nende, ki mémè ulwàlwa ne ndundu wa nyuunyi mu dinda edi ewu. Ndundu wa nyuunyi wa disambila dya diitabuuja neasungile mubeedi, ne Nzambi neamujuule panshi. CyakambaYe's! Tudi tulumbatangana nende, bwa kwaluja mwànà wa mukooko awu mu cisumbu cya mikooko. Tudi neenu dijinga, mwena Kilisto yònsò, tudi dijinga ne yònsò wa kunudi. Tudi neenu dijinga, bikengela tunupete. Taatù mmutupe bujitu bwa dyambula, tuyaayi tukamupete. Twikalaaayi balame bujitu abu.

¹³² Yèyè kwamba ne: “Nenku piikalabi ne Yèyè uvwa mwa kwenza aci bwa mukooko awu, kadi amba tũng bwa ewu udi

mwimane kaaba aka wela bilwilu bya Nzambi udi ne mwoyi kadyombo! S'ndi ne bundu bwa mukulwanyani wa balume ne bwa bakwabo bônso abu," mwakambaye, bwa baswe kwamba nanku. "Ndi ne bundu bwabo bôbò, butekete bunudi naabu abu."

133 Ne mêmè ndi ne bundu bwa kasumbu kaa bambi naanyi dîngà dituku pandi mbùmva biimane ne badyènzè cimuku, baditeeke luseke lumwe ne beena bupidya mu kwamba kwa ne: "Kaa, cintu bu nanku kacituku to. Kacituku to. Kanu—kanu—kanutekemenyiku ne bintu abi nebyenzeke to."

134 Peetelo wakamba, mu Dituku dya Mpenta ne: "Mulayi udi kunudi ne kudi bânà beenu balela, ne kudi bânà baa bânà beenu balela, kudi aba badi kule, mu bûngi bwônso bwabiikila Mukalenge Nzambi wetu abu." Piikalabi ne Yèyè ucidi anu ubiikila, Uçidi anu upongolola Nyuma Mwîmpè. Piikalabi ne Nyuma Mwîmpè ucidi anu ne mwoyi munda mwebe, bidi bikengela kwikalaYe ne nsòmbelu umwèumwè ne wâkadîYe nende kwaka mu Kilisto Yesu awu.

135 Wèwè mumone ditamba ditoloka, ne dikwama cimuma cya pomme, ee, cimuma cyàlondà kacyakwikala kalowalowa ne cyàlondà ciikàle cimuma cya mbùlù to. Dyôdi dikwame aci, ndisomeka. Ncya bushuwa. Kadi bu muji wa ku cibangidilu wa mucu awu mwa kupatula ditamba dikwabo, neciikale pomme. Pa nanku, leelu ewu, tukàadi ne malongolodi ne mangumba bûngi cyanaana adi masomeka. Mici ayi's neyiikale ne mwoyi. Eyowa's, mukalenge.

136 Ngâkamòna mucu mukwabo dîngà dituku mukwame bimuma citeema bishiilangane bya madimà, nenku mwikàle ne bimuma bya grenades, ne mwikàle, ngeela meeji ne civwa mbòmà, bimuma bya mpusu ne byônso abi, kadi mu bushuwa bwa bwalu uvwa mmuci wa orange. Ki mêmè kukonka muntu awu, Mukalenge Sharrit, mulunda wanyi awu, mêmè kwamba ne: "Ee, bidi bishi nanku, paaci ciikàle mucu wa orange?"

137 Yèyè ne: "Ee, udi upanda anu mucu awu kadi kusomeka eci munda amu."

138 Mêmè ne: "Ee, paakwamaci bimuma, necikwame bimuma bya orange anyi?"

Yèyè ne: "To, necikwame bilondeshile mushindu waci."

139 Ki bwalu abu's! Mwaneetu, pândi nkwambila apa, padi ekeleeziya miikàle misomeka mu Kilisto, bu mùdi, anyi yiteeta, bu mudiyi ne cya kwikala, mitonkwena anu munda amu ku dîna, yidibiikila yôyi miine ne ng'ekeleeziya ya Kilisto, padiyi yenza nanku, yidi yikwama cinyi? Mamuma a cyena mangumba's. Kadi ditamba adi bu dyôdi anu mwa kupatula katamba kakwabo, nekiikale anu muvwa kaa kumpala amu. Kadi lekela nkwambile, mwaneetu, piikalabi ne Nyuma Mwîmpè ngwa cya bushuwa mu Ekeleeziya leelu ewu, Ekeleeziya wa

mushindu uvwaYe nende wâkafûnda Mukanda wa Byenzi paanyima Pende awu, piikalabi ne Ekeleziya wa Nzambi udi ne mwoyi awu, Ekeleziya wa Yesu Kilisto ukààdi mulwe cyakabidi ne mwoyi ku Nyuma Mwîmpè umwèumwè wâkapòna mu Dituku dya Mpenta awu, s'Neafunde Mukanda wa Byenzi paanyima Pende. Cya bushuwa's. Neikale munanukile, musuminyine too ne padi cintu aci cyenzeke. Éyi Nzambi wa yaaya, ikalaku neetu luse's. Eyowa's, mukalenge. Eyowa's, mukalenge.

¹⁴⁰ Shimishoona, Shimishoona, uvwa musuminyine bikole misangu yònsò yivwaye anu mwa kulenga kuumvwa bipya mwandamutekete abi bimunyungulukile. Úvwa mumanye ne aci ki mulayi uvwa Nzambi mumupe. Nenu mulume yònsò ne mukaji yònsò mmufwanyine kwikala munanukile anu muvwa Shimishoona amu, misangu yònsò yûdi anu mwa kuumvwa bukole bwa mulayi abu bwikale bukunyungulukile, bwa Nzambi abu. S'ki Dìyi ndyòdi edi, Dìyi ndidi dyambe nanku. Nenu udi mwa kwikala musuminyine misangu yònsò yûdi umanya ne udi ne mulayi awu munda mwa mwoyi webe, diitabuujadi didi dikwambile adi, paudi musòmbè mwaba ewu mpindyewu apa, diitabuujadi didi dyamba ne: "Ndi mwondopiibwe. Ndi mwondopiibwe." Wamonu anyi? Pawikala umvwa cyòci aci, tungunuka wèwè anu ne kwenda kuya. Mwaneetu, Nzambi neatangile bwalu bwa beena Peleshete abu, kuditacishiku wèwè to.

¹⁴¹ Nukaadiku beele meeji mushindu uvwa Shimishoona, ne mufuba wa kale wa lubàngà lwa kampundu alu...Nudi bamanye mupimbu uvwa naawu bifulu bya mvita abi anyi? Bimwe bya kudibi bivwa ne mupimbu wa wipacila centimètres yibidi ne citupa, anyi centimètres yinaayi ya cyamu cya kabanda anu pa cyòci. Udi mufwanyine kwangata mwele wa mvita mukwata ne byanza bibidi bwa kumutuuta naawu mu mutu amu, kawuyiku mufwanyine kumutapa to. Kadi Shimishoona yèyè wakangata mufuba wa kale mumane kubola, numfwileku luse, mufuba wa kale wa lubàngà lwa kampundu awu mumane kuuma, kuwangulaye kadi kutuuta naawu bantu cinunu ne kubashipa. Mona's, dituuta anu dimwe cyanaana pamutu pàà umwe wa ku mitu ayi, mufuba wa lubàngà awu's uvwa mufwanyine kusunsuluka tupese mùlìyò mujima. Kadi, nwamonu's, cishima aci civwa mu mufuba wa lubàngà alu anu mushindu umweumwe ne mu Shimishoona. Úvwa ulenga umvwa ne: "Bu mêmè mwa kulenga kuumvwa ne mulayi awu udipu," mwakambaye, "lwâyi naabo apa." Nenu, mwaneetu, ki kubangaye kubokota beena Peleshete abu ku dyabalume ne ku dyabakaji. Bwa cinyi? Úvwa munanukile too ne paakalaala mwena Peleshete wa ndekeelu panshi. Amen! Civwaye naaci ncinyi? Kî nnansha cintu ciine cya ndolò to. Úvwa ne lubàngà lwa kampundu bwa kulwangana ne myele ya mvita ne mafuma ne bantu balongesha mvita balongeshulula. Kadi yèyè uvwa ne

bukole bwa Nzambi pambidi pende. Monaayi ne, bukole bwa Nzambi buvwa bwànji kulwa pambidi pende, dyambedi.

¹⁴² Kaa, mwaneetu, lwangana too ne piikalà cileeeji ne cileeeji cyònsò cya disaamà ciye. Aleluuyah! Lwangana too ne piikalà mpatà yònsò—yònsò miye.

¹⁴³ Udi wêwè wamba ne: “Ee, bwanyi bwalu mbushiilangane.” Angata mufuba wa lubàngà awu ucibokote ùcyùmùshè mwaba awu.

¹⁴⁴ Ewu yêyè mmwambe ne: “Kadi, udi mumanye’s, mêmè ndi anu mushiilanganeku ndambu, nkaadi ngenda ntamba kukulakaja be.” Bokota cintu aci ùcyùmùshè. Abraham yêyè’s ukaavwa ne bidimu lukama. Tungunuka.

¹⁴⁵ “Ee, kadi bwanyi bwalu’s mbubi be.” Yona’s uvwa mu difu dya mushipa wa bàlenà, ne byanza bimuswikila paanyima, mulaale mu bilushi bya mushipa wa bàlenà awu. Kwònsò kuvwaye utuma mèsù kuvwa anu difu dya mushipa wa bàlenà awu. Yêyè’s ki uvwa ne bileeji bya disaamà bùngì cyanaana, kadi yêyè wakakudimuka e kwamba ne: “Bwa musangu ewu kabidi nêntangilè ku ntempelu Webe wa cijila, Mukalenge.” Kayi mwa kuMusokoka to. Ki cyòci aci’s, munanukile! Disuminyina, shaala wêwè anu ne Diyì dya Nzambi. Yona wakashaala mushindu awu bwa cinyi? Mbwalu ùvwa mumanye ne paakalambula Solomo ntempelu, wakasambila e kwamba ne: “Mukalenge, piikalà cisamba Cyebe mwa kusanganyiibwa mu lutatu mwaba kana wònsò ne kutangijabo mèsù abo ku mwaba wa cijila ewu, díbà adi wateelejila mu Dyulu amu, wândamuna ku disambila dyabo.” Nenku yêyè uvwa mumanye cintu cimwepele eci ne, Nzambi neateeleje disambila adi.

¹⁴⁶ Nenku piikalà Yona, mu maalu avwa mamwenzekele awu, ùvwa mwa kwikala ne diitabuuja bùngì nanku kudi Nzambi, kadi wêwè? Kakwena nansha umwe wa kunudi mwaba ewu udi mu maalu makole a mushindu awu to. Mpindyewu bidi mwa kwikala bipite apu mushindu kaayi! Ùtàngila ku ntempelu kuvwa muntu ndekeelu wa byònsò mulwe kutwa cimpingà, Shawula, wâkenza diine disambila adi, kadi diikàle dilambula dya Nzambi paakacijaadika Nyuma Mwimpè ku Dikunji dya Kapyà dyàkabwelà ne kupweka paanyima apu? Dikunji dya Kapyà dimwedimwe dinudi naadi mu fòtò leelu ewu edi, ditwa eku ditwa eku munkaci mwetu, dyanza bimanyinu bimwebimwe abi ne maalu a kukema. Ncilumbu kaayi eci’s? Teelejaayaaku ne ditalala dyònsò. Teelejaayi. Mmunyi mutudi twètù aba, katuyi ne tudi tutangija mèsù etu ku ntempelu wa pa buloba, anyi bulongolodi kampanda anyi dingumba kampanda to, kadi ku diboko dya dyabalume dya Nzambi, kudi Yesu musòmbè ne bivwalu Byende Yêyè mwine bimata mashi, amen, Mashi Ende Yêyè mwine kumpala kwa Taatù, bwa kwenza dikwakwila pa ditonda dyebe! Amen. Ebelu 3, mmwambe ne Yêyè—Yêyè

m’Mwakwidi Munene, mwikàle ne mwoyi kashidi bwa kwenza dyakwilangana, kaa, ekelekele, kumpala kwa Taatù mu dinda emu. Mwakwidi Munene! Piikalabi ne Yona uvwa mwa kutangija mèsù pambelu, kubenga mwa kumona difu dya mushipa wa bàlenà awu, amba tũng mutudi twètù aba katuyi mwa kubenga kumona disaamà dikese ne ditakanyika dikese, anyi nî ncinyi nî ncinyi cyònsò cikese citudi naaci! “Ndi ntangija mèsù ku mulayi Webe wa cijila, Mukalenge.” Kwèna mwa kusokokela munsantu disambila dyende to, ki cyònsò cidiku ncyòci aci bwa bwalu abu. Cya bushuwa’s, kaa, ki muvwaye.

147 Bikengela ndwijakaje, balunda baanyi, dîbà nedimpite bikole cyakabidi. Twangataayi kabidi ndambu, ndambu wa mifundu mwaba ewu.

148 Yone, ùvwa mutwishibwe menemene, bwalu Nzambi nguvwa mumwambile. Nudi bamanye’s, mpindyewu tatwëndè uvwa mwakwidi, nudi bamanye’s, kadi, bwalu bwa dikema, kaakaya yêyè bwa kushaalaye mwakwidi to, wakaya mu cipeela. Kaakaswaku bwa kubwelakana mu teoloji ya bantu ayi to. Wakaya mu cipeela bwa kujandula, pacivwaye ne bidimu citeema. Tatwëndè ne mamwëndè bamane kwikala bakulakaji, bavwa bamanye ne kabavwa ne mushindu wa kumonaku mwanaabo mulela wa balume muprofeta awu ubwela mu bukole mu dituku adi to.

149 Kadi, vulukaayi ne, Nyuma umwèumwè awu ngudibo batulaye mu dituku dya ndekeelu edi, Eliya.

150 Vulukaayi ne, Yesu kaakateelaku cyòci aci to paakambaYe...pakaakulaYe bwa Yone Mubatiiji apu. Bu nwènù mwa kumona: “Ndi ntuma musanjeela Wanyi kumpala Kwanyi,” Maataayi 3. Bwalu, kabiyi nanku to, nwènù nudi ne dipangakanangana mu Mifundu amu.

151 Wàkamba ne: “Kumpala kwa dituku edi kulwadi, kwa dituku dinene ne didi dikwacisha bwòwà dya Mukalenge adi kulwadi bwa kwosha buloba ne kapyà.” Buloba kabwakooshiibwa ne kapyà mu miine matuku awu to. Buloba buvwa mwa kwoshiibwa ne kapyà paanyima paa *edi* dilwa. Yêyè uvwa mwa kutuma Eliya awu bwa kulongolola maalù ne kwaluja bantu ku dibapungisha. Nenuki cìvwà Eliya ewu ne cya kwenza, wa kumpala wàkalwa awu, ùvwa mwa kwalujulula, ùvwa mwa kwaluja diitabuuja dya baataatù kudi bânà, kadi wa mu matuku a ndekeelu ùvwa yêyè ubaalujulula ku Diitabuuja dya baataatù. Nwamonu anyi? Nwamonu’s, ubaaluja ku baataatù baa mpenta baa ku cibangidilu, Mukenji mujaalame, cibangidilu. Eliya! “Nzambi, mutumaaku,” ki dyanyi disambila ndyòdi adi. “Mutumaaku, Èyi Mukalenge, mutumaaku lukasa.” Twètù netusambile bwende yêyè, bwa kumwenekaye mu cyalu. Ne Nzambi utu misangu yònsò anu ne mwinyàmpalà Wende mwaba kampanda pa buloba. Yêyè kacya katu upangaku kwikala ne

ntemu mwaba kampanda to, ùtu misangu yônsò anu ne ntemu mwimane ne lulamatu. Nenku ndi ngiitabuuja ne yêyè awu udi. . . Ndi ngiitabuuja ne tudi mu mundidimbi wa Dilwa dya Mukalenge mpindyewu utudi twakulangana ewu. Cikondo cya bukole bwa Nzambi kjuukabu cyakabidi mu mmwenekelu wa muprofeta Eliya, bwa kumutuma panwapa bwa kulongololaye bantu, ne kulwa naabo, kasumbu kakese aku. Mwakadibi mu matuku a Noa, mwakadibi mu matuku a Lota, ki mwikalabi kabidi, anu banyààbanyà, ki mwikala Ekeleeziya.

¹⁵² Eyo, tudi tusangana ne Yone kaakaya bwa kupeta dilongeshiibwa dyende dya butendeleedi to, kadi wàkaya mu cipeela bwa kupetaye dilabula kampanda. Pààkamùpàtukayè, ùkaavwa ne ngaakwilu anu wa mu cipeela. “Lukongo lwa nyoka ya ntooka nwè,” nyoka yivwaye musangane mu cipeela ayi. “Cisuuyi nciteekiibwe ku muji wa mucu.” Ende mayiisha avwa mashindameene ôwò anu pa bya nanku awu. Kadi, monaayi, paakalwabo kumukùngwila, wàkamba ne: “Kudi Kampanda mwimane munkaci mwenu amu mpindyewu unudi kanuyi bamanye to.” Ûvwa mumanye civwaye wamba aci.

“Wèwè ki Maasiya awu anyi?”

Yêyè ne: “To.”

¹⁵³ “Wèwè ki Muprofeta awu, Muprofeta-Maasiya uvwa ne cya kjuuka awu anyi?”

“Kì mmèmè to,” mwakambaye, “kadi Yêyè awu mmwimane munkaci mwenu patudi twakulangana apa.”

¹⁵⁴ Pàmwäpa misangu mikwabo Kaayifa, mwakwidi munene awu, ùvwa mwine mwaba awu. Yêyè mwine, ndi ngeela meeji ne kavwapu to, yêyè uvwa mutambe kuneemekiibwa bwa kulwaye mu mwaba bu nanku awu. Kadi yêyè, umwe wa ku baakwidi nguvwa mufwanyine kwikala mwambe ne: “Mukalenge, ewu m’Mwaneetu Jones. Mmuntu mulenga maalu. Mwaneetu *Kampanda* ewu, Mwaneetu John Kansanga, yêyè, ndi—ndi ngeela meeji ne yêyè, ki wíkala Mukalenge mwa kuvwija Maasiya.”

¹⁵⁵ Yone kwambaye ne: “Mèmè ki wâMumanya. Nekwikale cimanyinu cyenda ciMulonda.” Ûvwa mumanye ne ncya bishi. Baa disanka mbaa nyuma bàdì bùmvwà. Baa disanka mbàdì ne mèsù ne biikàle mwa kumona, maci àdì mwa kuumvwa. Kwambaye ne: “Mèmè ki wàmanya. Nzambi neamanyishe, neaMumanyishe.” Nzambi utu ushindika basadidi Bende. Eyowa’s, mukalenge. Nenku paanyima paa katanci ki Yêyè kulwa, mmwenze anu utupula mèsù kwaka pende umba umona, yêyè kwamba ne: “Monaayi, Mwànà wa mukooko wa Nzambi udi umusha mpekaatu wa baa pa buloba.” Yêyè uvwa munanukile ne kakuvwaku nî mmwena dipolome dya Ph.D., LL., L yibidi, anyi nî ncinyi, uvwa mwa kubwela, mwakwidi kampanda, muntu kampanda mutambe kunangiibwa wa dîbà adi mwikàle

utafunya maja a mushindu kampanda to. Yèyè uvwa . . . Muntu awu kupwekaYe mwaba awu ne kumanya ne Yèyè uvwa Nganyi bwalu kuvwa cimanyinu cyenda ciMulonda. Wàkamanya ne Yèyè uvwa Nganyi.

¹⁵⁶ “Bimanyinu ebi nebifile badi biitabuuja.” Ekeleeziya wa Nzambi mwikàle mutuntumunyiibwe ne muteekiibwe mu bukole. Eyowa. Mpindyewu, tuyaayi too ne pândi njikija cyena bwalu eci mpindyewu. Yone, munanukile. Ne yèyè uvwa ne disuminyina bu muvwaye mumanye ne ùvwa mwa kumanya Maasiya, bwalu Maasiya uvwa ne cya kwikala mwambule cimanyinu kampanda. Nenku tudi tumona bimanyinu leelu ewu, bimanyinu bya Maasiya ulwâlwa, kacya byamonangana. Mpindyewu teelejaayaaku ne lutuulu lwônsò mpindyewu.

¹⁵⁷ Mukaji wa beena Ngelika ewu, paakumvwaye bamba bwa Yesu: “Diitabuuja didi difumina ku dyumvwa.” Mpindyewu, yèyè uvwa mwena Ngelika, mumpangaanu, pa nanku yèyè kuumvwa e kulwaye. Nudi bamanye mudi bwalu anyi? Diitabuuja ditu dipeta mushimi udi bakwabo kabayi bamona to. Diitabuuja ditu dipeta mushimi udi bakwabo kabayiku mwa kumona to.

¹⁵⁸ Wèwè udi wamba ne: “Kaa, ncinyi cidi kuulu kwaka? Ncinyi cidi kwinsi eku? Ncinyi cidi kuntu kwaka? Kàka kantu kakese nkanganyi. . . Kaa, s’nkāadisangisha kakese. Nkantu *kampanda*’s. Bu ne bivwa bikengela bwa Nzambi kwenzaye cintu kampanda, Yèyè’s uvwa mwa kulwila kudi balombodi baa Katolike wa cyena Loomo, Ùvwa mwa kulwila kudi mwepiskopo mutambidile wa ekeleeziya wa ba-Méthodistes, Ùvwa mwa kulwila kudi baa—baa—baataatù baa ba-Anglicans, anyi kudi bamwe baa ku bôbò abu. Ùvwa mwa kulwa . . .” Eyowa, aci’s ncyakadyambidilabo ku cibangidilu. Kadi Yèyè wakalediibwa penyi? Mu cikumbi. Bende bayiidi Wàkabàngata penyi? Ku musulu, balobi baa mishipa, bantu bapwekele, kabayi ne tulaasa tulonga. Nwamonu’s, Nzambi udi wenza cidiYe muswe kwenza aci, kadi wèwè udi uMumanya Yèyè.

¹⁵⁹ Mmunyi muvwabi bishiilangane mwaba ewu, mu Moaba emu, pavwa Izaleela ukosolwelamu? Moaba wakalambula bimpanga bya ngombe mwandamutekete, anu bivwa Izaleela mulambule menemene. Moaba wakalambula milambu ya mashi mwandamutekete, bimpanga bya mikooko, anu menemene bu bya Izaleela. Bilondeshile muvwa maalu ne cya kwikala, bavwa menemene anu mwomumwe. Ne mu bushuwa bwa bwalu bôbò bavwa bânà baa muntu, Moaba mufumine ku mwânà wa bakaji wa Lota. Kadi ki Baalaka ewu kumutu kwaka ulambula mulambu wa mwomumwe, mwenze ne mwende mwônsò menemene anu bilondeshile muvwa maalu ne cya kwikala. Kadi civwà cyenza dishiilangana ncinyi? Umwe wa kudibo uvwa ne Lubwebwe lutuuta, Dikunji dya Kapyà, diyì dyumvwiika dya Mfumumu mu cituudilu, musumbà wa bantu baa

kabayi basungulujangana bilondeshile mangumba. Kabayi ne lubanza, kabayi ne mwaba wa babiikilaku ne ki wabo paabo to. Bavwa benda balaluka, beenyi ne beena lwendu, balalakanyi, bambilangana mudibo beena beenyi ne lwendu. Bavwa benda bakeba cimenga kampanda.

¹⁶⁰ Mushindu awu ki udibi leelu ewu. Kakuyi ditwangana ne bulongolodi kampanda bwa bunene to. Ciine aci cidu anu cîmpè, kadi, aci, nansha wêwê mwikâle mwena bulongolodi bwa bishi, ikala mwena kwônsò kuwaswa aku. Kadi, cintu cya kumpala, fundisha dînà dyebe mu Mukanda udi Mwamwa wawa, lekela Nzambi adifunde mu Mashi a Yesu Kilisto, peta Nyuma Mwîmpè, ne diitabuuja bwa kwitabuuja Dîyi dyônsò dyakafunda Ye, ne Dyôdi adi ndilelela. Ki bwalu abu's. Eyowa.

¹⁶¹ Mpindyewu, mukaji ewu uvwa mwena Ngelika, kwine kwônsò aku, kadi diitabuuja ditu dipeta mushimi udi bakwabo kabayiku bamanye kantu nansha kamwe pa bidi biwutangila wôwò awu to.

¹⁶² Mpindyewu, vulukaayi ne, Dîyi Dyende—Dyende ditu m'Mwele wa mvita. Bible ngudi mwambe nanku. Ditu m'Mwele wa mvita. Ebelu, nshapita 4, 4.12, panwikala baswe kufunda aci. Ebelu 4.12, mmwambe ne ki cidu Ye: "Dîyi dya Nzambi nditwe kupita mwele wa mvita wa nseke yibidi." Ndekelaayi ngânji kwimana apa kakese. Teelejaayi. "Dîyi dya Nzambi nditwe kupita mwele wa mvita wa nseke yibidi, ditubula too ne ku dipandulula dya mufuba, ne bikwabo, bwongo bwa mu mifuba, ne Dijinguludi dya meeji a mu mwoyi." Neya bushuwa anyi? Aci—aci, twânji twimanaayi kakese, twelanganaayi meeji mpindyewu: "Dijinguludi dya meeji a mu mwoyi." Mufundu ewu udi udinga anyi? Kawenaku mwa kudinga to. Piikala Wu Wôwò mwine wamba maalu abengangana, kawena nansha ne mushinga wa dibeki didiwu mufundiibwepu adi to, mmuseeswishanganyi. Piikalà milayi ya Nzambi yibengangana yôyi nkaayaayi, cinwitabuuja ki cinyi—ki cinyi's?

¹⁶³ Bu muvwa mwânà wa balume mwena Inde awu uvwa mulwe matuku mashaale aa kudi Docteur Morris Reidhead ne bakwabo abu, mfumu wa Mission ya Soudan, kwimanaye mwaba awu ne kwambaye ne: "Vulukaayi," yêyè ne, "twêtù tudi bamanye ne Yesu udi ne mwoyi," yêyè ne, Docteur Reidhead nguvwa wamba—wamba awu ne, "bwalu Yêyè udi ne mwoyi munda mwa mwoyi wanyi. Aci neya bushuwa."

¹⁶⁴ Ki awu ne: "Eyowa, ne Mahomet udi ne mwoyi munda mwa mwoyi wanyi, yêyè pende." Yêyè ne: "Tudi mwa kupatula bintu bya mu meeji mu ci—Muzulumanyi anu bûngi bwa mwomumwe ne bidi bwena Kilisto mwa kupatula amu." Kadi yêyè kwamba ne: "Ee, mêmè ndi muswe kumona bimanyinu bya cimanyinu abi, bimanyinu bya mu Maako 16 abi byûle."

165 Yèyè ne: “Kaa, abi,” yèyè ne, “wèwè’s udi—wèwè’s udi anu. . .” Yèyè ne: “Udi umona’s, mukalenge, kubangila ku nshapita wa 9 awu. . . ku mvensa wa 9 wa nshapita wa 16 awu wa Maako awu, kî mbisonsodiibwe bu mudi bikwabo ebi to. Vatican ngudi mubyèlèmu pende cyanaana.”

166 Yèyè ne: “Nanku pàmwāpa ne biine bikwabo byònsò bya Cyôci aci kî mbisonsodiibwe to. Pa nanku m’Mukanda wa mushindu kaayi unudi nubala awu?” Yèyè ne: “Koran yònsò mujima yèyè mmusonsodiibwe.” Bundu kaayi! Bundu kaayi bwa ekeleeziya wa beena Kilisto! Anyi Wòwò awu udi Dìyì dya Nzambi anyi kaWena Dìyì dya Nzambi to. Nenku wèwè anu muteekeleMu diitabuuja, utangile umone mudiDi dikwata mudimu. Udi uDiitabuuja, uDiitaba. Eyowa’s, mukalenge. Twètù tudi tuDiitabuuja.

167 Cinyi? Dijinguludi dya meeji a mu mwoyi. Mpindyewu tangilaayaaku: “Ku cibangidilu kwakadi Dìyì, Dìyì dyakadi ne Nzambi,” Yone Munsantu 1, “ne Dìyì dyakavwijiibwa mubidi, Kilisto.” Nenku paakalwaYe panwapa, Yèyè wakapwekesha mèsù pa bantu. Mukaji mutekete kampanda wakalenga civwalu Cyende, Yèyè wakakudimuka, kwamba ne: “WâNdengì awu nganyi?” Peetelo kuMutandishaye. Wàkakenzakana e kwamba ne: “WâNdengì awu nganyi?”

Yèyè ne: “Bantu bònsò’s nyewu baKulenga.”

168 Yèyè kukenzakana e kwamba ne: “Kadi’s nyewu Ndi njingulula ne Ndi mupete butekete.” KutangilaYe kwaka. “Mashi ebe avwa alwa munda awu ìmànyì.” Cinyi? Dìyì dya Nzambi diikàle dijingulula meeji.

169 Bafaalesa abu kwambabo, munda mwa mwoyi yabo, kwambabo ne: “M’Beelezebula. Nwamonu’s, Yèyè, ki cidiYe. Ncyôci anu menemene.”

170 Yèyè kukudimuka e kwamba ne: “Nènnùfwilè luse bwa aci.” Yesu utangila bantu ne ujingulula meeji abo. Civwa ncinyi? Dìyì, Dìyì divwijiibwe mubidi, dijinguludi dya meeji ne mapangadika a mu mwoyi. Ki cidi Dìyì dya Nzambi mpindyewu ncyôci aci. Yèyè udi umwèumwè awu makeelela, leelu, too ne kashidi. Nwamonu anyi?

171 Bikengela upete Dìyì didi ne mwoyi munda mwebe bwa wèwè kupeta Nzambi udi ne mwoyi munda mwebe, bwalu Dìyì edi didi Nzambi padiDi divwijiibwe mubidi munda mwebe, divwijiibwe Nyuma, Mwoyi munda mwebe. PadiDi dibwela mu mubidi webe ne mu diitabuuja dyebe, ne dilwa Mwoyi, dîbà adi wèwè udi cileejiilu cidi ne mwoyi. Udi mukanda mufundilanga wa Nzambi, udibo babala kudi bantu bònsò. Wèwè kwakuDipeta bu Kilisto to, kabiyi mu kaabujima to, bwalu Dyakaabanyiibwa mu Dituku dya Mpenta.

172 Mpindyewu, nwênù batu biitabuuja ne bidi bikengela nwakule mu myakulu bwa kupeta Nyuma Mwîmpè, ndi muswe bwa nwênù kuteeleja eci katanci kakese cyanaana. Pààkapwekà Nyuma Mwîmpè, mu Dituku dya Mpenta, Yèyè uvwa ndimi ya kapyà. Civwa n'Dikunji dya Kapyà dyàkalombolà bàna baa Izaleela adi, dyakaDikosolola ne kwikila pa mutu paa umwe ne umwe wa kudibo, Nzambi mu Ekeleeziya Wende. Eyowa's, mukalenge, Nyuma Mwîmpè. Ncya bushuwa. Pòpò apu ki paakapetabo Nyuma Mwîmpè, paakaakulabo mu myakulu. Kacivwa mwakulu mwenyi to, bavwa baakula ne bantu mwaba awu bàvwà bàbùmvwa. Evanjeeliyo uvwa ne cya kupatuka pa dîbà adi. Baakapatuka e kubwela mu bateeleji, ne pashiishe kupatuka kubwela mu bulà ne kubanga kwakula mu myakulu, kayiyi myenyi to. Nwênù nudi nwenza maalu cimbòndambònda panudi nwela meeji ne bidi bikengela nwakule mu myakulu myenyi. To, mukalenge, baakaakula mu myakulu. Bantu baakumvwa muntu ne muntu: "Mmunyi mutudi tuumvwa muntu ne muntu mu mwakulu wetu sungansunga wa kudibo batulelele?" Cyenzedi cya Nzambi mwikàle utuma Nyuma Mwîmpè. Twanji tushiila aci apu.

173 Dîyì dya Nzambi edi nditwe kupita mwele wa mvita wa nseke yibidi, diikàle mene Dijinguludi dya meeji a mu mwoyi. Nenku ncinyi? Didi mwa kukwaciibwa kudi cyanza anu cimwepele. Mwele wa mvita utu ne bukole. Wòwò—wòwò kawutu ne kantu nansha kamwe mu wòwò amu padiwu kawuyi mukwaciibwe mu cyanza kampanda to. Ne padi cyanza cya diitabuuja mwa kukwata Dîyì dya Nzambi, necyènzè cintu cimwecimwe cyakenza Yesu aci. "Byenzedi bìndì Mémè genza nenùbyènzè peenu."

174 Pàmwàpa udi mwa kukosa anu kakese cyanaana, pàmwàpa wèwè udi ne cyanza cya diitabuuja citekete, udi mwa kukosa kantu kakumbanyine bwa kwamba ne: "Ee, ndi mwa kumona muunya mukumbane bwa kumona ne ndi musungidiibwe." Kadi bishi bwa milayi mikwabo? Wèwè mwikàle ne cyanza cya dikanda cya diitabuuja, kwata Dîyì dya Nzambi mu kaabujima kadi ukose anu mîdimà ne mîdimà yònsò amu, amen, too ne pìikalà Bukènkè bwa Nzambi ne cya kukenkeshamu, kadi utangilangane ne Nzambi cimònààmèèsù, mwimanyine pa Dîyì Dyende. Amen.

175 Yèyè uvwa ne bipumbishi byàbùngì, mwine mukaji mukese mukwate ne bya luse ewu. Úvwa ne bipumbishi byàbùngì, kadi diitabuuja dyende kadivwaku naabi nansha cimwe to. To, to. Yèyè ukaavwa muumvwe bamba. Diitabuuja dikaavwa dikwate. Úkaavwa muumvwe bamba ne diitabuuja dyende dikaavwa dikwate. Mpindyewu, bavwa bafwanyine kwikala bamwambile nenku ewu: "Wèwè ewu's udi mumanye ne udi mwena Ngelika. S'udi mumanye ne kwèna ne ciwapeta nansha cimwe to, bwalu nkwaku kutu disungulujangana, udi umona's.

Kwakupetaku kantu nansha kamwe mwaba ewu to.” Kadi yêyè wakateyaku ntema ku biine abi anyi? To, mukalenge. Yêyè uvwa ne diitabuuja, ne diitabuuja adi ki cyônsò civwa cimukengela, bwalu ùvwa mumanye ne Dîyì dya Nzambi ndivwa diimane pààpa adi. Ùvwa ne diitabuuja. Bamwe baa kudibo bavwa bafwanyine kwikala bamwambile nenku ewu: “Kadi anji indilabi kakese tũng wêwè!” Ditunga dyabo bôbò, ekeleeziya wabo bôbò uvwa mufwanyine kwikala mumwambile ne: “Mpindyewu anji indilabi kakese tũng, matuku a bishima’s akaadi mamane kupita. Kuyi kuntwaku to. Matuku a bishima akaadi mamane kupita.” Kadi kudi cintu kampanda pa bidi bitangila diitabuuja, ditu dyôdi ne mushimi ùtù kawuyiku uteya ntema ku biine abi to, ne kawuyiku anu ubimona to. Yêyè ukaavwa mumane kubakula Dîyì adi. Yêyè udi Dîyì. Mukaji awu uvwa ne diitabuuja bwa kuDikwata. Wàkatũngunuka anu ne kuya. Bavwa bafwanyine kwikala bamuseke, bambè ne: “Ee, bantu bakwabo bônso’s nebakuseke, bwalu mwaneebe wa bakaji awu neikale usaama cidimu cyalwa anu mudiye usaama eci cidimu amu. Neatungunuke ne kwikala anu ne démon umwèumwè awu, neikale usaama mushindu anu umweumwe awu.” Kadi yêyè kaakateyaku ntema ku biine abi to. Diitabuuja dikaavwa dimane kukwata, nwamonu’s. “Wêwè’s newipaciibwe mu ekeleeziya wenu wêwè anu mudidinge muye kuntwaku mu cimwe cya ku byôbi abi. Wavuluka anu ne, nebakwipate. Nebakuumushe mu bwobumwe.” Aci kacivwa ne civwaci cyamba to bwende yêyè. Diitabuuja dyôdi dikaavwa diye dipicile pamutu paa ciine aci. Yêyè ukaavwa mumane kukanga mwoyi bwa akafike anu kudi Yesu. Ki cyôci aci.

¹⁷⁶ Mpindyewu, bwa kulaminyina dibà, pààbi’s tuvwa anu bafwanyine kwangata mifundu pa umwe ne umwe wa ku bôbò abu ne kushaalapu, kadi mpindyewu bwa kulaminyina dibà’s. Paakafikaye kudi Yesu, wakapeta anu ditekeshiibwa dya mu maboko, yêyè mwine, kadi kî ndiitabuuja dyende to. Paakafikaye kudi Yesu, Yêyè kwamba ne: “Mémè ncyèna mutumiibwe bwa cisa cyenu nwènu to.” Kadàmù kaayipu kaa nkàmisha! “Mémè ncyèna mutumiibwe bwa cisamba cyenu nwènu to.” Anji dicinkilaayiku peenu, Mwine uvwaye muteekele diitabuuja bũngidì awu, kadi Yêyè awu kumwela mâyì ku makàsà. “Mémè ncyèna mutumiibwe bwa cisamba cyenu nwènu to, Ndi mutumiibwe anu mbwa Izaleela. Wêwè udi wa baa Bisamba bya bende, Ncyèna mene mutumiibwe kunudi nwènu to. Kabidi, pa kuumusha aci, nwènu’s nudi anu tubwà twa menemene etu.” Kya! Aci kacyakatacishaku diitabuuja adi to, ki kutungunukayi anu ne diya kumpala. Eyowa’s, kwambaYe ne: “Mémè ndi mutumiibwe anu kudi mikooko mijimine ya Izaleela.”

¹⁷⁷ Mpindyewu, bu ne ciine aci bavwa bacyãmbè umwe wa kutudi twètù aba anyi, kaa, ekelekele, nunku’s mmudifiite

kalaba. “Dingumba dyenu nwênù adi, kadyena ne bwa nsongo to.”

“Kaakakaka, Yêyè wamba dingumba dyanyi mushindu awu, mêmè ncyadyakuMuteelejaku kabidi to!” Uh-huh, s’ki bwalu mbwôbù abu. Wêwè ndaaku kûyaayà, wamonu’s, kwadyakupetaku wêwè mwine kantu nansha kamwe to. Shaala wêwè anu ne Dîyi adi. Mwaba udi Dîyi adi awu, nda wêwè anu naaDi. Diitabuuja dikaavwa dyele lwongo!

¹⁷⁸ Bamwe baa kudibo bavwa bafwanyine kwikala bambe ne: “Ee, mpindyewu, nênkwâmbilè cidi kwôkò, s’nebakuseke. Nebakwipate mu ekeleeziya wenu.”

“Bangiipate mwine. Nwamonu’s, s’bidi anu bilenga.”

¹⁷⁹ Yesu kwamba ne: “Mêmè ncyêna mutumiibwe bwa cisa cyenu nwênù to, Ncyêna mulweku bwenu nwênù abu to nansha kakese. Ne nwênù biine nudi anu tubwà twetu twa menemene etu, kî mbikumbane bwa Mêmè kwangata dyâmpà dya bânà kadi kunweleladi nwênù tubwà etu nansha.” Kyaa!

¹⁸⁰ Kadi bu ne ùvwa ngumwe wa kunudi nwênù ba-Méthodistes aba, umwe wa kunudi nwênù ba-Baptistes aba, ba-Presbytériens, umwe wa kunudi nwênù beena Mpenta aba? Kaakakaka, ekelekele! Nunku’s udi mwambe ne: “Mona’s, mushimakajanganyi wawa! Nênkambilè Docteur *Kampanda* ne *Kansanga* ne mba—mbabinge.” Wamonu’s, kwênàku wêwè ne diitabuuja to nansha dya kânà.

¹⁸¹ Mukaji awu yêyè uvwa mumanye ne mwaba awu nguvwa dikwacisha disanganyiibwa. Yêyè ukaavwa muumvwe bamba. Diitabuuja didi difuma ku dyumvwa. Ku dyumvwa dya cinyi? Dya Dîyi. Ùvwa mumanye ne mwaba awu uvwa cintu kampanda cya cilelela. Eyowa’s. Wâkatungunuka anu kacya wakwata. Nansha bu byôbì ne ùvwa... KwambaYe ne: “Mpindyewu, vuluka ne, Ncyêna mutumiibwe kunudi nwênù to. Taatù kavwaku muNtume kunudi nwênù baa Bisamba bya bende to, nwênù musumbà wa tubwà ewu. Udi peebe wela meeji ne Mêmè ndi mufwanyine kwangata dyâmpà dya bânà bwa kunweleladi nwênù musumbà wa tubwà tudi katuyi tukumbanyine etu ewu anyi? Ncyêna mutumiibwe kunudi nwênù to.” Kadi diitabuuja dyende divwa anu kacya dyakwata.

¹⁸² Mwaneetu, yêyè awu kavwa mucu mukoleshila mu nzubu wa luuya to, ùvwa ùkengèlâ kwikala kwengeleka, kutuuta cyanza bu mudi bikunyiibwa bikwabo bya leelu ewu ebi ne: “Kaa, ekelekele, ee, ncyadyakukuyaku kabidi to, ki cyônsò ncyôcì aci pa bwalu abu.” Kaa, ekelekele. Kabyena bikemesha to mùdì kuyiku mwa kukwata Mwele wa mvita wa diitabuuja awu, kabyena bikemesha to mùdì uduya cibanga pa Dîyi. Udi uya mwaba kampanda wùdì mwa kuumvwa kaacintu kampanda kakese kalamakaja kaa mushindu wa cilùmaacikàjì. Wêwè kaamuci kakoleshila mu nzubu wa luuya aka, wêwè.

Kaacîshiishi kakese kaa kumpala kadi kenza anu kakukunya nunku, kumba kakushipa, bikengela kwikalabo bakupwidijila anu manga dîbâ dyônsò. “Kaa, nciitu ngiitabuuja bintu abi to, matuku a bishima akaadi mamane kupita,” aci’s mbwanga bwa dipwidijilangana bwa dyabulu. Muntu wa kayiku dilabula’s!

¹⁸³ Kavwa yêyè aci to. Mwaneetu, awu’s uvwa mukole wa biyooyi. Bushuwa yêyè uvwa ne cintu kampanda. Úvwa anu kacya wakwata. Cyakenzaye ncinyi? Wakiitaba ne Yêyè nguvwa mwambe cya bushuwa. Úvwa misangu yônsò anu. . . Ne diitabuuja dilelela dya menemene, teejejaayi, nansha cyôci aci citape bulongolodi bwenu mputa anyi kaciyi citape to, dyôdi nediitabe Bulelela. Eyowa’s, mukalenge, Bulelela, diitabuuja. Wêwè ne diitabuuja, ne ciikâlè Dîyi dya Nzambi ne mulayi wa Nzambi, bidi bakwabo bamba nansha biikâlè binganyi, wêwè udi uDiitabuuja, udi uDiitaba. Yêyè wakamba ne: “Aci m’Bulelela, Mukalenge. Mêmè ndi mwena Ngelika, ncyêna mukumbanyine to. Ndi—ndi kabwà, ncyêna. . . Ncyêna—ncyêna mukumbanyine cintu nansha cimwe to, kadi cîndi mêmè ndonda’s cidi anu tusunsukila atu.”

¹⁸⁴ Mêmè ndi mulondi wa tusunsukila, mêmè mwine, kwêna wêwè nanku anyi? Ndi muswe mêmè anu tusunsukila, Mukalenge. Ndi mwa kwikala nciyi ne ekeleeziya wa bwena uvwabo nende mu Dituku dya Mpenta awu. Mêmè nciyi mwa kwikala nende to, Mukalenge, undekele mpete anu tusunsukila tudi tumata atu. Peetelo wakamba, mu Dituku dya Mpenta adi ne: “Eci ki Cyôci aci.” Ne mêmè nkaadi mwambambe misangu yônsò ne, piikalabi ne eci kî n’Cyôci aci to, nêntungunukè anu ne kulama eci too ne paalwa Cyôci aci, nudi numona’s. Eyowa. Eyowa. Nêntungunukè anu ne kulama eci too ne paamweneka Cyôci aci. Nwamonu anyi? Eci n’Diyi. Padi muntu kampanda. . . Ncyêna. . . Ndi—ndi—ndi mwa kwikala nciyi ne diitabuuja dikumbane dya kuya bu Enoka, dya kwenza kaalwendu kaa ngenda ngendakana mu mapingaja kadi kubànda kuya kwetu ne Nzambi, kadi nênwâmbilè cintu cimwepele eci ne, ncyakucyamananaku mu njila wa muntu udi yêyè ne diitabuuja dyâbûngi mushindu awu to. Eyowa’s, mukalenge. Piikalaye yêyè naadi, Nzambi atumbishiibwe, ndi ne kusakidila kwâbûngi bwa dyôdi adi. Dîyi adi dyèlè lwongo mwômò anu. Ndi ntekemena ne neDyèlè lwongo munda mwanyi mushindu awu paalwa lufu, mmona njila mukanguke dyamwamwa, kwasa anu lwendu nunku e kupatuka kuya. Ncyâ bushuwa. Eyowa’s, mukalenge. Kaa, pa nanku mêmè ndi ngenda ndondangana anu ne tusunsukila atu.

¹⁸⁵ Kadi, wêwè udi uteeta leelu ewu kwambila bamwe baa ku bantu baa cyena leelu aba ne, udi wêwè wangata anu tusunsukila atu. “Kaa, bwâlâ!” Padibo bôbò kabayi mwa kupeta mwaba wa kumpala to, kabeena baswa cintu nansha cimwe to. “Anyi neupweke kûndi mêmè eku. . .” Byenze

bu muvwa Naamana ne nsudi yende ayi: “Neupweke wêwè ulwe kutuuta byanza byebe abi pambidi paanyi apa ne neungambile bintu bishiileshiilangane byônsò ebi, ne bikwabo, bwa cyanaana ncyêna anu nCiitabuujuaku to nansha kakese. Ki mushindu ngwôwò awu. Mona’s, mêmè ncyakwalukilaku kabidi to.” Ki bwa cinyi kwêna upetaku kantu nansha kamwe to. Wamonu anyi?

¹⁸⁶ Bidi bikengela wêwè kwikala ne diswa dya kwangata tusunsukila. Nudi nucyumvwa anyi? Angata tusunsukila atu, wêwè mwaneetu wa balume, angata tusunsukila atu, wêwè mwaneetu wa bakaji, cyakupéeshaYe aci nansha ciikàle cinyi, ùCyâkidilè wêwè anu cyanaana. Wâmbè ne: “Nzambi,” uMwele twasakidila ne, “ndi anu ne ndambu mukese wa diitabuuja, kadi ndi mutwishiibwe ne nênshaalè anu kacya ngaakwataku ne nênkusâkidilè bwa Cyôci aci. Ndi ngiitabuuja ne ndi mwa kusangala. Eyowa’s, Mukalenge. Ndi ngiitabuuja ne Diyi dya Nzambi ndya cya bushuwa, ne nênshaalè anu kacya ngaakwata ku Cyôci eci. Nenku nêngûmvwè bîmpè.” Ûtangilè umone cidi cyenzeke. Angata wêwè anu kasunsukila, kasunsukila kaa katambe bukese aku. Bushuwa.

¹⁸⁷ Vulukaayi ne, yêyè kacya kavwaku mwanji kumona cishima to. Ûvwa mumpangaanu. Kacya kavwaku mwanji kuMumona mwenze bishima to. Kacya kavwaku mwanji kumanya ne Yêyè uvwa Nzambi to. Kavwaku mwanji kumanya to, anu ku dyumvwa patupu. Kadi paakafikaye kuntwaku, pâmwâpa, ne paakamonaye cintu kampanda cyakenzaYe, aci cyakashiiilangana. Nwamonu’s, bavwa babumvwa bamba ne: “Ee, nudi bamanye ne mu Bible wabo awu Ûdi wâmba ne Mukalenge neajuule Muprofeta, ne Yêyè neenzè bishima ne neamanye maalu masokome a mu mwoyi, ne neambile bantu maalu aa, ne bintu binene nebyenzeke.” “Aci mmwômò anyi?” Kacyapu yêyè kavwaku mwanji kucimona cyenzeke to, kadi wakaciitabuuja nansha bishi. Ki bwalu mbwôbù abu’s. Ke bwalu mbwôbù abu’s.

¹⁸⁸ Ndi mvuluka Laahaba ndumba awu, kacya kavwaku yêyè mwanji kumona Izaleela to, kadi wâkumvwa anu bamba, nenku kusokokaye batentekedi abu. Kuvilaye ekeleeziya wende sungasunga—wende sungasunga, baa kwabo sungasunga ne bikwabo byônsò, ki kusokokaye batentekedi abu, anu bwalu wâkumvwa bamba. Yêyè kaakambaku ne: “Anji indilaayi too ne pângûmvwà Yoshuwa uyiishaku musangu kampanda. Ngânji mpete wanyi mmwenenu paanyima paa mêmè mumane kumuteeleja uyiisha. Ngânji mmone Nzambi ukangula Mbû Mukunze kaaba kampanda, anyi ngânji mMumone wenza cintu kampanda cya nanku awu. Pâmwâpa dîbâ adi ndi mufwanyine kunusokoka nwênù bônsò bu ne ndiku mumone cintu cya nanku awu.” Yêyè kaakindila aci to. Wâkamba ne: “Ndi mwitabuuje. Tukââdi bumvwe bamba. Tukââdi bumvwe bamba.”

¹⁸⁹ Éyi Nzambi wa yaaya, mêmè nkaadi muumvwe bamba, ndi mumanye ne Yesu Kilisto udi umwèumwè awu makeelela, leelu, too ne kashidi. Ndi mumanye ne Yèyè udi Nzambi mumweneshiibwe mu mubidi. Ndi mumanye ne Yèyè mmusòmbèle leelu ewu mu Ekeleeziya Wende. Ndi mumanye ne Yèyè udi kaaba aka mpindyewu. Ndi mumanye. Ndi mumanye ne fotò uvwaYe mukwate awu kavwa wanyi mêmè to, Ndi mumanye ne ùvwa ng'Wende Yèyè. Ndi mumanye ne n'Dikunji dya Kapyà dimwedimwe adi didi neetu leelu ewu, bwalu Didi munkaci mwa kwenza byenzi bimbwebimwe abi, bimanyinu bimwebimwe abi, maalu a kukema amweamwe awu, bintu bimwebimwe byakenzaYe abi. N'Dikunji dya Kapyà dimwedimwe dyàkalombolà Izaleela adi. Piine apu, Yesu, muntu kana yònsò udi mumanye Bible ewu mmumanye ne Yèyè uvwa m'Mwanjelo wa Cipungidi, Mwanjelo uvwa uya kumpala kwabo mu cipeela awu. Kilisto kaakabalaku. . . Mòsà kaakabalaku bundu bwa Kilisto bu mabanji manene kutamba a Ejipitu anyi? Wàkalonda Dikunji dya Kapyà e kupatuka kuyaye mu cipeela.

¹⁹⁰ Yesu, pavwaYe. . . Paakamweneshiibwa Dikunji dya Kapyà adi, Yèyè wakamba ne: “Ndi mufume ku Nzambi ne Ndi nya ku Nzambi.” Úvwa walukila ku Taatù.

¹⁹¹ Pashiishe paanyima paa lufu Lwende, dijiikiibwa, ne dibiika dya ku lufu, ne dibàndà, Pòlò, Shawula uvwa musangu awu wa ku Taashishi awu, mu njila wenda uya mutangile ku Damaseke, wàkeediibwa panshi kudi Dikunji dya Kapyà dimwedimwe adi, ne muntu mukwabo nansha umwe kaakaDimona to. Bwònsò bwabo biimane bamunyungulukile, kabayi baDimone to, kadi Shawula yèyè wakaDimona. Ki Dîyi kwamba ne: “Shawula, Shawula, udi unKengesha bwa cinyi?”

Yèyè ne: “Wèwè udi nganyi, Mukalenge?”

Yèyè kwamba ne: “Ndi Yesu.” Wamonu's? “Ndi mufume ku Nzambi, Ndi nya ku Nzambi.”

¹⁹² Mpindyewu, bu mêmè mwa kunwambila ne mwoyi wa John Dillinger udi munda mwanyi, nudi bafwanyine kutekemena bwa mêmè kwikala ne bingoma binene pambelu apa ne kunwasa. Bu mêmè mwa kunwambila ne mwoyi wa muzodi kampanda udi munda mwanyi, nudi bafwanyine kutekemena bwa mêmè kuzola cimfwanyi cya muzodi kampanda. Teelejaayi, nwènù ekeleeziya! Kî nkunutandisha nnutandisha to. Tangilaayi, piikalabi ne Mwoyi wa Kilisto udi mu ekeleeziya, wòwò awu newènzè. . . Piikalabi ne Nyuma Mwîmpè udi mu ekeleeziya, piikalabi ne Dikunji dya Kapyà didi dikwaciibwe fotò kudi maalu a mamanya adi, ne bikwabo, ditudi tumona mu ekeleeziya emu dîbà dyònsò edi, piikalabi ne n'Nyuma wa Kilisto, Dyòdi nedyènzè byenzi bya Kilisto. Yesu wakamba ne: “Panwikala kanuyi mwa kungitabuuja Mêmè to, itabuujaayi byenzi bîNdi ngenza. Byòbi ki bidi biMfidila bujaadiki.” Piikalabi ne Nyuma

Mwîmpè uci di anu wa cya bushuwa, dîbà adi's Nyuma Mwîmpè ki wadifidila Yêyè mwine bujaadiki. Itabuujaayi byenzedi bya Nyuma Mwîmpè.

¹⁹³ Kukaadi diitabuuja dya budingibudingi ne didingidija bûngi cyanaana. Abi bidi ne cya kwikalaku. Nzambi utu mwambe ne nebilwe. Kadi bidi biteeta kwenza cinyi? Kwôkô kwikàle ndola wa mafi, bikengela ikale mwenzela pa wa cya bushuwa. Nukaadi bamonemone bantu balaka mukana bamba mudibo ne Nyuma Mwîmpè, kadi benda masandi, ne banwa maala, ne bikwabo byônsò, kabatu baMupete to. Badi bateeta kuMutentula. Kadi kudi muntu mushuwashuwale ne wa cya bushuwa utu muMupete, mupete Nyuma Mwîmpè, ne Nzambi mwikàle ushindika Mêyi Ende ku bimanyinu biikàle byenda bilonda. Ndumba awu wakumvwa bamba, yêyè kuCiitabuuja.

¹⁹⁴ Mpindyewu, mukaji ewu, mukaji mwena Syrophénicie ewu, wakiitabuuja pende, yêyè mwena Ngelika ewu. Wákamba ne: "Mukalenge." Wàkanji kwamba ne: "Wêwè Mwânà wa Davidi." Muntu wa baa Bisamba bya bende kèna ukwacila Kilisto pa bu Mwânà wa Davidi to; aci civwa nkupicila ku Mfumu Davidi, cisa cya beena Yuda. Yêyè kaakateyaku ntema kudiye to nansha ya kânà. Kadi paakakudimukaye ne kwamba ne: "Mukalenge, nkwàcishèku!" Amen, aci kadi kuMupetaci. Yêyè uvwa Mukalenge wende; kavwa Mwânà wa Davidi to, kadi Úvwa Mukalenge wende. "Mukalenge, nkwàcishèku!" Aci kadi kuMukwataci. Ki yêyè. . . Yêyè kukudimuka. Mukaji awu kwambaye ne: "S'ncyà bushuwa ne tubwà tûtu tûdya tusunsukila twa mâmpà tûtu tûmatà ku meesa a mfumu. S'ncyà bushuwa." Tangilaayi mùdi bwalu, mukaji awu wakenza diseemena dijaalame ku dipà dya Nzambi. Yêyè wakamba cinyi? Yêyè wakamba ne mukaji awu wakaseemenenaku mu mushindu mujaalame.

¹⁹⁵ Yêyè uvwa mumupwekeshe milongo, Mwambe ne: "Wêwè udi. . . Ncyèna mutumiibwe kunudi nwênù to. Nwênù nudi tubwà mu lukongo lweni. Byenu bisa bidi anu tubwà twa menemene etu. Ncyèna mutumiibwe kunudi nwênù to."

¹⁹⁶ Ki yêyè kwamba ne: "S'mbulelela, Mukalenge." S'ki Dîyi ndyôdi adi. Amen. Shaala ne Dîyi. Diitabuuja misangu yônsò ditu anu dijingulula Dîyi. "Kadi's tubwà tûtu tûdya tusunsukila twa mwinshi mwa meesa a mfumwatu." Aci kadi kuMupetaci. "Mukalenge, nkwàcishèku!"

¹⁹⁷ Wàkakùdimuka ne Wákamba ne: "Bwa edi dîyi kaayi, Éyi mukaji wa yaaya, diitabuuja dyebe ndinene. Nenku, bwa edi dîyi kaayi, démon wâshiyikù mwaneebe wa bakaji awu." Cinyi, yêyè wakapeta cinyi? Wàkaseemena ku dipà dya Nzambi mu mushindu mujaalame. Bikengela wêwè kuseemena. . . Nenku, vulukaayi ne, awu uvwa mmuntu wa nzànzànà wa baa Bisamba bya bende wàkenzelabò kwôkô cishima kudi Mwânà wa Davidi

kacya. Vulukaayi ne, aci ki civwa cishima cya nzànzànzà cyàkenzelàbo muntu wa baa Bisamba bya bende, ncyà bushuwa, dyondopiibwa edi dya mukaji mwena Syrophénicie. Ncyà bushuwa. Wàkenza diseemena dijaalame ku dipà dya Nzambi. Diitabuuja ditu diitaba ne Dìyì ndya cya bushuwa. Ne kaneemu, ne didipwekesha. Nwamonu anyi?

¹⁹⁸ Kwéna uya eku uya eku wenda wamba ne: “Huh! Ncyà—ncyakwitabuujuaku cintu aci to. Piikalabi ne kateshismu keetu kakeena kacymba to, uh-huh, mêmè ncyèna mmonaku to.” Cìdì kateshismu keenu kamba nansha ciikàle cinganyi, wèwè udi uteeka kateshismu anyi cintu cikwabo cyònsò kumutu kwa Dìyì dya Nzambi anyi? Dìyì dya Nzambi ndidi dilelela. Bikwabo byònsò mmashimi. Nwamonu anyi?

¹⁹⁹ Kadi yèyè wakalwa ne kaneemu kònsò, ne ditalala, ne kaneemu, ne didipwekesha dyònsò. Bidi bikengela wikale mudipwekeshe. Njila wa dibànda muulu ùtu ndipweka panshi, misangu yònsò. “Ewu wadipwekesha neabandishiibwe, kadi ewu wadibàndisha neapwekeshiibwe.”

²⁰⁰ Tangilaayi Marta dituku adi. Kaa, ndi mumanye ne ndi munkaci mwa kunulama ntanta mule, kadi nèn—nènnùfutèci mûngà musangu nenku nyiishe kaadiyiisha kîpì menemene. Teelejaayi, ndi mfuma ku dipeta bikwabo bintu bya dyamba anu patudi twakulangana apa, nêntungunukè. Ndi ntekemena ne ncyèna munkaci mwa kukeepesha lutuulu lwenu to. Marta, yèyè uwua, uwua ne disuminyina dyàbûngì menemene mu Bwikadi bwa Yesu. Tangilaayi, yèyè wakaseemena mwaba awu e kwamba ne: “Mukalenge.” Mpindyewu, vulukaayi ne, yèyè wakaMutumina mukenji bwa kulwa kusambidila mwanaabo wa balume, kadi Yèyè kayi mulwe to.

²⁰¹ Mpindyewu, mu Yone 5.18, Yesu wakamba, Yone 5.19, ngeela meeji ne mmwômò amu, Yesu wakamba, paakapicilaYe ku dijiba dya Beteseda kwaka, ne kumonaYe, Yèyè uwua mumanye ne muntu kampanda uwua ne bulema bùkaavwà bwenze bidimu makumi asatu ne mwandamukulu. Tangilaayi, bantu batwe ku binunu bibidi biimane mwaba awu, bânà baa mu maboko baa mitu midyundakanangane, balema, bampofo, bilemenda, beena bidimba byuminyine, bikonyangale. Yesu kupicila ku dijiba adi, kukenzakana nseke yònsò, mùle tente ne dinanga, mùle tente ne dyumvwilangana dya luse. Nwamonu’s, twètù katùtu bamanye ne dinanga didi diswa kwamba cinyi to. Tutu tudyangata twètù anu luseke lwa buntu. Mùle tente ne dyumvwilangana dya luse, bushuwa, nwènù bàtù bààkulà bwa dyumvwilangana dya luse dya bantu. Dyumvwilangana dilelela dya luse nkwenza kwa diswa dya Nzambi. Nwamonu anyi? Ki dyòdi adi.

²⁰² “Kaa, ncyèna mufwanyine kumwambila kantu nansha kamwe to, bwalu yèyè ùtu nsongaalume mulenga. Yèyè—yèyè—yèyè ùtu unwa maala, ùtu wènza *bikampanda*.” Bidi

bimukengela Kilisto. “Ncyêna mufwanyine kumwambilaci to, bwalu ûkaadi mwena ekeleeziya awu kukaadi ntanta mule. Ncyêna mufwanyine kumuteelela dyondopa dya kudi Nzambi to.” Kaa, mwaneetu, kùtu wêwê mumanye ne dyumvwilangana dya luse ncinyi to.

²⁰³ Yesu wakapicila mwaba awu, Yêyè uvwa mumanye diswa dya Nzambi. Vulukaayi ne, Ûcivwa ufuminaku—Ûcivwa ufuminaku ku dibiisha dya muntu ku lufu. Nenku vulukaayi cyâkenzekâ mwaba ewu. Wâkapicila ku dijiba adi aku, kuyiila kumpenga kwa dijiba edi, kuvwa baamaamù ne bâna bakese baa mu maboko. Bavwa bateeta kwindila bwa Mwanjelo wa Mukalenge kuvwandululaye mâyi awu. Yêyè kuyiila lwa kwine aku, kuyaYe kudi muntu uvwa ne mateketa kampanda, twâmbè ne ndisaamâ dya mpâci wa mênyì. Ûvwa naadi kukaavwa bidimu makumi asatu ne mwandamukulu. Dikaavwa dilaale bikole. Kadivwa mwa kumushipa to. Yêyè kwamba ne: “Udi muswe kwondopiibwa anyi?” Kadi bishi bwa mpofo eyi, balema aba, mpofo eyi, bilemenda ebi, beena bidimba byuminyine aba? Yêyè ne: “Udi muswe kwondopiibwa anyi?” Nudi numona’s, Yêyè uvwa mumanye anu menene kuvwa kukengela kuya. Nzambi, Dîyì, nguvwa uMulombola awu. Mpindyewu, Yêyè kwamba ne: “Udi muswe kwondopiibwa anyi?”

²⁰⁴ Yêyè ne: “Mukalenge, ncyêna ne muntu nansha umwe wa kungeelaku mu dijiba to.” Yêyè uvwa mwa kwendela kuulu. Yêyè ne: “Pâncidì ngenda mpweka apu, mukwabo muntu udi umpita kumpala.”

²⁰⁵ Yêyè ne: “Ambulaaku kalaalu keebe walukile kwebe kumbelu.” KuMwelabo nkonko. Ki kuteekabo Yesu ku tubâdi bwa kuMwelabo nkonko.

²⁰⁶ Nenku bu Yêyè mwa kwenza cintu cimwecimwe aci leelu wa Ndaaya ewu, s’mmufwanyine kwediibwa nkonko. Ncyâ bushuwa’s. “Mushiye binunu bibidi, mbaa kupita naabo bishi biine abu’s? Mêmè’s ndi mumanye Mwaneetu mukulakaji *Kampanda* kuntwaku. Mwaneetu wa bakaji *Kansanga*, s’mmukaji mwîmpè. Mbashaale balâadika kuntwaku kukaadi bidimu makumi abidi. Bu ne kuvwaku cya Nzambi mu Yêyè amu, nunku’s mMupwekeku ne mukenze ciine aci.” Dyabulu umwèumwè wa kale awu’s udi wamba cintu cimwecimwe aci leelu ewu. “Bu ne Wêwè ewu udi. Bu ne cikampanda cidi. Bu ne cikansanga cidi.” Dyabulu umwèumwè wa kale awu, nwamonu’s, cintu cimwecimwe cya kale aci.

²⁰⁷ Pa nanku Bafaalesa aba bakaavwa baMwela nkonko mwaba awu pa biine bintu ebi. Mutangilaayaku Yêyè: “Bulelela, bulelela, Ndi nzwambila ne, Mwânâ kêna mwa kuDyenzela cintu nansha cimwe to anu cidiYe umona Taatù wenza.” Yêyè—Yêyè’s ukaavwa mupete cikeena-kumona. Cikeena-kumona ncyâkaMuleejâ. “Cindì Mêmè mmona Taatù wenza aci, ki

cidi Mwânà wenza pende.” Yesu Kilisto udi umwèumwè awu makeelela, leelu, too ne kashidi. Nwamonu’s, Nzambi umwèumwè awu.

208 Mpindyewu, Marta, mu Bwikadi Bwende, yêyè uvwa mwimane mwaba awu. Kwambaye ne: “Mukalenge, bu ne Wêwè uvwa mwaba ewu.”

209 Mpindyewu, Yêyè kavwa mulwe bwa cinyi? Bwalu Taatù uvwa muMuleeje cikeena-kumona ne Lazârô uvwa ufwa. Mpindyewu, tangilaayi, bôbô—bôbô kutuma mikenji, kadi Yêyè kuya ku cimenga cikwabo. Ki kutumabo cyakabidi mikenji, Yêyè kuya ku cimenga cikwabo. Ki ndekeelu wa byônsò kwambaYe ne: “Lazârô mmulaale tulu.” Kaa, bôbô...Ki mèyì avwaYe naawu ngôwò awu. Kakùtu lufu bwa mwena Kilisto to. Tudi bamanye aci.

“Kaa,” mwakambabo, “piikalabi ne mmulaale tulu, s’udi wenza anu bilenga, udi wikisha.”

210 Yêyè ne: “Kadi’s mmufwe,” ubambila mu ngaakwilu wabo bôbô. “Kadi Mêmè nyaaya kamubiisha.” Kaa!

211 KuyaYe tamakatamaka too ne mwaba uvwa mwânà wa bakaji awu, kaa, mêmè ndi mwa kucimona’s. KubwelaYe mu cimenga aci, ndi mwa kuumvwa muvwa beena Yuda bamba ne: “Huh-uh, kadi’s ki mwondopyanganyi wa kudi Nzambi wawa! Huh-uh. Bôbô kujuuka kushiya anu ekeleeziya wabo, ne bikwabo byônsò, bwa kuMulonda. Kadi pakaadi bwalu kashondo bumweka, ne mulunda Wende mwine, Yêyè kulapula kupatuka cimenga. Baamutuminyi mikenji, mpindyewu ki kwalukilaYe nkôkô eku.” Yesu kutungunakaye wenda anu uya.

212 Kadi Marta mwânà awu, cintu kampanda munda mwa mwoyi wende, cintu kampanda’s. Yêyè uvwa misangu yônsò mwenze anu bu udi ne njingàjingà, uvwa muswe kulama nzubu ne mankenda ne bikwabo byônsò, kadi Mariya yêyè uvwa uteeleja Dìyì. Kadi apa ki paakalwaye kuleeja civwaye, kupatukaye buludi e kuya kwôkô aku. Mpindyewu, yêyè mwânà wa bakaji awu, nudi bamanye cîndi mêmè ngiitabuuja, ùkaavwakù anu mubale bwalu bwa mukaji mwena Suunèmà awu, mwena Suunèmà, nudi bamanye’s, mu Bible. Mpindyewu, cyakambaye ncinyi? Yêyè kupatuka, kwamba ne: “Mukalenge.” Ki civwaYe ncyôcì aci. Bivwa bimweke anu bu ne uvwa ne bukenji bwa kuMudyula, kwamba ne: “Kuvwa mulwe bwa cinyi? Mona’s, katwakwikala mwa...Bwa mpindyewu tudi twitabuujuaku ne Wêwè udi anu munsantu mubunguluki wa mu malaba wa cya bushuwa.” Nwamonu’s, nunku cishima aci kî ncyenzeke to.

213 Nenu ki bwa cinyi kaciyena mwa kwenzeka leelu ewu to. Kaa, Yêyè’s udi mwaba ewu mu mmwenekelu wa Nyuma, kabiyi ne nudi nuMumona to, kadi bidi ne: Yêyè udi Nyuma ne Dìyì Dyende. Nwamonu anyi? Kaa, bushuwa’s. Nusambila

bwa ditabulujá, dya dibwayika mu ekeleeziya nunku, cintu kampanda anyi cikwabo cyenzeka, ne muntu kampanda wela lubila ne “butumbi kudi Nzambi, aleluuyah,” nwênù bafwanyine kukanga ekeleeziya awu. Kanwena bamanye ne ditabulujá ncinyi to. Kilisto ulwa mu ekeleeziya, kadi dîbà adi kanuyiku nansha nuMuleeja mwakidilu mulenga to. Wènza cishima ne wòndopa muntu kampanda, ki nwênù abu: “Ee, civwa anu cifwanyine kwikala lubuku.” Kabyena bikemesha to mudiYe kayi mwa kukwata mudimu munkaci mwenu. Kabyena bikemesha to padi mu ekeleeziya wa Laodikiya... Ûdi ùsanganyibwa pambelu, ùkookola, ùteeta bwa kwalukila mu ekeleeziya Wende Yèyè mwine. Ki cikondo citudi ne mwoyi mpindyewu ncyòcì aci. Mangumba aa mmaMwipate mu mushindu wa ne Yèyè mmulwe kusanganyibwa pambelu, ùteeta bwa kwalukila munda. Ncya bushuwa’s, mwipata mwela pambelu!

²¹⁴ Mpindyewu, tudi tusangana ne Marta wakaya too ne kuvwaYe aku, e kwambaye ne: “Mukalenge, bu ne Wèwè uvwa mwaba ewu, nunku mwaneetu wa balume kî mmufwe to. Kadi nansha mpindyewu, cyònsò ciWalomba Nzambi aci, Nzambi neaKupeesheci.”

²¹⁵ Mutangilaayi numone, Yèyè’s uvwa umwela diteeta. KwambaYe ne: “Mwaneenu wa balume neabiike ku lufu.”

²¹⁶ Yèyè ne: “Eyowa’s, Mukalenge. Ûvwa nsongaalume mwîmpè, neabiike mu dibiika dya ku lufu dya bantu bònsò. Neabiike ku lufu ku dituku dya ndekeelu.”

²¹⁷ Yèyè ne: “Mêmè ndi Dibiika dya ku lufu ne Mwoyi.” Ki pavwa diteeta mpôpò apu. Muntu mwimane mwaba awu wamba ne... Yèyè uvwa Muntu umwepele ukààvwakù ne mwoyi, Muntu umwepele wîkalakù ne mwoyi udi mufwanyine kwamba aci, Mwànà wa Nzambi, ne: “Mêmè ndi Dibiika dya ku lufu ne Mwoyi.”

²¹⁸ Bible mmwambe ne: “Kakuvwaku bulenga nansha bukese bwa twètù bafwanyine kuMutangila to.” Pàmwäpa tukaaya Twende tukese tukobame atu, mubange kutoloka mvyá, pacivwaYe ne bidimu makumi asatu kadi baMumona bu uvwa naabi makumi ataanu.

²¹⁹ Baakamba ne: “Wèwè ewu mwikàle anu ne bidimu makumi ataanu cyanaana, kadi wamba ne Ukaadi mumone Abraham. Bwa mpindyewu kaayi twàmányi ne Udi mupàle.” Nwamonu anyi? Mudimu Wende pàmwäpa ngùkaavwà muMupawule.

²²⁰ Yèyè kwamba ne: “Kumpala kwa Abraham kwikalaku, Ndi.” Amen. Bòbò kabavwa bacimanye to. S’ki Yèyè awu mwaba awu mubwikila mu mubidi wa buntu.

²²¹ Yèyè ne: “Mêmè ndi Dibiika dya ku lufu ne Mwoyi. Ewu udi ungiitabuuja Mêmè, nansha byòbì ne mmufwe, kadi neikale

ne mwoyi. Ewu yônsò udi ne mwoyi ne ungiitabuuja Mêmè kaadyakufwaku to. Udi witabuuja aci anyi?”

222 Yèyè ne: “Eyowa’s, Mukalenge. Ndi ngiitabuuja ne Wèwè ki Mwâna wa Nzambi uvwa ne cya kulwa pa buloba awu.”

“Nudi bamujiike penyi?”

223 Ndi ne kaacintu kakese mwaba ewu kânkaadi mwambambe misangu yônsò, nudi bamanye’s, mêmè ndi ntekemena ne bu mêmè mwa kutapa muntu ku mwoyi ncyêna ncyenza ne meeji a kumutapa to. Mukaji mukwabo wa beena Science Chrétienne wakangambila musangu mukwabo, wamba ne: “Mwaneetu Branham, wèwè udi utamba kutwa Yesu makumbu be.”

224 Mêmè ne: “Kaa, to, to.” Mêmè ne: “Ncyêna ntwa makumbu mfika nansha pa cyabibidi cimwe cya mudibi bikumbane to. Mvwa mwa kujingaku bwa kwikala ne mukwabo mwakulu wûndi mwa kuMutwa naawu makumbu.” Nwamonu anyi?

Ki yèyè ne: “Ee, wèwè udi uMuvwija Nzambi’s.”

Mêmè ne: “Yèyè’s uvwa Nzambi! Ûcidi anu Nzambi. Yèyè neikale Nzambi kashidi.”

Yèyè ne: “Yèyè’s uvwa wa cifwaka. S’Ûvwa muntu.”

Mêmè ne: “Ûvwa Muntu ne Nzambi byônsò bibidi.”

225 Yèyè ne: “Mêmè nênkujaaadikilè ne Yèyè uvwa anu muntu wetu wa cifwaka ewu, ku Bible webe wèwè awu.”

Mêmè kwamba ne: “Ngǎnji ngũmvwèbi tũng mùdi ucinjaadikila.”

226 Yèyè kwamba ne: “Yone Munsantu, nshapita wa 11, Yesu wakaya ku lukita lwa Lazàrô ne Wàkadila mwadi.”

Mêmè ne: “Ki webe Mufundu mwine awu?”

Yèyè ne: “Eyowa.”

227 Mêmè ne: “Mwaneetu wa bakaji!” Ncyêna ngamba eci bwa kwikala ne meeji a kunyangakaja cijila to. Ewu mwaba kî ngwa dyelela bilele to, kadi ngâkacyâmba anu bwende yèyè. Mêmè kwamba ne: “Aci’s ncipeepele kupita ne nsupu mwenza ne mundidimbi na nzolo mufwe nzala’s.” Mêmè ne: “Mona’s, wèwè’s udi mumanye anu bîmpè bitambe ne kî nkufwanyine kwikala cintu bu aci to.” Mêmè ne: “Lekela nkwambileku cintu kampanda.”

228 Ki Yèyè uyààya ewu, ne tukaaya tukobame, wenda udila mwadi, Yèyè udi udila neebe paudi udila. Ûdi umvwa bisaama byebe. Yèyè m’Mwakwidi Munene udi mwa kulengiibwa kudi dyumvwa dya mateketa ebe. Ûdila mwadi, wenda ùpweka mutangile ku lukita, mumanye cikaavwà Taatù muMwambile. Bwalu Yèyè wakamba ne Kavwa wenza cintu nansha cimwe pavwa Taatù kayi muMuleeje to. Ki Yèyè awu, nwamonu’s, wenda ùya. Ûvwa uya bwa kamubiisha ku lufu, kadi Ûvwa

mwa kudila mu mushindu wa buntu pamwe ne bantu. Wènda ùya mutangile ku lukita, ùdila mwadi. Kadi Yèyè mmwenze anu wimana mwaba awu anyi, kaa, ekelekele, kwambaye ne: “Umushaayi dibwe adi.”

229 Bòbò ne: “S’ùkaadi ùnunka!” Dyùlù dyende dikaavwa dibeetelele. Mèbà makumi mwandamutekete ne abidi, nwamonu’s, anyi matuku anaayi a mundaamuunya ne a bufuku. Nwamonu’s, mpala wende ukaavwa mubeetelele, ùkaavwa munyangukangane, ùkaavwa mubole.

230 Yèyè ne: “Umushaayi dibwe adi.” Yèyè kwimanyina paanyima apu e kwamba ne: “Taatù, Ndi nKwela twasakidila bu mùkaadi Wèwè anu muNteelejeteleje misangu yònsò, kadi Ndi—Ndi paanyi mwambe eci anu nanku.” Nwamonu’s, Yèyè ukaavwa mumane kuMwambila’s. Yèyè ne: “Ndi ngamba eci paanyi anu bwa badi biimane mwaba ewu aba.” “Lazàrò, patuka!” Amen. Nenku muntu uvwa mufwe kukaavwa matuku anaayi awu, kujuukaye e kwimana ne kwikalaye ne mwoyi cyakabidi. Awu’s uvwa mutambe ne muntu. Awu’s uvwa mutambe ne muntu. Cya bushuwa’s.

231 Awu’s uvwa mmutambe ne muntu wâkatùùluka ku mukuna diloolo kampanda, mwikàle ne nzala, wènda ukeba bwa kumona cintu kampanda cya kudya. Ûvwa m’Muntu, Ûvwa ne nzala ya cintu kampanda cya kudya. Kadi paakangataYe mishipa yitaanu, anyi tuubisukwita tutaanu ne mishipa yibidi, ne kudiisha bantu binunu bitaanu, awu’s uvwa mutambe ne muntu. Neya bushuwa. Aci’s ncilelela. Eyowa’s, mukalenge.

232 Ûvwa m’Muntu pavwaYe mudyădije mundekeelu mwa bwâtù diloolo adi, mucyoke cyokòò, bukole bupatuke mu Yèyè, ku diyishiha ne dyondopangana, ki kaadémon kujuukaku, ne pàmwăpa démons binunu dikumi ya mu mbû, myambe ne: “Bwa mpindyewu kaayi netuMushipe kwòkò mu mâyi, Yèyè nyawu mulaale tulù.” Mwakenzabo Pòlò kuntu kwaka mu mvula wa cipupu awu. “Bwa mpindyewu twâMupeci, twâMukwàci mu buteyi. Mmulaale tulu, netutukije anu bwine bwâtù bwabwa.” Dyabulu utuma kapeepe kende kopicila mwaba awu, ki bwâtù kubanga bukaadi butankakana buya muulu bupingana panshi mushindu awu. Mavwala kâyikù nansha mwa kuMubiisha to. Ûvwa m’Muntu mudyădije mundekeelu mwamwa, mucyoke, mulaale tulu.

233 Kadi mMwenze anu utabuluka anyi, kaa, maawu wa yaaya maawu! “Kaa, nda kabishaayi Yesu!” Dya ùtèèka anu dikàsà Dyende. . . Kaa, ekeleeziya wa yaaya, s’ki civwa cikengela nwènù kwenza’s. Mèmè’s mvwa njinga ne ngikalapù nanshà ne ndambu wa dîbà nunku ndi muyiishe mpindyewu, nwamonu’s, pa cyôci aci. Nwamonu anyi? Dya ùtèèka anu dikàsà Dyende pa mwonji wa bwâtù abu, ùtàngila muulu, ki kwamba ne: “Puwaayi, bătamăayi!” Nwamonu anyi? Ki mavwala ne mpeepele ayi

kuMutumikilabi. Awu's uvwa mutambe ne muntu's, s'bivwa bikengela Nzambi bwa kwenza aci nanku.

²³⁴ Eyowa, Yèyè wakadila mwadi pa nkuruse, ùlòmba luse. Aci ncyá bushuwa. Wàkapeta nyoota pa nkuruse. Wàkafwà bu muntu. Kadi mu dinda dya Paasaka, paakabunguluja Mwanjelo dibwe adi, ne Muntu ukààvwa mufwe, kucimuna lufu, iferno ne lukita byònsò, kupatuka, mupete bucimunyi pa lufu, iferno ne lukita. KwambaYè ne: "Ndi Ewu uvwa mufwe, kadi udi ne mwoyi kashidi ne kashidi." Awu's uvwa mutambe ne muntu. Ûvwa n'Nzambi mu Muntu awu. Eyowa's, mukalenge.

²³⁵ Diitabuuja kadituku divila Bulelela Bwende nansha. Kaa, bu mudi dîyì dya ne: "Dikunji dya Kapyá, aci kacivwa cilelela to. Ne bishima bya Mòsà abi kabivwa bya cya bushuwa to," mudibo bafwanyine kwamba misangu yònsò amu. Nansha mudibo bu bicimbè amu, bidi bishaala anu menemene ne Dîyì. Anu menemene. Kaa, wèwè's udi mwa kwikala—wèwè's udi mwa kwikala musuminyine. Udi mwa kwikala munanukile nî mpa dîbà kaayi pònsò paudi bulelela ukwata Dîyì dya Nzambi apu, paudi kacya washaala mukwateKu.

²³⁶ Bu muvwa Miika, Miika anu mwaba awu mene, pavwa baprofeta nkama yinaayi abu biimane mwaba awu bamba ne: "Ndaaku, Aakaba, tungunuka ndaaku." Miika yèyè uvwa mumanye ne cikeena-kumona cyende civwa cikumbanangane ne Dîyì dya Nzambi. Kwambaye anu Dîyì nansha bya munyi. Bòbò kwamba ne: "Netùkukùpè mu buloko, ne netukupeeshe màyi a dikenga ne dyàmpà dya dikenga."

²³⁷ Kwambaye ne: "Nwankupaayimu panwikala baswe." Yèyè uvwa bishi? Ûvwa munanukile. Ûvwa mumanye Dîyì dya Nzambi. Ûvwa mumanye diswa dya Nzambi. Ûvwa mumone cikeena-kumona. Ûvwa mumanye ne civwa ncinyi. Cikeena-kumona civwa cifumine kudi Nzambi, bwalu bikeena-kumona bivwa bipetangana ne Dîyì dya Nzambi. Leelu ewu, bidi bikengela bwa mwena kwitabuuja yònsò alwangane mvita, ne bidi bikengela ulwangane, wèwè peebe.

²³⁸ Abidi adi panshi aa muntu kampanda uvwa undondela, wamba mwakayaye ku...yèyè ne: "Udi mumanye's, kaa—kaadémon kakese menemene kaa bunene *ebu* kavwa kajuuke e kwimana kumpala kwanyi musangu kampanda mu ciloota." Yèyè ne: "Démon awu kwambaye ne, 'buu'; ki paanyi ne, 'umf.' Nenu," mwakambaye, "musangu wònsò wûmvwà anu ntupika ngaalukila cyanyima, ùvwa yèyè anu wenda udyunda kadi mèmè ngenda nkeepela." Yèyè ne: "Katanci aka anyi, 'buu,' ki mèmè kutupika ngaalukila cyanyima. Ki yèyè... musangu wònsò uvwaye anu wenza 'buu, buu' awu," mwikàle ùmutùpikila. Kwambaye ne ùkaavwa anu walukila cyanyima, walukila cyanyima, walukila cyanyima. Yèyè ne: "Kushaalaye munene mumpite mèmè." Ki yèyè ne: "Mèmè kumanya ne bivwa

bikengela bwa mêmè kulwangana nende. Pa nanku mêmè—mêmè ncyakapeta cintu nansha cimwe to, ki mêmè kwambula anu Bible, nenku mêmè. . . yêyè kwenza ne ‘buu’; mêmè kwenza paanyi ne, ‘buu.’” Yêyè ne: “Kubangaye ùkaadi yêyè wenda ushaala mukese.” Ncya bushuwa.

²³⁹ Ki cidi cikengela wêwè kwenza, angata Dîyì dya Nzambi. Kabvena bikengela wêwè kwenza ne “buu” to, kadi amba ne “EMU MMUDI MUKALENGE WAMBA!” Ikala musuminyine, imana pa Dîyì! Dyôdi ndidi Bulelela! Twêtù tudi twitabuuja Dîyì leelu ewu. Tudi tuDiitabuuja muvwa Miika muDîtàbùje amu. Tudi baDîtàbùje mudi bakwabo baa kudibo biitabuuja amu. Nansha bantu búngì munyi bamba ne n’Dya mashimi, Dyôdi didi anu dilelela. Yesu Kilisto udi umwèumwè awu makeelela, leelu, too ne kashidi. “Ewu udi ungiitabuuja Mêmè, byenzedi bìndi Mêmè ngenza yêyè neabyènzè pende.” Muntu kana yònsò ewu mmufwanyine kukwondopa anyi? To, mukalenge. Ncimana kwenza, ukaadi mumane kwondopiibwa. Muntu kana yònsò ewu udi mwa kukusungila anyi? Aci ncimana kwenza. Mbanganyi badi biitabuuja nanku? “Yêyè *wakamana* kutapiibwa mputa bwa matomboka etu. Yêyè *wakamana* kuzaajibwa bwa bubu bwetu.” Ncya bushuwa anyi? Cya bushuwa. “Ne ku mibundabunda Yende *twâkamana* kwondopiibwa,” bwalu bumana kwenza. Cyònsò cidiYe mwa kukwenzela aci cikaadi cimane kwenjiibwa.

²⁴⁰ Mpindyewu Yêyè mmuteeke mu ekeleeziya, bwa kulama ekeleeziya mu njila ku Dîyì, cinyi? Bapostolo, bapofeta, balongeshi, bampaasata, batangadiki, midimu ya ekeleeziya. Batumiibwe kudi Nzambi, kabayi babiikidiibwe kudi bantu to. Batumiibwe kudi Nzambi, bantu basonsodiibwe bwa kulama ekeleeziya mu njila. Mpindyewu, ncinyi ciine aci? Mapà a Nyuma mu ekeleeziya. Kî mmushiki wa dikolesha dya maalu to, kadi cya bushuwa mapà a Nyuma mu ekeleeziya. Aci ncya bushuwa, alama ekeleeziya. Ekeleeziya mulelela yêyè mwikàle muteeka mu mudimu kudi Nzambi, mùle bulelela ne Nyuma Mwîmpè, mpekaatu yêyè anu mudidinge mumweneke mu ekeleeziya, mmufwanyine kwikala mukwabo wa bwena wa ba-Ananiya ne Saafila awu. Padi ekeleeziya mulelela. . . Mêmè ndi njinga kubwela mu wa nanku, kumona bakaji ne balume bònsò mu bwenzeji bwa Bukole bwa Nyuma Mwîmpè. Muntu yêyè anu mudidinge mwenze cintu cya cibi, Nyuma Mwîmpè ujuuka dyakamwe ucisokolola. Mbifwanyine kukengediibwa bwa kwikalabo badikezule. Ki mapà a Nyuma mu ekeleeziya ngòwò awu. Éyì Nzambi wa yaaya, watùtùminakù ekeleeziya wa bwena awu’s, watùtùminakù wa bwena awu. Nudi nuciitabuuja anyi? Kilisto, Yêyè mmufwe anyi? Ùdi ne mwoyi.

Ûvwa Yêyè bishi? Wàkambila mukaji awu mwaba awu. . .

²⁴¹ Wàkamba, paakaMukonka Mufaalesa kampana bwa cimanyinu, Wàkamba ne: “Nwènù lukongo lwa beena masandi

nudi nukeba cimanyinu.” Ncya bushuwa anyi? Lwa beena lwonji ne beena masandi! Wakamba ne: “Bòbò’s nebacipete. Nebapete cimanyinu aci, beena lwonji ne beena masandi abu!” Ndìbà kaayi dikaadiku lukongo lwa beena lwonji ne beena masandi kutamba lutudi naalu mpindyewu elu? Ndìbà kaayi dikaadiku mpekaatu mupite búngì? Twètù ki badi ne bantu bapite búngì pa buloba mpindyewu mene, mudibo batwambila, bantu bààbúngì bàkaadiku pa buloba mpindyewu mene kutamba mukaatubo pa buloba kacya anu ku Adama kwaka, s’mbàdi pa buloba mpindyewu mene aba. Elu ki lwòlò lukongo lwa beena lwonji ne beena masandi alu. Babàkyanganyi baa balume ne balume ne baa bakaji ne bakaji, dinyangakaja dya maalù, bintu byònsò, byenda bivulangana binunu ne binunu. Ekeleeziya yipambuka: “Beena mitu mikole, badibàndishi, banangi baa masanka kupita kunanga kwa Nzambi, kabayi bakumbaja mēyi adibo bamba, basongwedyanganyi, kabayi ne kudikanda, badyombodi baa aba badi bimpè, biikàle ne cimwenekelu cya difwana dya Nzambi,” mudi Nyuma mwambe, “kadi biikàle bavila Bukole bwadi. Tapuluka ne baa nanku awu!” Nwamonu anyi? Bible mmwambe ne: “Tapuluka!” Mu dyòdi dituku adi mmutudi ne mwoyi emu.

²⁴² Mpindyewu, vulukaayi ne, kudi bantu badi baya eku ne eku, bamba ne: “Ndi ne bukole bwa kukwondopa.” Mulumyana awu udi ukwambila mashimi. Yèyè kènàku ne bukole bwa kukwondopa to. Kilisto ngukààdi mumane kucyenza! Kaa, mu kutondelangana kwa mpekaatu, ne bikwabo, ne nsaserdose anyi mwambi kampanda ukufwila luse ku mpekaatu yebe? To, mukalenge, mpekaatu yebe yikaadi mimane kufwidiibwa luse. Paakafwa Kilisto pa nkuruse apu, Wakamba ne: “Kwajiki.” Cinyi? Ndongamu mujima, bintu byònsò. Kilisto ngwàkacyènzà ku nkuruse. Ukààdi mumane kusungidiibwa. Ngènzàmpèkààtù yònsò mmusungidiibwe, kadi aci kacyakukukwacishaku to pawikala kuyi mucitàbe. Udi uya katwa binù ku cyoshelu kwaka wela mbila, udila mwadi too ne muwatoloka mvyà ne mwakutuuka nsuki ayi, kacyakukukwacishaku to pawikala kuyi mwitabuuje, witabuuja ne Kilisto wakafwa pa kaaba keebe, ne wèwè. . . Yèyè wakafwa bu difuta dya cibawu bwa mpekaatu yebe, paudi uMwitaba bu Musungidi webe. Dìbà adi lupandu ludi lulwa kùdì. Ncintu cimwecimwe aci bwa dyondopiibwa. “Yèyè wakatapiibwa mputa bwa matomboka etu, ku mibundabunda Yende tudi bondopiibwe.”

²⁴³ Kudi cintu anu cimwepele cidi Kilisto mufwanyine kwenza leelu ewu bwa kuleeja ne n’Yèyè. Cintu cya kumpala, ncya ne, bikengela witabuuje mwimanyine pa Diyì Dyende. Aci ncya bushuwa menemene, bulelela bwa Diyì. Kadi Yesu wakamba ne: “Byenzedi bìndì Mémè ngenza!” Mpindyewu, Yèyè kacya kaakambaku ne: “Ndi ngondopa” muntu kampanda to. Piikalabi ne Yesu wakamba ne: “Kí m’Mémè udi wenza byenzedi to, n’Taatu Wanyi udi musòmbèle munda Mwanyi,”

mpindyewu piikalabi ne Yesu kavwa muswe kwangata dîna dya “mwondopyanganyi wa kudi Nzambi,” nêtwâmbè bishi bwa cinyonga kampanda bu mêmè ewu kunu, anyi muntu kampanda mukwabo, anyi muntu mukwabo kana yônsò ewu, uteeta bwa kwikala mwondopyanganyi wa kudi Nzambi? Mmunyi mûdi mwa kwikala mwondopyanganyi wa kudi Nzambi padibi ne cyôci aci ncimana kwenza, muntu yônsò uvwa mwa kwondopiibwa awu mmumane kwondopiibwa? Bûdi wêwè naabu mbwa kuciitaba, kuciitabuja. Mpindyewu, mbulelela anyi? Citudi baswe kumanya ncyôci aci. Mbulelela anyi?

²⁴⁴ Mpindyewu, piikalabi ne kwêna mufwanyine kwangata dîyi dyanyi mêmè, udi anu mufwanyine kuya, anyi dyebe... Mêmè nciyi mufwanyine kwangata dîyi dyebe wêwè to, ndifwanyine kwikala ne cya kuya. Kadi Nzambi katu mushindu awu to, Yèyè udi utuma mapà mu ekeleeziya, bapostolo. Mupostolo nganyi? Missionnaire. Missionnaire, mwaku ewu *missionnaire* udi wumvwija ne “ewu udi mutumiibwe.” *Mupostolo* udi wumvwija ne “ewu udi mutumiibwe.” *Muprofeta*, awu “mmwena lùmòndò.” Mpaasata, mulongeshi, mutangadiki, bintu byônsò abi, badi baabanya mu mushindu mujaalame Dîyi dya Nzambi, baDituulula, ne pashiishe ma—mapà a Nyuma bwa kukwatawu mudimu mu ekeleeziya, bwa kushindika Dîyi, bwa kuleeja ne Yesu Kilisto udi ne mwoyi ku ekeleeziya.

²⁴⁵ Mpindyewu, tudi bônsò bamanyangane, aka kadi anu kasumbu kaa ekeleeziya wetu twêtù. Ncyêna mumanye ne kudiku... Ncitu mwaba ewu misangu mipitepite bûngi bwa kumanya ne mbeenyi anyi kî mbeenyi to, ne bikwabo. Kadi, nwênù balunda baanyi, leelu ewu, nwênù badi bâsaamà mpindyewu abu, bu ne kuvwaku cintu kampanda cya dyenza bwa kunukwacisha, mvwa mwa kucyenza. Bu ne mvwa mumanye ne kudi muntu kampanda usaama mwaba ewu, nangananga mwaneetu wa bakaji ûndi mmona pa kalaalu kaa babeedi ewu, bu ne mvwaku mumanye ne kudi cintu kampanda cîndi mufwanyine kwenza, bu mudi kwangata cîcyela cya meeya makumi abidi ne ataanu, ne kwenda kucipuusa ne dyûlù panshi ngenda nyunguluka ntanta wa musumba wa nzùbù, nyunguluka ngalukila, mvwa mwa kucyenza. Mvwa mufwanyine kupatuka buludi kwaka ne kwamba ne: “Kanulu ne dikumbi bwa kumbwikila to, nanshi mvula mwa kwikala umata, ndekelaayi mpuuse anu kupuusa. Ndi muswe kuleeja Nzambi ne mêmè ndi ne meeji matooke.” Mpindyewu, aci kî ncifwanyine kwikala ne dikwacisha nansha dikese to. Nkaadi muye mu Afrike, ne ndi mumanye myaba yidibo balaala pa misongolo mu Inde, ne bintu bya mishindu yônsò, benza didifila dyabo kudi tunzambi kampanda, ne beelela ngandu bânà baabo balela, ne bikwabo byônsò. Kî ng’aci nansha; aci mmeeji matooke, kadi muntu ne meeji matooke ônsò udi anu mwa kunwa acide carbolique bu ne mbwanga. Nwamonu

anyi? Nwamonu's, wêwè—wêwè bidi bikukengela... Cintu cidi bulelela ncitudi tujinga kumanya eci, ne Nzambi ngutu ufila bujaadiki bwa Bulelela Bwende. “Ewu udi ungiitabuuja Mêmè, byenzedi bîndi Mêmè mwenze yêyè neàbyènzè.” Ebelu 13.8: “Yesu Kilisto umwèumwè awu!”

²⁴⁶ Yêyè mmufwanyine kwikala cinyi bu wêwè mwa kuMukeba leelu ewu? Mêmè munwămbile ne Kilisto udi munda mwanyi emu, Kilisto udi munda mwebe amu, citudi mwa kukeba ncinyi? Udi mufwanyine kukeba muntu kampanda mwikàle ne muteelu wa nshingu wa nkoolò, ne cintu kampanda anyi? To, to, Yêyè kavwa wenza maalu mushindu awu to, Yêyè uvwa uvwala anu muvwa bantu bônso bavwala amu. Bu yêyè ne bibangu mu cyanza anyi? Muntu kana yônso ewu's mmufwanyine anu kudyenza bibangu mu cyanza, bibangu bya mêmè. Badi naabo makumi ne makumi mu ditunga dijima emu patudi twakulangana apa, batentudi, ne mashi ne kapya ne mwîshî, ne byônso. Aci kî—aci kî n'Dîyi to! “Byenzedi bîndi Mêmè ngenza!” Yesu wakamba ne: “Panwikala kanuyi mwa kungitabuuja Mêmè to, itabuujaayi byenzedi bîndi ngenza. Byôbî abi ki byaMfidila bujaadiki. Byôbî abi ki bidi byamba ne Mêmè ndi Nganyi.”

²⁴⁷ Mpindyewu twănji tusambilaayi katanci. Ikala ne malomba ebe pa mwoyi webe. Taatù wa mu Dyulu, ndi mumanye ne eci civwa cya cităpa ne cishile. Ndi ndomba bwa Wêwè kwikalaku ne luse. Ncyêna ne meeji aa ne... Wêwè ngudi mumanye mwoyi wanyi, Mukalenge, kadi ndi ndomba anu bwa Wêwè kunkwacishaku mpindyewu. Ndi ndomba bwa Wêwè kwenzaku bwa mêmè aa, nansha mudiwu mapandulukangane ne makosolokangane, ne—ne kâyi mudibi bikengela bwa mwambi kwenzaye to, Mukalenge. Ne mêmè mwaba ewu, nciyi wa kalaasa kalonga, nciyi mumanye mwa kwakula ne bantu, kadi cyônso cîndi mumanye cidi anu ne Wêwè wăkalaya ne mêmè mubuulule mukana mwanyi Wêwè neùmÿjè. Kukaadi bidimu makumi asatu ne cimwe kûndi muKweyemena mu cyôci aci. Pa nanku, Taatù, mu mwaba kampanda, pămwăpa bamwe baa ku bantu mbangululeku ndambu wa Mêmè, badi băsaaamă abu, anyi badi dijinga ne Kilisto abu. Badi—badi kwaka mu mwaba kampanda. Badi—badi Neebe dijinga, Mukalenge, ne ndi ntekemena ne cintu kampanda ncyambiibwe cidi cibandishe diitabuuja dyabo mu milayi Yebe. Ndi ndomba bwa Wêwè kufilaku dibenesha adi.

²⁴⁸ Mpindyewu patucidi ne mitu yetu miinyika apa, kudiku munda emu aba badi kabayi bamanye Kilisto bu Musungidi, badi bafwanyineku kwamba ne: “Mwaneetu Branham, ncyêna—ncyêna muswe kufwa mushindu ewu to. Ncyêna—ncyêna mukumbanyine kufwa to. Mêmè mufwe, ndi mufwanyine kujimina. Ncitu mulediibwe cyakabidi to. Ncya bushuwa ne ngaa—ngaaingiku disambila dyebe adi ngamba kufwa mpindyewu mene. Nsambidilêku, ndi ngènzămpèkăât?”

Swaku wêlè anu cyanza cyebe muulu cyanaana, wãmbè, ne: “Umvulukeku anu...” Nzambi akubeneshe, wêwè, wêwè, wêwè. Nzambi akubeneshe. Ikala wamba wambilamu nanku bulelela munda mwa mwoyi webe. Nzambi anubeneshe. Byanza dikumi ne bibidi anyi makumi abidi ne binaayi mu kasumbu kakese kaa bantu aka mwaba ewu. Dyanza dikese dya bantu edi mwaba ewu, batwe ku lukama anyi nkama yibidi, cintu bu nanku awu, kadi monaayi byanza dikumi ne bibidi. Anu mwaba unudi awu. Ku cyoshelu nkweku kûle tente ne bânâ basòmbekù. Kakwenaku mushindu wa mêmè kunufikisha ku cyoshelu to, kadi, anu mwaba unudi nusanganyiibwa awu, sambilaayi pamwe naanyi.

²⁴⁹ Taatù wa mu Dyulu, nyewu ndwa Kûdi ne bantu aba badi beele byanza byabo muulu. Mêmè ndi ngiitabuuja ne mbacyènzè ne meeji matooke a mu ndondo. Ubafikisheku ku dimanya ne mbashipe mukandu wònsò wa maalu a mamanya anu mwaba awu. Maalu a mamanya adi ajaadika ne maboko etu adi ne cya kwikala anu mapwekesha, bwalu dikokiibwa dya kudi buloba didi ditulamina panshi. Kadi bidi bileeja ne kuvwa Nyuma kampanda munda mwabo udi ne bukontononyi, bukole kampanda pa diboko adi, budi bwenze ne badyélè muulu ditàngile kudi Mufuki wâkadyènza. Aci ncidileeje anu mwaba awu mene. Kí ncifwanyine kujaadikiibwa ku maalu a mamanya to, bwalu Nyuma udi umanyiibwa anu...Cidi ndiitabuuja kampanda. Twètù tudi tuMwitabuuja. Nenku mwaba ewu Nyuma kampanda mmulwe kudibo mubãmbile bwa kwelabo byanza byabo muulu, bwa ne bavwa baswe kusungidiibwa.

²⁵⁰ Mpindyewu, Taatù Nzambi, nyewu ndi njingulul-...ndi nteela milayi Yebe. Mukalenge Yesu Kilisto wakamba, pavwaYe pa buloba apa ne: “Muntu nansha umwe kêna mwa kulwa Kûndi padi Taatù Wanyi kayi mwanji kumukoka dyambedi. Ne bônso badi Taatù muMpe, nebalwe Kûndi. Ewu udi umvwa Mèyì Aanyi ne witabuuja Ewu wâkaNtùma, udi ne Mwoyi wa Cyendeleele. Ewu udi udya Mubidi Wanyi ne unwa Mashì Aanyi, udi ne Mwoyi wa Cyendeleele, ne Mêmè nêmmubiishè ku lufu ku dituku dya ndekeelu.” Yôyi eyi mmilayi. Mpindyewu, bantu aba kabavwa mwa kwikala beele byanza byabo muulu bu kakuyi Nyuma uvwa mwa kwikala mubãmbile ne mbapiile to. Kabavwa mwa kwikala benze cyôci eci bu Wêwè kuyi mudyanjile kubalongolola to. “Bônso bakaadi Taatù,” *bakaadi*, bwalu bumana kwenza, “mumpe Mêmè, nebalwe.” Twètù tudi badyànjila kulongolwela Mwoyi wa Cyendeleele. Aba baakadyanjilaYe kumanya, mMubabiikile; aba badiYe mubiikile, mMubabingishe; aba badiYe mubingishe, Ûkaadi mumane kubatumbisha ku mèsù kwa Nzambi. Cidi anu ncikeena-kumona cinene cya Nzambi cyenda ciya, ciikàle munkaci mwa kuula. Bantu aba, kumpala kwa difuka dya dyulu ne buloba, Wêwè Udi kuyi mikalu awu ngukãavwa mumane

kumanya disangisha edi mu dinda emu, ne mumanye ne bôbò nebelè byanza byabo muulu, ne mpindyewu nyewu beele byanza byabo muulu.

²⁵¹ Ki cyônsò cîndi paanyi mumanye mwa kuyilapu, Mukalenge, n'Dîyî Dyebe. Pashiishe, mu Dînà dya Yesu Kilisto, nyewu Nkupeesha badi beele byanza byabo muulu aba, bu bitadi bya bucimunyi bya Dîyî Dyebe. Ubalameku, Éyî Mukalenge Nzambi, muntu nansha umwe kèna mwa kubanyenga mu cyanza Cyebe to. Ubapeesheku Mwoyi wa Cyendelele. Swaku bakapeteku ekeleeziya kampanda, anyi bashaale anu piine apa mu dinda emu ne babatiijiibwe bwa dilekelediibwa dya mpekaatu yabo, anyi ditonda dya diitabuujja dyabo. Swaku bwa ne, paapatukabo mu mâyî, anu muvwa Nyuma Mwîmpè ku cibangidilu wendakana pamutu paa mâyî amu, swaku bwa Nyuma Mwîmpè ikalepu bwa kuuja myoyi yabo ne misuuka. Enzaku nanku, Mukalenge. Swaku bwa biikàle ne nsòmbelu wa difwana dya Nzambi matuku abo ônsò a mwoyi, ne baleejiibwe bu bitadi bya bucimunyi ne mabwe a mushinga mukole ku cifulu Cyebe cya butumbi mu dituku adi. Ku Yesu Kilisto Mukalenge wetu, nkutudi tulombela nanku. Amen.

²⁵² Mukalenge anubeneshe. Mpindyewu, ncya bushuwa ne bivwa bikengela ngiikale mumane kuya kukaadi dîbà dijima. Kadi mpindyewu netubiikile mulongo wa babeedi. Anji indilaayi tûng, kudi twarta twa disambila tudibo baabanye anyi? Kudiku badi bapete twarta twa disambila anyi? Billy udi penyi, Billy udi mwaba ewu anyi? Umwe too ne ku makumi ataanu? Yêyè mmwambe ne mmwabanye twarta twa disambila makumi ataanu. Ee, mpindyewu, katwena ne mushindu to, kudi bantu bapitepita bûngi biimane kuulu. Mpindyewu, nwènù bônsò nuduku mwa kwanyisha bwa kutupa mpindyewu anu ndambu wa dîbà cyanaana anyi? Piikalabi ne nudi...Mpindyewu, bwa byônsò bîngâmbî...Mpindyewu, anu—anu katanci kakese cyanaana, ndi mumanye ne nshima kayaakulungula to. Anji indilaayi kakese, *Eci* ncipite, *Eci* ncîmpè kupita nshima miine ayi (bivwa bikengela biikale nanku): Dîyî dya Nzambi.

²⁵³ Teelejaayi nwènù balunda baanyi, ndi muswe nnwêlèku lukonko elu kumpala kwa mêmè kwamba bwalu ebu. Citûtù tuyiila mu ekeleeziya ncinyi? Byônsò abi bitu mbwa cinyi? Piikalabi ne kakwena dibiishiibwa dya bafwe to, piikalabi ne kakwena dibiishiibwa dya ku lufu to, nanku's tudyayi, tunwayi, tucyonkomokaayi, bwalu nyawu katwena cîngà cintu to anu bitupa bya mici, tubwà, ne bikwabo, nansha bishi. Twêtù katwena twitabuujja aci to. Tudi bamanye ne kudi Nzambi udi ne mwoyi. Cya bushuwa. Ee, piikalabi ne Yêyè awu n'Nzambi udi ne mwoyi, ndi muswe nnukonkeku cintu kampanda. Nenku Méyî ângâmbî aa, nudi bafwanyine kutwa ku cyanyi, nudi bafwanyine kubenga kutwa ku cyanyi. Kadi piikalabi ne nudi nutwa ku cyanyi bulelela, kadi nansha nanku nudi—nudi anu

mwa kutungunuka ne kucyela mpatà too ne panwacimona cimweneshiibwa. Aci ncyá bushuwa. Piikalabi ne n'Diyi dya Nzambi, bikengela Nzambi ashaale mukwate ku Diyi Dyende. Yèyè kayi ushaala mukwateKu to, ee, dîbà adi kî n'Nzambi to, dîbà adi mêmè—mêmè ndi mwena mashimi, ndi. . . Ndi mwenze dimweneshiibwa dya mashimi, ndi—ndi muprofeta wa mashimi. Kadi piikalabi ne ki mudi Nzambi mwambe, Nzambi udi ushaala mukwate ku Diyi Dyende. Nenku piikalabi ne Nzambi udi ushaala mukwate ku Diyi Dyende, Diyi dimwepele, udi mwa kwikala musuminyine dîbà adi. Udi mwa kushaala mukwate ku mulayi webe ne kuwulama. Ncyá bushuwa anyi?

²⁵⁴ Mpindyewu, tangilaayi, ngakwambidiku ne mêmè ndi mufwanyine kukwondopa anyi? Bwâlâ, mukalenge. Mêmè ncyêna mufwanyineku kukwambila ne ndi mufwanyine kukusungila to anu ne udi musungidiibwe dîbà adi. Mêmè ndi ngiitabuuja ne udi musungidiibwe. Kuvwa mufwanyine kwikala mwele cyanza cyebe muulu bu Nzambi kayiku mukwambile bwa kucyela muulu to. Mpindyewu nyewu kudi mâyi mwaba ewu, bwa wamona mwa kubatijiibwa dîbà kana dyônsò dyûdi muswe adi. Pawikala muswe bwa kubatijiibwa kudi webe. . . mu ekeleziya wenu nwênù, tungunuka ndaaku, cyônsò ciikalaku aci. Katwena mwaba ewu ne bya buumambala to nansha kakese, nwamonu's, twêtù tudi anu—twêtù tudi anu kazubu kaa dikuukwila cyanaana mwaba ewu. Mpaasata wetu mulenga, Mwaneetu Neville ewu, uvwa Méthodiste, kadi udi mwaba ewu anu. . . Twêtù tudi bantu badi kabayi basungulujangana bilondeshile mangumba to. Tudi. . . muntu yônsò mmwakidila bilenga. Tudi anu tubwejamu disangisha. Tudi tuyiisha, tusambidila babeedi. Tudi twitabuuja divwiya dya bantu balwa bayiidi bwa Kilisto, katuyi twenza cintu kampanda cilwa bulongolodi to. Nwamonu anyi? Katùtù twitabuuja abi to. To, mukalenge. Mpindyewu, paudi muswe kwenza bulongolod-. . . paudi muswe bulongolodi bwenu, tungunuka ndaaku. Abi's—abi's bidi anu bîmpè menemene, kadi kwikadi mukùükilekù mwoyi to. Kwikadi muteekeku dyeyemena to. To, mukalenge. Ikala uyamu bwa bwobumwe, kadi ikala ne dyeyemena kudi Nzambi.

²⁵⁵ Mpindyewu, mpindyewu, cintu cimwepele ncyôci eci. Piikalabi ne Kilisto uciidi anu ne mwoyi. . . Mpindyewu, twangataayi cyakabidi kaaMufundu kakese kamwepele mpindyewu. Tudi baswe kwikala batwishiibwe mpindyewu ne byônsò mbitooke. Kaacintu kakese kânkaavwà ne ngâmbè kukaadi katanci, Yèyè wakamba ne: “Lukongo lwa beena lwonji ne beena masandi nduswe—nduswe kupeta cimanyinu.” Cívwa ncimanyinu cya Yona, dibiika dya ku lufu. Ncyá bushuwa anyi? Mbanganyi badi biitabuuja ne aci m'Bulelela? Mpindyewu ndi muswe anu bwa mmone cyanaana. Beena lwonji abu. . . Nudi nwitabuuja ne elu lukongo ndwa beena lwonji, ne beena

masandi anyi? Ee, cimanyinu cya Yona ncifwanyine kwikala cinyi? Ncifwanyine kwikala dibiika dya ku lufu dya Kilisto. Ncya bushuwa anyi? Dibiika dya ku lufu dya Kilisto, ki didi difwanyine kujaadikila lukongo lwa beena lwonji elu ne Kilisto uci di ne mwoyi, bwalu, Yèyè mmubiishiibwe ku lufu mpindyewu kukaadi bidimu binunu bibidi, nenku aci ncidi cifwanyine kwikala cileegi cya dibiishiibwa dya ku lufu.

²⁵⁶ Ee, kudi beena Mishònyì neetu bààbûngì mu ditunga dijima edi badi kabayiku biitabuuja dibiishiibwa dya ku lufu dya mubidi to. Nkama ya ekeleeziya kayeena yitabuuja ciine aci to, dyalukila dya mu mubidi, anyi nî ncinyi to. Nwamonu anyi? Mèmè ndi ngiitabuuja dilediibwa dyena diina, lufu, dijikiibwa, dibiika dya ku lufu, Dilwa Diibidi, Kilisto Yesu mu byònsò. Eyowa's, mukalenge. Mèmè ndi ngiitabuuja ne Yèyè udi Kilisto mu kaabujima. Yesu umwèumwè wàkangaciibwa muulu awu, Yesu umwèumwè awu nealukile. Ne ndi ngiitabuuja Mupersona wa Nyuma Mwimpè, Yèyè udi apa mpindyewu, Nyuma Wende, Mwoyi Wende ukwata mudimu mu Ekeleeziya.

²⁵⁷ Mpindyewu, piikalabi ne eci ncya Kilisto. . . Mpindyewu nèmvwijè eci cya muntu nkaaya. Ndi ntekemena ne kanwena—kanwena nwènù nucyangata nanku awu to. Nèmvwijè eci cya muntu nkaaya mpindyewu, ku dipà dyàkafidiibwà. Bu mudibi ne, Eci, mu Washington Bukènkè ebu bùdimù bukùdika, Dikunji dya Kapya ditù dishindikiibwe kukaadi bidimu mu nyungulukilu wa buloba bujima adi, ne bikwabo. Mpindyewu, piikalabi ne Nyuma awu udi muneemu emu, díbà adi's Yèyè neikale. . . Piikalabi ne Yèyè awu n'Nyuma wa Kilisto, Neñzè byenzedi bya Kilisto. Mpindyewu, aci's m'Mufundu. Ne Wòwò ngwa cya bushuwa. Piikalabi ne Diyì adi ndilwe, díbà adi Diyì dīngānwāmbidi mu dinda emu adi didi Bulelela. Bwalu Kilisto kī mmufwanyine kulwa munda mwanyi bu mudi. . .

²⁵⁸ Ncyèna—ncyèna nwe—nnwelulwila nwènù beena Katolike to, kadi nwènù nudi nwamba ne nyuma wa Peetelo nguvwa mu ekeleeziya wenu kalekale wawa. Nudi nwela meeji ne mwena Yuda mmufwanyineku kuzanjika mpingu anyi? Nudi nwela meeji ne mwena Yuda mmufwanyine kuvila Nyuma Mwimpè kadi kwenza kapese kakese kaa cyostiya kateeka pa cyaltar, mwaba ùdi nkosa ne mpuku mifwanyine kukabakula, kadi nwènù peenu nutungunuka ne kwamba ne kiine aku kènji Nzambi? Mbwalu kaayi abu? S'nudi anu bamanye ne kī n'Nzambi. Nyuma Mwimpè n'Nzambi udi utuuluka ufuma mu Dyulu, Nyuma kampanda. Nutu nwènù nupona mikookwela kumpala kwa mpingu, nuteeta bwa kupongola mwo—mwoyi kampanda bwa kuwela mu cyòci aci. Wèwè's ki lupingu, Nzambi wela Nyuma Wende munda mwebe ne wèwè mwikàle mwinyàmpalà Wende udi ne mwoyi. Wamonu's, Nzambi udi munda mwebe wèwè, mwikàle upungisha baa pa buloba ne Yèyè mwine.

259 Mpindyewu netubiikile mulongo wa babeedi. Wambi ne udi mufile too ne penyi, kuumukila ku umwe too ne ku makumi ataanu anyi? Tubangaaku, tubangilaayi ku umwe. Nenku udi wamba bishi? Eyo, nebikengele anu bwa twêtù kubiikila ndambu ku musangu, bwalu yabo...Tumonebi, tubiikilaayi anu bantu batwe ku mwandamukulu anyi dikumi ku musangu. Nganyi udi ne karta kaa disambila kaa nomba umwe? Mpindyewu kwikadi...Anu, juukila anu kuulu padi nomba webe ubiikidiibwa, bwalu eci kî ncipalu mpindyewu to, eci ng'ekeleeziya. Eyo. Wamba ne? A—A, nomba umwe. Udi nende nganyi? Udiku mwa kulwila lwà apa anyi, inăbànzà, anyi ulondela apa lwà mwaba kampanda? Anu apa mene, wimanyine anu apa mene kumpala kwa cyoshelu eku. A, nomba ibidi, udi ne nomba ibidi nganyi? Karta kaa disambila kaa nomba ibidi. Mpindyewu, ela cyanza cyebe muulu lukasa bwa twamona mwa—twamona mwa...Eyo, picila buludi paanyima paa inăbànzà awu, bu wêwê mwa kuswa. Nomba isatu, nomba isatu. Ee, mwaneetu wa bakaji, wêwê kwê na mwa kujuuka to, nenku shaala musombèle anu mwaba awu, nenku nêndwe kukusambidila anu mwine mwaba awu. Nomba inaayi, A, nomba inaayi, ela cyanza muulu. A, nomba inaayi, nomba inaayi. Lwà mundekeelu mwamwa, mwamwa, lwà mundekeelu mwamwa. Eyo, nwamonu's, batu balwa anu kuneeku eku, nenku muntu yônsò udi naatu dijinga awu, batu bacyompakaja twarta etu ne batwabanyina bantu mushindu ewu, kùdì utukebela aku. Twêtù katutu bamanye to. Eyo, nomba inaayi, lwà kuneeku, inăbànzà. Nomba itaanu, nganyi udi ne nomba itaanu? Karta kaa disambila kaa nomba itaanu, swaku wêlè cyanza cyebe muulu lukasa. Mpindyewu katwena mwa kwangata dîbà dyàbûngì mpindyewu to, neupangile webe musangu. Nomba itaanu, nomba isambombo, eyo, nomba mwandamutekete.

260 Mpindyewu, twănjàayi kumona, bakwabo abu ba—ba—ba—ba—balwe. Tudi mwa kupeta etu nunku mu mushindu ewu. Nomba mwandamukulu, karta kaa disambila kaa nomba mwandamukulu, udi ne nomba mwandamukulu nganyi? Wêwê ki udi ne karta kaa disambila kaa nomba mwandamukulu anyi, inăbànzà, udi ne mwandamukulu anyi? Eyo. Ela cyanza cyebe muulu bwa mpete mushindu wa kukumona, wamonu's, ne ndîbà kaayi. Nomba citeema, nganyi udi ne nomba citeema? Eyo, mbîmpè, inăbànzà. Nomba dikumi, karta kaa disambila kaa nomba dikumi, nganyi udi ne nomba dikumi? Swaku wêlè cyanza cyebe muulu, nansha wêwê mwikàle nganyi... Eyo, mfwilaayiku luse. Eyo, muntu mulume udi apa ewu. Eyo, mukalenge, vwila apa. Nomba dikumi ne umwe, nomba dikumi ne umwe. Bu wêwê mwa kuswa ela cyanza cyebe muulu, nomba dikumi ne umwe.

261 Kwangaciku karta to pawikala kuyi mwa kukwata naaku

mudimu, nwênù balunda baanyi, bwalu wêwè—wêwè—wêwè—wêwè—wêwè. . . Nudi numona's, wêwè mujuuke mupatuke, ne kuyi mukwate mudimu ne karta keebe aku to, dîbà adi wêwè—dîbà adi wêwè—wêwè udi. . . kabivwa bikengela wêwè kwenza nanku to. Nomba dikumi ne umwe, nomba dikumi ne ibidi. Eyo. Anu apa mene, mwaneetu wa bakaji, nda anu paanyima mwikàle unyungulukila lwa paanyima. Nomba dikumi ne isatu, nyungulukila anu kuntwaku. Nomba dikumi ne inaayi, nomba dikumi ne itaanu. Abi mbîmpè, ki mushindu wa kubyenza ngwôwò awu. Nomba dikumi ne isambombo. Mpindyewu nukaadi nucyenza. Nomba dikumi ne mwandamutekete. Angataayi anu myaba yenu paanyima pààpa. Dikumi ne mwandamutekete. Twänji tumonaayibi tûng ne mbûngî kaayi bukwabo butudi bapete mpindyewu. Wamba ne? Lwâ mwikàle unyungulukila kwaka naka bu wêwè mwa kuswa, mwaneetu wa balume, bwalu nyewu bitubwelakana twêtù mwaba ewu. Nomba dikumi ne mwandamutekete, nomba dikumi ne mwandamukulu, dikumi ne citeema, makumi abidi, makumi abidi. Eyo. Ngeela meeji ne abi bidi anu bu bidì bikumbane mwaba awu, kakese nda—ndambu. Twänji tumonaayibi mushindu utudi twenda tupweka mu mulongo mwaba ewu, netumone. Makumi abidi, makumi abidi ne umwe, makumi abidi ne ibidi, makumi abidi ne isatu, makumi abidi ne inaayi, makumi abidi ne itaanu. Mpindyewu twänjàayi kumona bwa bôbô abu, tumone ne mbantu bûngî kaayi bakaadimu mpindyewu. Nomba makumi abidi ne itaanu. Ne mêmè ndi ngeela meeji ne netwikale anu batambe kuvulangana mwaba ewu, kanwenaayiku peenu nwela meeji nanku anyi? Makumi abidi ne itaanu, ngeela meeji, makumi abidi ne itaanu. Eyo, mpindyewu tucidi ne makumi abidi ne bataanu bakwabo bàcìdì bàlwa padi anu ewu—ewu musumbà ujika. Tudi ne bakwabo makumi abidi ne bataanu bàcìdì bàlwa. Eyo, makumi abidi ne itaanu.

²⁶² Eyo, mpindyewu twänjàayi kumona ne mbantu bûngî kaayi muneemu emu badi ne twarta twa disambila. Mbanganyi muneemu emu badi kabayi ne twarta twa disambila kadi bacîkàle anu baswe bwa Nzambi ànwôndòpè, elaayi byanza muulu. Itabuujaayi. Bu munudi ne. . . Kanuyi bapete twarta twa disambila to kadi baswe bwa Nzambi ànwôndòpè, elaayi byanza muulu.

²⁶³ Mpindyewu, pacidibo beelesha baba naka mulongo apu, mpeeshaayaaku ntema yenu mpindyewu, bwalu eci cyôcì anu cididinge cinupite mpindyewu ne—nenupange cya dyenza. Mpindyewu, netwangate dîbà dyabûngî, twangata anu dîbà dyabûngî. Mpindyewu, kanulwijakajiku to. Bikengela ngiikale mutuuje, mêmè mwine, bwalu Nyuma Mwîmpè mu bintu bya mushindu ewu katu mufwanyine kulaabaku maanyi mu mushindu wa dyenza wa nanku to.

264 Mpindyewu, mbanganyi mu cibambalu emu, anyi mu mulongo wa babeedi badi biimane apa aba, badi bamanye ne—ne . . . Ndi mumanye bamwe baa ku bantu aba. Ndi ngeela meeji ne ndi mubamanye. Ndi mumanye ne ndi mumanye inăbănzà udi mwaba ewu ewu, inăbănzà ewu. Ûtu ùlwa mwaba ewu mu ekeleeziya emu, ncyêna mwa kuvuluka dînà dyende to. [Mwaneetu wa bakaji awu udi wamba ne: “Baker.”—Muf.] Baker, uh-huh, ndi mumumanye. Ncyêna mutwishiibwe to, ncyêna . . . Ngeela meeji ne muntu munene muleemule udi mwimane apa ewu, ngeela meeji ne ndi mumumanye. Ncyêna mumanye dînà dyende to, kadi nkaadiku mumumone kaaba aka.

265 Ee, nansha bishi, muntu ne muntu wa kunudi nwênù badi mu mulongo aba, ne muntu ne muntu wa kunudi nwênù mu bateeleji badi basaama, udi mumanye ne ncyêna mumanye kantu nansha kamwe pa bidi bikutangila, ela cyanza muulu, paudi mumanye ne ncyêna mumanye. Eyowa’s. Nwamonu anyi? To. Ncyêna mumanye kantu nansha kamwe pa bidi binutangila to. Ndi mwenyi. Mpindyewu twănji tumonaayi cyakabidi mulongo wa babeedi, ela cyanza muulu, paudi mumanye ne ncyêna mumanye kantu nansha kamwe pa cidî cikutacisha mpindyewu. Eyo, eyo, eyo, anu pawîpi ne lukama pa lukama, ngeela meeji. Eyo, ne mu bateeleji mpindyewu, mpindyewu elaaayi byanza byenu muulu, nwênù badi basaama ne badi beela byanza muulu ne biikalà anu mwa kwamba ne mêmè . . . “Kî mmumanye mêmè anyi kantu nansha kamwe pa bidi bintangila to.” Nwamonu’s, kudi bantu bûngi cyanaana mwaba ewu. Ntu mbwela mpatuka, ne bamwe bantu ntu mubamanye ne bakwabo nciyi mubamanye to. Nwamonu anyi? Nenku ncyêna—ncyêna mumanye to. Ne biine bândi mumanye bîmpè abu, ncyêna mufwanyine kumanya lutatu ludibo naalu to.

266 Mpindyewu ndi muswe kunulombaku cintu kampanda. Mpindyewu piikalabi ne . . . Mpindyewu, tangilaayi, kuvwa mukaji mukese kampanda. Nwênù biikalà kanuyi mu mulongo wa babeedi abu, nwamonu’s, nwênù biikalà kanuyi mu mulongo wa babeedi abu. Mpindyewu, kuvwa mukaji mukese, musangu kampanda, yêyè kavwa mene mwa kwikala mu mulongo wa babeedi to, kadi ùvwa ne disaamà dya mashi alwa munda. Kadi ùvwa witabuujja ne Muntu awu uvwa wa difwana dya Nzambi. Mpindyewu, teejeaayaaku ne ntema mpindyewu, eci kacinupiciku to. Ûvwa witabuujja ne Yesu ki uvwa Kilisto awu, ki kwambaye ne “Bu mêmè anu mwa kulenga ku luzemba lwa civwalu Cyende.” Mpindyewu, kavwa ne Mufundu bwa ciine aci to, nwamonu’s, pâmwăpa anu bu mwakangata Eliya . . . anyi kwangata mulangala wende ne kuwuteeka pambidi paa mwânà awu, anyi cintu kampanda, nwamonu’s, anyi kulenga mifuba ya Eliya paanyima paa yêyè mumane kufwa. Kadi wakiitabuujja ne bu yêyè anu muMulenge ùvwa mwa kupeta civwaye ukeba aci. Kudifindaye mu musumbà wa bantu awu ne

kwololaye cyanza. Mpindyewu, kwôkò muntu ukààdikù mufike mu Palestine, bôbò batu ne civwalu cya mwinshi ne civwalu cya pamutu, ne ciine aci ncibazebelele. Ki bwa cinyi batu ne dyoweshangana dya mâyi ku makàsà ne bikwabo, lupwishi ludi lùbànda lubayiila ku makàsà. Ki kulengaye ku mubangubangu wa civwalu Cyende. Mpindyewu, bu yêyè mwa kulenga nkoooci wanyi ewu, nunku *ewu*, ncyêna mufwanyine kucyumvwaku to. Kadi pende's mmupweke mundamate pambidi. Kadi yêyè wakalenga kwinshi ku luzemba, ku mubangubangu, kùvwà misangu mikwabo kwikàle kule ne makàsà Ende mushindu *ewu*, anyi, ne mubidi Wende. Wakalenga ku mubangubangu wa civwalu Cyende, kwalukilaye e kusòmba, anyi cyônsò mene cyakenzaye aci. Yesu wakiimana.

²⁶⁷ Kadi, vulukaayi ne, musumbà wônsò wa bantu awu bavwa ne maboko abo... "Wetwawu, Laabi!" "Ne disanka be bwa kuKumona!" "Wèwè ki Muprofeta awu anyi?" "Tudi—tudi ne disanka be dya kuKumona." "Kaa, Wèwè cyena lubombo naanyi eci!" "Udi Muntu mulenga maalu be!" Kaa, mèyi anu mashiilangane's.

²⁶⁸ Mpindyewu teelejaayi ne ntema ya menemene. Pashiishe mukaji mukese ewu, kulengaye civwalu Cyende, ne kwalukilaye bwalu wakasankishiibwa mwakalengaye Nzambi. Yesu kwimana, kwamba ne: "WâNdengi awu nganyi?"

²⁶⁹ Peetelo kuMutandishaye, wamba ne: "Bônso's badi munkaci mwa kuKulenga. Bwa cinyi Udi wamba cintu cya bu nanku awu?"

²⁷⁰ Yêyè kwamba ne: "Kadi Ndi njingulula ne Ndi mupete butekete's, bukole mbupatuke mu Mêmè emu." Yêyè e kukenzakana eku ne eku kwa bateeleji too ne mwakalwaYe kupeta mukaji mukese awu, ne kumwambilaYe bwa disaamà divwaye naadi dya mashi alwa munda adi, ne dyakiimana. Ncya bushuwa anyi? [Disangisha didi dyamba ne: "Amen."—Muf.] Mpindyewu, mpindyewu, mpindyewu shaalaayi bakwate aci. Mpindyewu, nudi nutwa "amen" ku cyôci aci, mbwena kwamba ne "biikale nanku." Mpindyewu, monaayaaku mpindyewu, Bible udiku wamba, bwenu nwênù babadi beena Kilisto aba, ne Yesu Kilisto udi mpindyewu Mwakwidi Munene udi mwa kulengiibwa kudi dyumvwa dya mateketa etu anyi? Mbanganyi badi bamanye ne Bible mmwambe nanku awu? ["Amen."] Ee, piikalabi ne Yêyè udi umwèumwè awu makeelela, leelu, too ne kashidi, kî mMufwanyineku kwenza mushindu umweumwe wakenzaYe musangu awu awu anyi? Ee, dîbà adi, piikalabi ne nwênù badi basômbe aku abu nudi bafwanyine kuMulengela lwa kunudi aku, ne piikalabi ne mêmè ndi mwinyâmpalà Wende, Dîyi Dyende apa mpindyewu, kî mMufwanyineku kwamba cintu cimwecimwe cyakambaYe musangu awu aci anyi? Aci kacyna cimwekaku cya mu Mifundu anyi? Kî ncyà bushuwa anyi? Nwamonu anyi? Udi umanya munyi ne udi muMulenge

piikalabi ne kî mMwenze cintu cimwecimwe aci? Nwamonu anyi? “Byenzedi bindi Mêmè ngenza nenùbyènzè peenu.”

271 Eyo, mpindyewu nwênù badi kanuyi ne twarta twa disambila abu, sambila anu cyanaana wamba ne: “Mukalenge Yesu, nyewu ncivwa mufike apa pa dîbà bwa kupeta karta kaa disambila to, kadi nyewu nku—nkulomba Wêwè, ne ndi ngiitabuuja ne cidi muntu ewu mwambe m’Bulelela. Pa nanku nêngikale mwa . . . Kwênàku Wêwè mwa kuswa bwa ndenge civwalu Cyebe anyi, Mukalenge Yesu? Wêwè’s ki wanyi Mwakwidi Munene. Ncyêna mêmè ntangila kudi kaamuntu kaa mutu dibàlà kadi kiimane pààpa pa cibumba cya ku cyambilu kaka to. Ndi mêmè ntangila kùdî Wêwè, ne ndi nkulenga Wêwè, ne ndi ngiitabuuja ne Wêwè neungondope. Pa nanku, ndi nkulenga Wêwè, Wêwè wakule ne Mwaneetu Branham ne wènzè cintu anu cimwecimwe aci mwaba ewu bu muWakenzela mukaji awu. Nenku nènKwitabuuje ne mwoyi wanyi wònsò.” Nudi baswe kwenza nanku anyi? Mbanganyi badi baswe kwenza nanku, ela cyanza cyebe muulu, wamba ne: “Nê—nèncyènzè.” Eyo, sambila anu cyanaana. Mpindyewu mwaba wa wêwè kuteekela diitabuuja dyebe mu mudimu’s ki wòwò ewu. Ûcitàbùùjè, kùcyédiku mpatà to. Ûcitàbùùjè ne mwoyi webe wònsò. Amen.

272 Nenku dîbà adi nwênù badi mu mulongo wa babeedi, mpindyewu ki . . . Muntu wa kumpala ngwèpi? Anji vwilabi anu apa kakese. Mpindyewu, anji imanyina anu mwaba awu. Apu—apu mpakumbane, wamonu’s, anji imanyina anu mwaba awu. Ngeela meeji ne, kwènji katanci, wêwè ewu uvwa mwele cyanza muulu ne, ncivwa mukumanye to. Aci ncyà bushuwa. Katwena bamanyangane to. Eyo.

273 Mpindyewu ndi muswe kukonkaku bateeleji aba cintu kampanda. Ki byanza byanyi mbyôbi ebi byela muulu kumpala kwa Nzambi, ne yèyè uvwa mwele cyanza muulu ne katwena bamanyangane to. Mpindyewu, eci kî ncmfwanyi cya Yone Munsantu 4 mu Bible, pààkatwilanganà Yesu ne mukaji kampanda ku ciina cya mâyi anyi? Muntu mulume ne muntu mukaji baakatwilangana bwa musangu wabo wa kumpala. Kadi cyàkenzà Yesu ncinyi? Wàkabanga kuyiikilangana nende. CivwaYe wenza aci ncinyi? Mpindyewu, Yèyè wakamba ne: “Taatù . . .”

274 Bivwa bikengela bwa Yèyè kubànda ku Yelusalema, anyi ku Samaaleya. Mpindyewu, nwamonu’s, beena—beena Yuda bakaavwa bôbò bamone cimanyinu aci, bwalu Yèyè uvwa Muprofeta ne Wàkaleeja cimanyinu cya muprofeta. Ne kùtu—kùtu bisà anu bisatu bya bantu, ki beena Ham, beena Sem, ne beena Yafèfè. Mpindyewu, beena Yuda bôbò bakaavwa bamone cyabo cimanyinu, bwalu bwa sama bindile Maasiya. Bôbò kucimona. Mpindyewu beena Samaaleya bavwa ne cya kucimona, bwalu bavwa bindile Maasiya.

275 Baa Bisamba bya bende bôbò to, musangu nansha umwe Yêyè kaakenzaku aci kudi mwena Bisamba bya bende to, kadi Yêyè wakamba ciprofeta ne: “Mu matuku a ndekeelu,” bu mwakambaYe, “anu mwakadibi mu matuku a Noa ne mu matuku a Lota,” paakalwa Mwanjelo awu kwakula ne Lota, kwambila Sarah cyakenzaye mu ntenta paanyima Pende. Yesu mmwambe ne cyôci aci necyenzeke cyakabidi ku dituku dya ndekeelu. Mbabadi kaayi baa Bible badi bamanye aci? Nwamonu’s, cya bushuwa. Nwamonu anyi? Mpindyewu tudi mu matuku a ndekeelu, ncikondo cya baa Bisamba bya bende. Piikalabi ne Yêyè. . . Nwamonu’s, mwawa mwambe ku mbangilu wa diyiisha dyanyi ne, piikalabi ne Nzambi udi wenza cintu kampanda, uDimanyisha musangu kampanda, bikengela bwa Yêyè kushaala mushindu awu.

276 Pa nanku mmunyi—mmunyi mwakamanya Natanaela ne Yêyè uvwa Mwânà wa Nzambi? Mbwalu Yêyè wakamwambila mwaba uvwaye usanganyiibwa, cintu kampanda civwa cimumtangila.

277 Mukaji ewu wakamanya munyi? Tangilaayi, twänjàayi kwangata muyiiki wende, tumone ne mmushindu kaayi—mmushindu kaayi uvwaye mumanye ciine aci kutamba bayiishi bônso baa kuntwaku. Mukaji awu kupatuka e kuyaku. Úvwa mufwanyine kwikala mukaji mulenga kwîsù. Úvwa uya bwa kasuna mbekeci wa mâyi. Kukokaye mbekeci wa mâyi awu. Awu Yêyè uvwa mwena Yuda, mukaji ewu uvwa mwena—mwena Samaaleya. Nenku ewu, yêyè kukoka mbekeci wa mâyi, ne ciine aci ciikàle kaacifwanyikijilu kakese aku mùdi mùsanganyiibwà ciina cya mâyi aci. Cicidi anu mwômò amu mu Suukà. Pa nanku ki Yêyè awu musòmbe mwaba awu mushindu ewu, Yêyè kwamba ne: “Mukaji, Ntwàdilàku mâyi a kunwa.” Mukaji awu kukudimuka. Mpindyewu, ùvwa mukaji wa luumu lubi, nudi bamanye’s, ùkaavwa mubwelebwele mabaka misangu búngi cyanaana. Ki Yêyè ne: “Ntwàdilàku mâyi a kunwa.” Yêyè. . .

278 Yêyè kwamba ne: “Kacitu cilele bwa nwênù beena Yuda kulomba mukaji mwena Samaaleya cintu bu nanku to.”

279 Muiyiki’s, nwamonu. Taatù nguvwa muMutume kwôkò aku. Mpindyewu vulukaayi ne, Yêyè kavwa wenza cintu nansha cimwe Taatù kayi muMuleejeci to. Nwamonu anyi? Ki mpindyewu Yêyè kusomba mwaba awu, pa nanku ncinyi civwaYe wenza aci? Úvwa uteeta kujandula lutatu luvwa naalu mukaji awu, bwa yêyè wamona mwa kuya katwadila cisamba aci mukenji kampanda. Yêyè ne. . . Újinga kujandula lutatu luvwa naalu mukaji awu, nudi bamanye’s. Yêyè ne: “Ntwàdilàku mâyi a kunwa.”

Awu ne: “Kacitu cilele to.”

280 Yêyè ne: “Kadi bu wêwè nanshà mumanye ne Yêyè mwine ûdì wakula nende ewu nganyi, wêwè’s ki uvwa mwa kundomba Mêmè mâyi a kunwa.”

281 Yêyè ne: “Ee, ciina’s ncile be, Wêwè nyawu kuyi ne cintu nansha cimwe cya kukoka naaci. Mmunyi mûdi Wêwè mufwanyine kupatula mâyi mwômò emu?”

282 Ki kutungunukabo ne kuyiikila, muyiiki kukafikawu, too ne ku dikuukwila dya ku Yelusalema. CivwaYe munkaci mwa kwenza aci ncinyi? Ûvwa uteeta kupeta nyuma wende, bwa kumona civwa lutatu. Yêyè kucipeta. Nudi bamanye ne civwa ncinyi? Ûkaavwa ne baabayende bataanu. Ki Yêyè kwamba ne: “Nda ukangate bayeebe kadi ulwe mwab’ewu.”

Yêyè ne: “Mêmè ncitu ne bayaanyi bwalà.”

283 Yêyè ne: “Wambi bilenga, wambi bilenga, bwalu ukaavwa naabo kî mbângî kî mbângî bataanu ne mwine ûdì musòmbe nende mpindyewu awu kî mbayeebe to.”

284 Mpindyewu tangilaayi. Mpindyewu, yêyè kaakamba ne: “Yêyè ewu mmwena lubuku” to, bu mwakamba bayiishi abu. Kaakamba ne: “Yêyè m’Beelezebula” to. Wakamba ne: “Mukalenge,” teejejaayi, “ndi njingulula ne Wêwè ewu udi Muprofeta. Twêtù tudi bamanye ne paalwa Maasiya Yêyè ki watwambila bintu ebi.” Civwa ncimanyinu cya Maasiya.

Yesu kwamba ne: “Mêmè ki Yêyè udi wakula neebe ewu.”

285 Kuvukutaye lubilu e kubwela mu cimenga, wamba ne: “Kanumonaayi Muntu udi mungambile bintu bîndî mwenze. Kî m’Maasiya mwine anyi?”

286 Ee, piikalabi ne cyôci aci ki civwa cimanyinu cya Maasiya kudi beena Yuda, kudi beena Samaaleya, kî ncifwanyine kwikala cimanyinu cya Maasiya kudi baa Bisamba bya bende anyi? Maasiya dîbà adi, piikalabi ne mMubiike ku bafwe ne mwikàle ne mwoyi mu Ekeleeziya Wende, udimweneshilamu Yêyè mwine, kî mMufwanyine kwenza byenzedi bimwebimwe abi padibi ne Yêyè ngwâkalaya ne Neàbyènzè anyi?

287 Mpindyewu mêmè udi mwimane mwaba ewu ngaakula neebe ewu, ncitu mukumanye to, ncitu mwanji kukumonaku to kacya bandela. Wamonu anyi? Kadi bu Mukalenge Nzambi mwa kungambila cintu kampanda cyûdî muvwile mwaba ewu, wêwè ngudi umanya ne ncilelela anyi kî ncilelela. Wamonu’s, ùngambila cintu kampanda cyûdî mwenze, cintu kampanda civwà kacyi cikengela wêwè kwikala mwenze to. Bu Yêyè mwa kukwambila ne ncinyi cyûvwà mwenze matuku a kale, s’ncya bushuwa ne Yêyè mmufwanyine kumanya ciikalà matuku acivwavwa. Ncya bushuwa, bu Yêyè mwa kukwambila aci anyi? Cya bushuwa’s. Ne Yêyè mungambile ne udi muvwile cinyi mwaba ewu, udi mufwanyine kuMwitabuuja bu Mwànà wa Nzambi anyi, kuciitabuuja? Mbanganyi mu bateeleji emu

bìikalà mwa kwitabuuja ciine aci? Ne mêmè ne mukaji ewu biikàle ne byanza byetu byela muulu, katwena—katwena... twètù, nwamonu's, katwena bamanyangane to. Ncyênàku mêmè ne cingenyinyenyi nansha cikese to, udi mumanye ne ncyèna naaci to. Wèwè udi mwimane mwaba awu, mwikàle anu mwenyi kùndi. Kadi bu Mukalenge Nzambi. . . Ndi nyiikila neebe bwa kufikisha Nyuma ku dibanga kwela dilaabiibwa pa bantu, udi umona's, nenku pashiishe bidi bibwayika anu naka too ne ku ndekeelu. Nenku mêmè—mêmè ndi anu nkutangila cyanaana bwa kumona cyangambilaYe, bwalu mêmè ncyèna mumanye kantu nansha kamwe bwa cyôci aci to. Kadi Yèyè mukwambile cintu kampanda, dîbà adi neumanye ne mbulelela anyi kî mbulelela, kî mmwômò anyi? Muntu ne muntu neitabuuje, bu Yèyè mwa kucyenza anyi?

²⁸⁸ Taatù wetu wa mu Dyulu, ncyèna mwa kwenza cikwabo cintu mpindyewu to. Twáfiki anu too ne pa dîbà edi, nebikengele Wèwè kwangacila apa, Mukalenge. Nyewu ngafikishi bantu ku Dîyi Dyebe. Ki cyônsò cîndi mumanye. Wèwè ngudi mulaye bintu ebi. Ne mbifwanyine kwangata mbingu ne mbingu, twètù bafwanyine kwikala anu pa byôbi abi, twambilangana anu bwa milayi Yebe ya bintu ebi mene bwa matuku a ndekeelu. Bu mutuvwa bikondo byônsò ebi mu nyungulukilu wa buloba, Wèwè kutu mwanji kutupangikaku to, Mukalenge. Mpindyewu ki musumbà wa bantu biikàle bateeleja ngwôwò ewu. Ndi mumanye ne cimwepele cya ku bikeena-kumona ebi necitutekeshe. Ndi mumanye nanku. Bukole bwakapatuka mu Wèwè, Mwànà wa Nzambi, Mwànà wa Nzambi udi kayi musopakaja to. Kadi nebiikale bishi bwanyi mêmè ewu, ngènzàmpèkààtù musungila ku ngàsà Webe?

²⁸⁹ Nyewu ndomba, Taatù, bwa Wèwè kucilekelakù cyènzeka mpindyewu, bwa ne Mukenji ewu mu dinda emu kawikadi wàpanga kukwama mamuma to, kadi bàcidi bàkùdimwinàku mucima aba, pàmwàpa makumi abidi anyi makumi asatu badi bafuma ku dyela byanza byabo muulu kùdi Wèwè aba, bwa baamonaku mwa kutwishiibwa, Mukalenge, ne Nzambi wabo mmubiike ku bafwe ne Yèyè udi ne mwoyi kashidi ne kashidi, mwikàle uDimanyisha, Nzambi mwine utu mumanye maalu masokome a mu mwoyi, ne wàkalaya ne mu matuku a ndekeelu nebyenzeke cyakabidi awu. S'ki twètù aba, ku ndekeelu wa cikondo. Ne bantu baa Bisamba bya bende mbapete bidimu binunu bibidi, anu mwakapeta beena Yuda amu, bwa kuyiilabo pa bidi bitangila Nzambi, ne mpindyewu nyewu bakaadi munkaci mwa kupeta cimanyinu cimwecimwe aci kadi biikàle baCibenga anu menemene mwakenza beena Yuda amu. Beena Yuda baakabenga Maasiya wabo, bwalu bakaavwa bacivwije cyônsò dingumba. Ne ki mukaadibo paabo leelu ewu, Mukalenge, benze cintu cimwecimwe aci. Kadi twètù katwena mwa kwambula abu bujitu to. Butudi twètù naabu

budi anu bwa kufila bujaadiki cyanaana, Mukalenge. Anu mudi mukooko, kawutu ukwatakaja cintu nansha cimwe to, utu ne myôsà pambidi bwalu wôwò mmukooko. Nenku, Mukalenge Nzambi, enzaaku bwa twikale ne Nyuma wa Nzambi, bwalu tudi beena Kilisto. Tudi bakwitabuuje Wêwè. Tudi biitabuuje Mwânà wa Nzambi. Mpindyewu, Mukalenge, mêmè ncyèna mukumbanyine to, kadi angata. . . Udi mukumbanyine nganyi? Udi mukumbanyine ki nganyi, Mukalenge? Nansha umwe wa kutudi. Twêtù bônso tudi balela mu mpekaatu, bafwimba mu bubu, balwe pa buloba biikàle twamba mashimi. Utufwileku luse ku bukooya bwetu—bwetu, Mukalenge. Ne mpindyewu ukwateku neetu mudimu mu dituku dya ndekeelu Mûdi ukwata mudimu ne bukwabantu emu. Mu Dîna dya Yesu. Amen.

²⁹⁰ Mpindyewu, mu Dîna dya Yesu Kilisto, ndi ngangata nyuma yônso mwaba ewu, munda emu, ku bukontononyi bwanyi mêmè. Nwamonu anyi? Mpindyewu ikalaayi mu kaneemu. Ncitu mukumanye to, ncyèna mumanye kantu nansha kamwe pa bidi bikutangila to. Ndi pà. Anu mushindu wûdi udikokolaku awu, kumpala kwa Nzambi, udishiye munda mutupu. UMulekele Yèyè utangila. Ncyèna mumanye to, kadi ndi mumanye ne Yèyè udi mwaba ewu. Ndi mumanye ne Yèyè mmwimane mwaba ewu. Eyowa's, mandamu, lutatu lwebe's ndwôlò elu. Udi ukeba disambila bwa kansere. Kiine kansere aku kadi pa mpala peebe apu; mbyenze bu ne, kî nkamweneke to, kadi kadi kuulu kanyungulukile dîsù dyebe adi. Piikalabi ne ncyà bushuwa, ela cyanza cyebe muulu.

²⁹¹ Ngûmvù cyôci aci cibwela buludi cifumina mu bateeleji amu, nwambi ne: "Mmubuke cyôci aci anyi mmucitangile pa mpala." Kî ncîngênjî to. Imana kuyi unyunga to. Lekelabi mêmè. . . Sataana, udi mupiile. Imana kuyi unyunga to, mwaneetu wa bakaji. Wêwè mumufikishe ku dibanga, yèyè mufike ku dibanga, dibà adi yèyè neatomboke. Tudi tutandisha démon awu, mu Dîna dya Yesu Kilisto, ne tumushiya ku bundu.

²⁹² Wêwè udi ne lutatu lupite apu. Kabidi, udi ne disaamà dya mwoyi. Ntatu mikodyakane, anu masaama a dinyunguluka dya mutu pa ôwò, bidi mushindu awu kukaadi bidimu. Ncyà bushuwa menemene, mucyokakane, udyumvwa mubungame, ne bikwabo byônso. Aci cidî. . . Nî ncyà bushuwa, ela cyanza cyebe muulu. Mpindyewu udi mwondopiibwe. Diitabuujà dyebe dyakusungidi. Udi mwa kwalukila kumbelu mpindyewu ne kuumvwa bîmpè. Byônso mbijike. Ndaaku anu cyanaana, mwitabuujè, kî cyônso cidî cikengela bwa wêwè kwenza. Ela Nzambi twasakidila.

²⁹³ Udi witabuujà anyi? Imana wêwè anu mwaba awu, inăbànzà, tangila dya kuneeku. Udi witabuujà ne ndi musadidi Wende anyi? Nzambi udi mwa kwondopa disaamà dya mwoyi anyi? [Mwaneetu wa bakaji awu udi wamba ne: "Eyowa. Udi mwa

kwondopa.”—Muf.] Eyo, Yêyè wamanyi kwondopa dyebe adi, dîbà adi, pawikala muswe kwitabuuja. Ndaaku, itabuuja.

²⁹⁴ Udi witabuuja ne Yêyè wõndòpù kansere anyi? Nanku alukilaaku pa mwaba webe, wãmbè ne: “Twasakidila, Mukalenge Yesu.”

²⁹⁵ Kadi amba tũng bu mêmè nciyi mukwambile diyì nansha dimwe to kadi ciikàle anu. . . Uvwa mufwanyine kwitabuuja bu mêmè mukwambile ne wondopiibu pawabwedi mu mulongo apu anyi? Uvwa mufwanyine kwitabuuja diyì dyanyi bwa cyôci aci anyi? Udi mwondopiibwe, ne kabyena bikengela nansha bwa kukwambila ciine eci to, ukààdi mumane kwondopiibwa. Ncyêna mulenge muntu to.

²⁹⁶ Wêwè kabyena, kabyakukengela bwa kukupandabo to bu wêwè mwa kwitabuuja Nzambi. Udi uciitabuuja ne mwoyi webe wõnsò anyi? Cyûjà cya kansere aci cyamanyi kuya. Alukila kwebe ne neusangale.

²⁹⁷ Tangila dya kuneeku, mwaneetu wa bakaji. Udi witabuuja ne mêmè ndi musadidi Wende anyi? Indila kakese. Mpindyewu, kudi muntu mulume udi anu wenza kumweneka kumpala kwanyi mwaba ewu, ùdi ne cintu cimwecimwe cidi naaci mukaji ewu aci, mwaba kampana mu bateeleji amu. Ne monaayi Bukênkè budi mu fôtò bwabwa, Bwòbò abu nyawu bwimane mwaba ewu mene. Kanwenaayiku mwa kumona cyôci aci anyi? Mmuntu mulume udi musòmbe kaaba aka ewu. Udi ne karta kaa disambila anyi, mukalenge? Nsongaalume, ngeela meeji ne udi Mwaneetu Hupp, kí mmwômò anyi? Ndi mfuma ku dikujingulula’s. Ncyêna—ncyêna mumanye lutatu lùdì naalu to, Mwaneetu Hupp. Wêwè’s udi mumanye ne ncyêna mumanye. Udi witabuuja ne Nzambi udi mwa kungambila cidi lutatu lwebe anyi? Udi ne lutatu. Uvwa musòmbe kaaba aku, mwikàle mwitabuuje. Bivwa bikengela bwa wêwè kwitabuuja bwa mwaneebe wa bakaji uvwa mwaba ewu katanci aka awu. Wêwè’s udi witabuuja, kí mmwômò anyi? Mukaji ewu udi ne binyoka; wêwè peebe, mbyùdì naabi. Aci ní ncyà bushuwa, ela cyanza muulu. Itabuujaayi ne mwoyi wõnsò nenku nwênù bõnsò babidi nudi mwa kwondopiibwa. Nzambi anubeneshe. Sataana uvwa wela meeji ne neatuute dyakalenga ne muntu wawa, wãcipangìdì. Ikalaayi ne diitabuuja mpindyewu. Kanwedi mpatà to. Mpindyewu, muntu mulume udi apa ewu, nansha ne. . . Mwaneetu Hupp, wêwè kwêna ne karta kaa disambila to, mmwômò anyi, Mwaneetu Hupp? Eyowa, wêwè’s udi musòmbe anu mwaba awu, mwitabuuje. Utangile umone cidi cikwenzekelà. Itabuuja anu cyanaana ne mwoyi webe wõnsò mpindyewu.

²⁹⁸ Bõnsò ikalaayi mu disambila. Nudi nwitabuuja mpindyewu anyi? Mpindyewu, nudi nufika ku dyumwawa ne bintu ebi bidi anu bimpeesha butekete mu mushindu wa mwikàle anu. . .

299 Udi witabuuja ne mwoyi webe anyi? Bu mêmè mwa kukwambila ne neŭmvwè bîmpè, udi mufwanyine—udi mufwanyine kwitaba dîyi dyanyi bwa cyôci aci ne kuciitabuuja anyi? Nanku ndaaku ne Yesu Kilisto neakusangaje. Itabuuja nanku ne mwoyi webe wônsò.

300 Udi wela meeji ne Nzambi udi mwa kwondopa dinyunguluka dya mutu ne kukusangaja anyi? Ndaaku, itabuuja nanku. Ngeela meeji ne ndi. . . Ncyèna mutwishiiabwe to, mvwa ndyambidila ne mvwa mumanye mukaji wawa naka. Ncivwa mutwishiiabwe to. Cikeena-kumona ncibwayike lwà kumutu kwende aku kadi mêmè—mêmè kuciimanyika, mêmè kutangila anu paanyima ku luseke lwa cyanaana; bwalu mvwa ngeela meeji ne mvwa—mvwa mumanye mukaji awu, kadi nci—ncivwa mutwishiiabwe to.

301 Mpindyewu ikalaayi mu kaneemu, bantu bônsò. Nudi nwitabuuja anyi? [Disangisha didi dyamba ne: “Amen.”—Muf.] Nwamonu’s, ndi ne mulongo wa babeedi munene mule kaaba aka, ncyèna muswe. . . Anu kuulu. Nenku, mpindyewu ewu, ngânùyiishi mèbà bu abidi anyi asatu nanku awu, kadi patudi twakulangana apa, nkaadi ne butekete misangu yibidi kupita mùmvwà naabu munkaci mwa diyiisha dyônsò adi. Nwamonu’s, s’cidi anu citekesha mwoyi wanyi. Kadi, aba, tudi bafwanyine kutungunuka ne kwakula ne bantu, aci’s ncifwanyine anu kwikala cilenga, kaciyena ne cìdìcì cishintulula to nansha cikese. Udi mwa kushaala mwimane, kuyiikila ne bantu ntanta bule bwônsò bùdì muswe abu, kutamba kwakula bidi anu bitambe kwenzeka, kadi ngimànyiki bwa ndaminineku ndambu wa makanda aanyi bwa bakwabo bacidi balwa mu mulongo ewu abu. Nudi bumvwe cìndì muswe kwamba aci anyi? Mbanganyi bàkaadiku bamone cya nanku myaba yînkaadi misangu yàbùngì ngiimanyika ngaakula ne bantu, Cyôci aci cibambila byônsò bidi bibatangila, ne bôbò mbanganyi ne myaba yidibo bafumine? Ekelekele, nukaadi babwelebwele mu masangisha ne bacimone, nudi bamanye’s.

302 Ewu—ewu udi ulonda ewu, wêwè ki udi ulonda anyi? Eyo, mukalenge, udi witabuuja ne mwoyi webe wônsò anyi? Ee, mbilenga. Tudi beena kwitabuuja, twitabuujaayi ne mwoyi wetu wônsò. Nenku nciyiku mukumanye to, bu Mukalenge Yesu mwa kungambila cintu kampanda cidi cikutacisha, s’udi mufwanyine kumanya ne ncyà bushuwa anyi kî ncyà bushuwa, kî mmwômò anyi, mukalenge? Eyowa’s, mukalenge. Bu mudibi ne ewu ngwetu. . . Ngeela meeji ne katwena bamanyangane to. Ncyèna mvuluka mpala webe to. Tudi bônsò bambi, ne tudi. . . kadi katwena bamanyangane bya sheemàsheemà bu balunda to. Eyo, mukalenge. Nenku tangila dya kuneeku, mukalenge, ne ungiitabuuje bu musadidi wa Kilisto ne mwoyi webe wônsò. Eyo, mukalenge. Muntu mulume ewu udi usaama dila dinene. Cidi mu dila dyende dinene. Cidi kabidi ndisamà dya mwoyi dyûdi naadi. Udi mwambi, aci ncilelela, udi wa mu Ekeleeziya Musanga

wa Bânà beetu. Udi mufumine ku Ramsey, mu Indiana. Dînà dyebe m'Mukalenge Beanblossom. Révérend Beanblossom, aci ncilelela. Aci nî ncyà bushuwa, ela cyanza muulu. Nanku alukila kwebe usangale, mukalenge. Yesu Kilisto udi ukusangaja. Itabuuja ne mwoyi webe wônsò.

³⁰³ Binyoka kî mmudimu to bwa Nzambi. Udi witabuuja ne Yèyè udi mwa kukusangaja anyi? Udi witabuuja ne Yèyè neakwondope anyi? Ndaaku uMwitabuuje ne mwoyi webe wônsò nenku udi mwa kucipeta ne wônsò... itabuuja wêwè anu cyanaana ne mwoyi wônsò... .

³⁰⁴ Mwaneetu, ndi mukumanye, mumanye dîsaamà dyebe. Udi mwitabuuje mpindyewu mene, pândi mu dilaabiibwa dya Nyuma Mwîmpè apa, ne Nzambi neakwondope ne neakusangaje anyi? Ndaaku witabuuje nanku, Mwaneetu Collins, nenku usangale. Eyo.

³⁰⁵ Ndi—ndi. . . mbyenze anu bu ne nkaadiku mukumone, kadi ncyêna mutwishibwe to. Kadi bu Nzambi mwa kungambila cidid lutatu lwebe, newitabuuje ne mêmè ndi muprofeta Wende, anyi musadidi Wendè—Wendè anyi? Udi uciitabuuja anyi? Eyo. Udi usaama dîsaamà dya mutu unyunguluka. Ki dyûdi ukebela disambila. Ncyà bushuwa anyi? Ela cyanza muulu piikalabi ne ncyà bushuwa. Alukila kwebe, usangale. Itabuuja nanku. Endela pampala paaci mpindyewu. Ikala ne kaadiitabuuja kakese kadi kenza bwalu aku.

³⁰⁶ Ee, udi witabuuja ne Kilisto neakusangaje mpindyewu mene paudi mwimane apu anyi? Itabuuja nanku, walukile kwebe kumbelu wâmbè ne: “Yesu Kilisto udi unsangaja mpindyewu mene.” Itabuuja ne mwoyi webe wônsò. Udi ne cya kwitabuuja, bwa wêwè kwikala ne mwoyi. Udi mumanye aci, kî mmwômò anyi, mwaneetu wa bakaji? Wêwè kuyi mwitabuuje to, udi ne cya kufwa. Udi mumanye nanku. Kadi Yèyè udi wondopa masaama a mishindu yônsò, kansere, bikwabo kana byônsò, ne ukusangaja. Udi witabuuja aci ne mwoyi webe wônsò anyi? Nanku ndaaku witabuuje ne mwoyi webe wônsò, usangale, mu Dînà dya Mukalenge Yesu Kilisto.

³⁰⁷ Eyo, mwaneetu wa balume, udi mumanye ne mêmè ndi mukumanye, nenku ndi anu nteeta bwa kubakula, nansha nanku. Kadi udi witabuuja ne Yesu Kilisto neakusangaje mpindyewu mene paucidi mu dilaabiibwa dya Nzambi dya Nyuma Mwîmpè apa anyi? Ndaaku witabuuje nanku ne mwoyi webe wônsò.

³⁰⁸ Cinyi mpindyewu? Eyo. Indilaayiku katanci kakese mpindyewu. Ngimànyinyi penyi, ngimànyinyi penyi katanci aka? Makumi abidi ne itaanu, makumi abidi ne isambombo, makumi abidi ne mwandamutekete, makumi abidi ne mwandamukulu, makumi abidi ne citeema, makumi asatu, ndaayi anu nwenda nubànda nubwele mu mulongo. Makumi asatu, makumi asatu ne

umwe, makumi asatu ne ibidi, makumi asatu ne isatu, makumi asatu ne inaayi, makumi asatu ne itaanu, makumi asatu ne isambombo, makumi asatu ne mwandamutekete, too ne ku makumi ataanu, elaaayi anu mulongo mpindyewu mwaba awu, nwênù badi ne twarta twenu twa disambila abu, bwa nutufile anu kudi wisiyê awu anyi kudi bânà beetu baa balume abu padibo bapitakana apu.

³⁰⁹ Mpindyewu twânjì twangataayiku anu kandambu kaa dîbà bwa kwikishaku, kasunsa kamwepele cyanaana. Udi witabuuja anyi? Maalu ônsò adi mwa kwenzeka, itabuuja naka.

³¹⁰ Mwaneetu wa balume ne Mwaneetu wa bakaji Spencer, ntu munumanye kacya anu pâncivwà mwânà mutekete. Ndi mumanye cidì lutatu lwenu, ne mumanye cinudi biimanyine kaaba aku. Nudi nwitabuuja ne Yesu Kilisto neanusangaje, panudi biimane kaaba aku apu anyi? Éyì Nzambi wa mu Dyulu, filaku mabenesha Ebe pambidi paa babaka bàkaadì banunu aba, ubatume bwa kwikalabo ne mubidi tumatuma, Taatù. Bamanè kwela bidimu bikolè mwaba ewu, nyewu bacidi anu baKukwacila mudimu. Nyewu mbabenesha mu Dînà dya Mukalenge Yesu Kilisto. Amen. Alukilaaayi kwenu ku . . . Nzambi akubeneshe, mwaneetu wa bakaji. Neangate bidimu makumi mwandamukulu ne bisatu, wêwè ucidì anu kabidi ne bikwabo bidimu byenda bilwa, itabuuja nanku ne mwoyi webe wônso ne Nzambi neikale neebe. Kabidi, ne wêwè peebe, Mwaneetu Jess. Nzambi akubenesheku mwaba ewu.

³¹¹ Udi witabuuja mpindyewu ne mwoyi webe wônso anyi? Indila, ndi ngeela meeji ne ndi mutupike mwaneetu wa bakaji mutekete udi lwà kwinsi eku ewu. Eyo. Tudi ne tulaalu tubidi twa babeedi, bikengela tufike kudibo mu katanci kakese cyanaana. Bidi bikutacisha bwa kwindilaku anu kakese cyanaana anyi, mwaneetu wa bakaji wawa, anyi nî mmuntu kaayi mukwabo udikù awu?

³¹² Mpindyewu ikalaayi ne kaneemu kaa menemene ne biikàle biimane batuuje, bantu bônso biikàle ne kaneemu. Nwamonu's, nudi ne cya kwikala ne kaneemu kaa menemene, kaa menemene. Mpindyewu twikishaayiku anu katanci, nwamonu's, ku bikeena-kumona, katanci kakese cyanaana. Nenu ikalaayi ne kaneemu kaa menemene. Mpindyewu bantu bônso biikalè batangile dya kuneeku, nenu twîmbàayi biteketebitekete, *Itàbùùjà Nàka*, mpindyewu. Twètù bônso cyapamwe mpindyewu. (Ndekelaayi.)

Itabuuja naka, itabuuja naka,
Byônso bidi mwa kwenzeka, itabuuja naka;
Itabuuja naka, itabuuja naka,
Byônso bidi mwa kwenzeka, itabuuja naka.

³¹³ Mpindyewu, yêyè uvwa mundombe bwa mêmè kuya kabasambidila mpindyewu, kadi nyewu ndi anu bu mwololoke kwôkô ndambu bwa mpindyewu. Lekelaayi mbangulule ne

badi mu mulongo, mu katanci kakese cyanaana nêngìmanyikè. Mpindyewu, bantu biine bàdi bàkèngelà kusambidila bèpi, nyinábànzà udi mu nkwasu wawa anyi? Eyo, katanci kakese cyanaana, nê—nêmpetè...nêmfikè kudiye aku, nwamonu's, katanci kakese cyanaana. Eyo, katanci kakese cyanaana. Mpindyewu, bantu bônso biikàle ne kaneemu kaa menemene. Ndi mutwishiibwe menemene ne nukaadi—nukaadi bafike ku dyumvwa ne ndi mu bwenzeji kaayi mwaba ewu. Nwamonu anyi? Kî ng'anu apa to, kadi, mu matunga a ku baabèndè, misangu mikwabo binunu kuvudija ku binunu.

³¹⁴ Ndi muumvwe ndambu, mwua muumvwe ndambu wa ditacishiibwa dya ku mwoyi katanci aka, bwa dîna dya muntu kampana divwà dibiikidiibwe. Kwêna ufikaku ku dyumvwa ne Yesu mmumanye dîna dyebe anyi? Kwêna mumoneku aci anyi? Badi ne cya kwikala beenyi mwaba ewu, bôbô kî mbanji kucimona to. Mona's, ekelekele, mingà misangu pa cibumba cya ku cyambilu apa's mpatuYe wambila bantu mpekaatu yabo, ne uyumbula uyeela patooke. S'nudi bamanye ciine aci. Yônsò... Yesu kaakambilaku Peetelo ne: "Dîna dyebe n'Simona. Dîna dya tatwèbè divwa n'Yona. Mwâna wa Yona" anyi? Nwamonu anyi? Anu bwa kuleeja ne Yêyè awu udi kaaba aka. Mpindyewu, muntu kana yônsò mmumanye, muntu ne muntu mwaba ewu mmwenzejiibwe bwa kwamba ne kudi Nyuma wa mushindu kampana udi wenza aci. Mpindyewu, wêwè udi mwa kwamba ne: "M'Beelezebula," anyi udi mwa kwamba ne: "Kilisto." Nzambi ngwâlumbulwisha cyônsò cidiku aci. Nwamonu anyi? Mêmè ndi nwanambila ne aci mmulayi wa Bible, Bible Munsantu wa Nzambi mwaba ewu ngudi ucipeesha mulayi.

³¹⁵ Mpindyewu, mpindyewu ikalaayi ne kaneemu kaa menemene. Mpindyewu, indilaayi kakese cyanaana. Ewu ki yêyè muntu udi ulonda anyi? Eyo, patukilaaku lwù eku, mukalenge. Ncyêna mumanye muntu ewu to. Nzambi ngudi mmumanye. Kadi, mukalenge, bu Nzambi mwa kungambila cyûdi muvwile kaaba aka, ee, ncifwanyine kukufikisha ku diitabuuja. Kî mmwômò anyi? Mmwômò cya bushuwa. Mbanganyi bakwabo kunudi aku badici cifwanyine kufikisha ku diitabuuja? S'ki bantu balume babidi bàdi batwilangane aba, muntu ewu mmwânà kùndi mêmè. Nzambi mmumudiishe mu matuku ende ônsò a mwoyi. Nyawu mwimane mwaba awu ne mèsù ende mabwita. Kadi bu Nzambi mwa kunsokolwela cidi muntu ewu muvwile kaaba aka, anyi cintu kampana cidi citàngilà bwalu abu, s'bivwa bikengela kufikishaci muntu ne muntu wa kunudi ku diitabuuja ne mwoyi wende wônso's. Kanwenaayiku peenu nwela meeji nanku anyi?

³¹⁶ Mwaba ewu, indilaayi katanci, anu paanyima apa, lwà paanyima menemene apa mu mulongo, padi muntu mulume musômbe, munkaci mwa kusambila. Udi ne cintu cya pabwaci menemene. Nyewu mmona bukênkè bwa bupenya. Eyowa's,

mbamutuute kudi nkuba. Eyowa. Ikala ne diitabuuja, mwaneetu wanyi. Ndi mwenyi kûdi, mukalenge. Aci nî ncyá bushuwa, ela cyanza cyebe muulu ne, katwena bamanyangane to. Nzambi ngudi mukumanye. Ikala ne diitabuuja mpindyewu.

317 Mpindyewu wêwê udi wamba ne: “Cyûdi wenza aci ncinyi, Mwaneetu Branham?” Ndi munkaci mwa kutangila Bukênkê bwabwa. Budi bwenda butentemuka.

318 Disaamà dya kalondo kaa mênýi, musòmbe pààpa ùsambila bwa . . . ne disaamà dya kalondo kaa mênýi, muntu mulume mwikàle kacya wantangila. Katwena bamanyangane to, s’mwômò’s? Ngambilaayaaku tûng cidi muntu wawa mulenge aci ne ncinganyi. Disaamà dyebe dya kalondo kaa mênýi adi dyamanyi kuya, mukalenge. Cyalengiye aci ncinyi? Pende’s nyawu usanganyiibwa mu ntanta wa mètres citeema ne mwaba wûndi. Mmulenge Mwakwidi Munene udi mwa kulengiibwa kudi dyumvwa adi.

319 Muntu mulume udi musòmbe ku luseke lwebe awu, nyawu udi usambila pende, yêyê. Cidiye wamba mu disambila dyende aci ncyôcì eci ne: “Mukalenge, enzaku bwa udi ulonda ikaleku mêmè.” Ki cidiye ufuma ku dyamba mpindyewu mene. Ncyá bushuwa. Mêmè ngaamanyi bishi bwalu bûdi usambidila? Yêyê ngudi wandamuna ku disambila. Kaamunda kaudi usambidila aku, ki kaudi naaku, kaamunda. Aci nî ncyá bushuwa, ela cyanza muulu. Eyo, pawikala witabuuja ne mwoyi webe wònsò, cintu aci necyondopiibwe.

320 Ndi ngeela diitabuuja dyenu kadyombo. Mu Dînà dya Yesu Kilisto, itabuujaayi! Kaa, ekelekele, ebi bintu bîndi ngumvwa’s wê! Yêyê awu udi mwaba ewu. Eyowa. Mpindyewu byenzekê. Mpindyewu nenumone ne Mfumu ki Nganyi. Yêyê ki udi Mfumu. Kadi mwena dyabulu adidinge àmbè anu cintu kampanda mpindyewu, mwena bupidya awu. Mukalenge Yesu Kilisto, bwa kunujaadikila ne cikondo cya nshiikidilu ncikaadiku eci, awu n’Nyuma Wende pambidi paanyi. N’Yêyê awu. Kî mmêmè to, mêmè ncyêna munumanye to. N’Yêyê awu. Itabuujaayi nwênù anu ne mwoyi wenu wònsò.

321 Muntu ewu, ngeela meeji ne nguvwa ulonda, muntu udi apa ewu. Mukalenge, mêmè—mêmè bûndi naabu budi anu bwa kwikala kutangila ne Cyôcì aci ciyaaya citangile penyì. Ncyêna mukumanye to. Bu Nzambi mwa kunsokolwela cyûdi muvwile kaaba aka, newitabuuje ne mêmè ndi muprofeta Wende, musadidi Wende anyi? Wêwê ewu udi muntu wa bukutu. Udi mwimane mwaba ewu bwa muntu wa cyanaana, ncyá bushuwa, yêyê awu ùtu uya neebe mu ekeleeziya, byûjà. Ncyá bushuwa. Wêwê kutu wa muneemu to. Muneemu kî mmwenu to. Udi mufumine kule kwa dikema. Udi witabuuja ne Yêyê udi mwa kungambila kûdi mufumine anyi? Missouri. Aci’s ncyá bushuwa menemene. Mukalenge Friels, mpindyewu wêwê mwitabuuje ne

mwoyi webe wònsò, udi mwa kwalukila kwebe ne kuumvwa bîmpè, ne bikwabo bintu byebe byònsò byúdi ulomba abi. Ndaaku witabuuje Mukalenge Yesu Kilisto.

³²² Udi witabuuja anyi? Mbyenze anu bu ne ndi ne cya kwikala mukumanye. Nkaadiku mukumone mu mwaba kampanda. Kaa, ngaamanyi, ngaamanyi mwaba wúvwà usanganyibwa. Wèwè ewu's utu. . . Mpindyewu, indila kakese. Ncyèna mujimije lungenyi to, kadi eci ndilaabiibwa. Wèwè utu. . . Mpindyewu, anji indila kakese. Uvwaku mwondopiibwe mu Louisville, mu Kentucky, anyi mwaneenu wa bakaji ngwákondopiibwa. Wèwè udi cidì. . . Hupp, mwànà wa bakaji wa Mwaneetu wa bakaji Hupp. Ncyà bushuwa. Udi witabuuja ne mwoyi webe wònsò anyi, bwa wèwè kwondopiibwa mwàkondopiibwà mwaneenu wa bakaji amu? Alukilaaku kwebe, ucipete, Yesu Kilisto udi ukusangaja.

³²³ Mwaneetu wa balume, itabuuja ne dinyunguluka dya mutu adi dyamanyi kuya kashidi, ne alukilaaku anu kwebe, wamba ne: “Twasakidila, Mukalenge Yesu, nyewu ngàlùkidi kwanyi, nsangale.” Ne Yèyè ngwacyenza.

³²⁴ Udi witabuuja ne mwoyi webe wònsò anyi, mukalenge? Kadi bu mèmè mwa kupweka kukutentekela byanza, ne dilaabiibwa edi? Udi mufwanyine kwitabuuja ne, ncifwanyine kukwenzekela anyi? Nèmpwekè ndwe kucyenza, mu Dîná dya Yesu Kilisto. Neufwe mulaale mwaba awu, udi usaama bikole, bikole be, kakwena cintu nansha cimwe cidì mwa kwenjiibwa to. Udi ne mâyi mu bisulusulu. Ncyà bushuwa. Neufwe mulaale mwaba awu, cya bushuwa anu mudibi ne buloba budiku. Mpindyewu, bwa cinyi kubenga kuMwitabuuja ne mwoyi webe wònsò? Juuka, mu Dîná dya Yesu. . . ? . . .

[Mwaneetu Branham udi usambila—Muf.] Nzambi, enzaku bwalu abu. Yèyè wangumwidi ku disambila dyanyi mu Dîná dya Yesu. Nzambi, enzaku bwalu abu.

Kumpiciku to, Éyi mupole. . .

³²⁵ Sambilaayi, bantu bònsò, mpindyewu, twètù bònsò cyapamwe, netutentekelangane byanza. Dilaabiibwa dya Nyuma Mwimpè didi kaaba aka, nèntentekelè bantu byanza. Bible mmwambe ne: “Bimanyinu ebi nebifile badi biitabuuja.” Eyo.

[Disangisha didi dimba musambu wa *Kumpicikù To* padi Mwaneetu Branham mutungunuke ne kusambidila bantu apu—Muf.] . . . ? . . . Patuka munda mwende, wèwè Sataana, mu Dîná dya Yesu Kilisto. . . ? . . . Mu Dîná dya Mukalenge Yesu. . . ? . . . Mu Dîná dya Mukalenge Yesu. . . ? . . . Taatù wa mu Dyulu. . . ? . . .

³²⁶ Tusambilaayi mpindyewu bwa tulàmbà tudi apa etu. Taatù wetu wa mu Dyulu, baakangata pambidi paa Pòlò Munsantu, mishwala, anyi tulùlù, ne nCyambe ne “Nyuma ya bukooya

yivwa yumuuka pambidi paabo.” Tudi bamanye ne twêtù katwena Pòlò Munsantu to, kadi tudi bamanye ne Wèwè ucidi anu Yesu umwèumwè awu, bwalu Udi ne mwoyi leelu ewu anu mÛvwà mu matuku a Pòlò Munsantu amu. Nyewu ndomba bwa malomba aa, Mukalenge, adi mishwala eyi yileēja. Tulàmbà tukese ne tushwala, ne tusabaata tukese twa bânà baa mu maboko. Nzambi, ndi ndomba bwa Wèwè kwenzaku nanku.

³²⁷ Tutu bayiile ne Izaleela uvwa mu lwendu mutangile ku buloba bulaya, Dikunji dinene dya Kapyà dyenda diya kumpala kwabo, muprofeta uleeja mpala wabo, uleeja mpala wa Nzambi, bwabo bôbò pa buloba. Nenku bôbò. . . muprofeta ewu uvwa mupatuke naabo kadi kubalombola too ne ku Mbù Mukunze, ne mbu awu kujika njila. Kuvwa cintu kampanda cicyamakane mu njila pavwabo benda baya mu njila wa mudimu. Nzambi mu Dyulu wakapwekesha mèsù kutangidila mu Dikunji dya Kapyà adi, ki mbù kukwacikaye bwôwà, ne kudisakaye paanyima ne kukangula njila wa upicila menemene anu mu mbù amu, bwa Izaleela kutungunukaye ne kwendela mu kajila kaa mudimu aku, ki kuyabo too ne ku buloba bulaya.

³²⁸ Nzambi, paatentekelabo babeedi ne beena ntatu mishwala eyi. . . Sataana mmubacyamakane mu njila, ùdi ùbàpangisha mwa kulondabo kajila kaa mudimu. Enzaku bwa Bukole bwàkajuulà Mukalenge wetu ku lufu abu, Yèyè udi usanganyibwa apa mpindyewu awu, bulwe pa mishwala eyi. Nenku, dîbà dyônsò dyalengayi babeedi adi, swaku bwa dyabulu akwacike bwôwà, padiYe upwekesha mèsù panshi utangidila mu Mashi a Yesu Kìlìsto apu, ne muntu ne muntu wa kudibo ondopiibwe ne atungunuke ne lwendu mu kajila kaa mudimu. Enzaku nanku, Mukalenge. Tudi tuKwela twasakidila. Bwikadi Bwebe budi kaaba aka. Kaa, edi dilaabiibwa dya butumbi dya Nyuma Webe dîdî dîtùnyungishà twêtù bantu baa cifwaka aba edi, Mukalenge. Mushindu mwine utudi tuKusakidila bwa bwimpè Bwebe’s we! Beneshaaku bintu ebi mpindyewu, mu Dinà dya Yesu.

³²⁹ Ne mitu yenu miinyika, muntu ne muntu munda emu. Kanuyi nwinyika anu mitu yenu nkaayaayi to, mpindyewu ndi muswe kunulomba bwa nwênù kwinyika myoyi yenu pamwe naayi. Cikwabo cidi Nzambi mufwanyine kwenza ncinyi bwa kunufikisha ku dimona ne Yèyè udi kaaba aka? Mpindyewu itabaayi mudi dîyi dyanyi dyambe amu. Dilaabiibwa edi ndinene menemene mpindyewu mene mu mushindu wa ndi mushaale bu udi ne cinyingunyingu mwaba ewu. Ncyèna mukoleshi wa maalu to. Nudi bamanye ne ncitu nanku to. Ncitu mudifile ku byejeji to. Ndi nnwambila mèmè anu cidi bulelela. Ncyà mu Mifundu. Ncyà bushuwa ne Bukênkè abu mbutangalake myaba yônsò, mbyenze anu bu ne Budi myaba yônsò mu nyungulukilu wa mwaba ewu. Dijinga dinenaanaale dya menemene’s! Ngitabuujaayi.

³³⁰ Bible mmwambe, mu Maako 16 ne: “Bimanyinu ebi nebifile badi biitabuuja.” Mbanganyi badi beena kwitabuuja kaaba aka, bãmbè “Amen.” [Disangisha didi dyamba ne: “Amen.”—Muf.] Ee, Bible mmwambe ne: “Bimanyinu ebi nebifile badi biitabuuja.” Bwa nwènù kumanya ne kí mmèmè to, nudi babwelemu menemene anu bu mèmè. Eci cidi anu dipà dya kudi Nzambi cyanaana, bwa kuMumwenesha, Didi dyamba maalu. Nenku ndi ngangata muntu kana yònsò bu ntemu ne, munda mwa bidimu, Dikaadiku dyambe cintu kampanda cidi kaciyi cyenzeke anu mu cyòci menemene anyi? Cilelela anu mu cyòci, musangu wònsò. Bidi—bidi ne cya kwikala nanku, bwalu n’Nzambi. Mpindyewu, kanwikadi nukenketa byenze anu bu dikenketa dya ndambu, nukeba cintu kampanda dyamwamwa to. Tangilaayi, Yèyè udi kaaba aka mpindyewu, mpindyewu mene!

³³¹ Mpindyewu, pawikala mwena kwitabuuja, tentekela muntu udi ku luseke lwebe awu cyanza, ne nebakutentekela cyanza. Kudisambididi wèwè mwine to, musambidile yèyè awu bwalu nebakusambidile wèwè. Mpindyewu bwa nwènù kumanya, ne—ne nwènù baswe kwenza cyòci eci, nènñujaadikilè. Ee, kí nkushaaleku kabidi nî ntulaalu twa dyamwila babeedi nî ntulaalu twa dibunya to, byònsò mbiye. Kadi nuvwa mwaba ewu pavwa tulaalu twa dyambwila babeedi ne tulaalu twa dibunya biteekiibwe mwaba ewu, bikalaba, balema, bilemenda, bampofu, kacya musangu nansha umwe ùtùbi kabiyi biye byònsò kantu ne kantu to. Mpindyewu, mushindu unutu nusambila mu ekeleeziya awu, pawikala Méthodiste, sambila mùtù ba-Méthodistes basambila amu. Pawikala Baptiste, sambila mùtù ba-Baptistes basambila amu. Pawikala mwena Mpenta, sambila mùtù bòbò abu basambila amu. Cyònsò cyùdi aci, sambila. Kadi sambidila muntu ùdi mutentekela byanza awu. Dìbà adi itabuuja.


³³² Mpindyewu, vulukaayi ne, Bible mmwambe ne: “Bimanyinu ebi nebifile badi biitabuuja. Bòbò batentekela babeedi byanza, babeedi nebasangale.” Mpindyewu nudi nusambidila muntu ne muntu, bu bantu nkaaya. Mèmè nènñusambidilè, mu ciibungì, ku cibumba cya ku cyambilu eku. Mpindyewu, muntu yònsò mu wende mushindu yèyè mwine.

³³³ Taatù wetu wa mu Dyulu, nyewu tuseemena pabwípì ne luse Lwebe. Katwena bafwanyine kulwa mu dinà dyetu twètù biine to, katùtu bapeeshiibwe mulayi wa aci nansha. Kadi tutu bapeeshiibwe mulayi kudi Mwân’Ebe Wèwè mwine munanga, ne: “Nwènù balombe cintu kana cyònsò kudi Taatù mu Dinà Dyanyi, Mèmè nèncyènzè.” Aci ki civwa mulayi Webe. Mpindyewu, Taatù, ndi ndomba bwa Wèwè kuDimweneshila ku beena kwitabuuja aba. Nyewu badi munkaci mwa kutentekela babeedi byanza, muntu ne mukwende, nenku nyewu tulwa mpindyewu ku nkwaswa wa butumbi wa Nzambi, biikàle tulwa

naabo. Mu Bible, mu Maako, nshapita wa 11, mvensa wa 23, udi wamba ne: “Wêwê mwambile mukuna ewu ne: ‘Tentemuka,’ ne kuyi wela mpatà munda mwa mwoyi webe to, kadi witabuuja ne ciwãmbi aci necyenzeke, udi mwa kupeta cyũdi mwambe aci. Nwênũ bashaale munda Mwanyi ne Mèyi Aanyi munda mwenu, nulombe cinwàsa aci, ne necifidiibwe.”

³³⁴ Mpindyewu, Taatù, mwimanyine pa kanungu ne kanungu kònsò kaa Dìyi Dyebe, mémè ndi muDìtàbe nciyi ntangila cidi bakwabo bamba to. Ndi muDìtàbùuje anu mudiDi difundiibwe amu. Bwalu kî nDya muntu udyumvwijila paa nkaayende nansha, mutùdi bayiile, kadi anu mudiDi difundiibwe amu. Piikalabi ne Wêwê neutulumbulwishile ku Mukanda ewu, ncyá bushuwa ne Wêwê udi mutabalele ne Dyôdi dilwe kutudi mu mmwenekelu wa mushindu mujaalame, bwalu bikengela tulumbulwishiiibwe ku Mukanda ewu. Nenku mpindyewu, Taatù, ndi ngiitabuuja ne mwoyi wanyi wònsò, kutamba mene nansha dipà dya Nyuma dya ciprofeta dyŪdi mumanyishe. Nenku ki bwa cinyi ndi mumanye ne Cidi ng’Wêwê, bwalu nCikumbanangane anu menemene ne Mifundu misangu yònsò. Mpindyewu nyewu tulwa, Mukalenge, ne tuKwela twasakidila bwa Cyôci aci. Nenku tulaabáku mpindyewu. Tukàadi tuseemena pabwîpi ne malaba a mwena lukuna.

³³⁵ Wêwê Sataana, udi cintu cicimunyiibwe. Kwênàku ne bukole to. Mwànà wa Nzambi mmukwangate bukole bwebe, mukunyenge byònsò byúvwà naabi, ku Kalvariyo; mujaadike ne Yêyè uvwa neetu, ku dibiika dya ku lufu. Ne anu muvwa bavwa bafumina ku Êmawuse abu, n’Yêyè ewu mutumwenekele mu dinda emu ne mwenze cintu kampanda mu mushindu wakenzaYe kumpala kwa dipoopediibwa Dyende dya pa nkuruse, ki bwa cinyi tudi tumanya ne Yêyè mmubiike ku bafwe. Nenku, Sataana, tudi tulwa mu Dînà Dyende, Dînà dya Yesu, biikàle ne Bukole bwa Kilisto. Nenku wêwê udi mucimunyiibwe, ne wêwê udi anu mwena mikaaka cyanaana. Ne twêtù biitabuuje mikaaka yebe ayi, udi mufwanyine kutushipa dibà kadiyi dyanji kukumbana to. Kadi kwèna mwa kucyenzaku to. Tudi tulwa, biikàle twela yôyi ayi kadyombo ku Dìyi dya Nzambi, ku bisaama byakatumvwila Yesu. Tudi tucimuna mikaaka yebe ayi. Tudi tumusha kadyombo kaa cyanza cyebe aku, Sataana. Ne tudi tupatuka bwa kwenda kulondangana ne mukooko awu, bu mu bwalu bwa nyama wa ntambwe wa mu matuku a Davidi awu. Tudi tulwa bwa kwaluja mukooko awu ku mubidi tumatuma ne makanda a mubidi. Bàlekèlèlè, mu Dînà dya Yesu Kilisto! Patuka mu mwaba ewu! Patuka mu bantu aba, Sataana! Tudi tukutandisha, mu Dînà dya Yesu Kilisto. Bàlekèlèlè baye, bwalu ku Dînà dya Kilisto, nkutudi tubaaluja mu dinda emu ku Nkwasa wa butumbi wa Taatù, biikàle ne mubidi tumatuma ne makanda a mubidi, mu Dînà dya Yesu Kilisto.

³³⁶ Nwênù bônsò mpindyewu badi biitabuuja ne disambila dya diitabuuja dyamanyi kwenjiibwa abu, bwa ne nwâmanyi kutentekela muntu kampana byanza, ne nwitabuuji, ne biitabuuje ne Kilisto wăbôndôpù, ne biikàle nwitabuuja ne nudi bondopiibwe bwalu muntu awu wănûsambidì, ne biikàle nuciitaba mpindyewu mene ne nudi bondopiibwe, nansha wêwê mwikàle cikalaba cya mushindu kaayi, mpofo wa mushindu kaayi, mpudimaci wa mushindu kaayi, cyônsò cyûdì aci, nansha ne butekete bwa mushindu kaayi, nansha usaama mushindu kaayi, juukila kuulu, mu Dîna dya Yesu Kilisto, ne ùcîtàbè. Amen. Juukaayi kuulu, myaba yônsò, nansha kwikàle lutatu lwa bishi. Juukaayi kuulu, nwélè byanza byenu muulu ne nutumbishe Nzambi bwa bwîmpè Bwende. Amen. 

DISÜMINYINA LUA62-0218

(Perseverance)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dinda, mu matùkù 18 a ngondo mwibidi, cidimu cya 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org